

Li hona



To'na aroha maere,
mau api 10, 12

No te aha te haapiiraa
evanelia ? mau api 20, 46, 48

E te mau metua, a rave i
te taima no te aparau i ta
outou mau tamarii, api 34

E te mau tamarii, a aparau i
to outou na metua, api 58



HORO'ĀHIA E TE MINNEAPOLIS (MINNESOTA, USA) INSTITUTE OF ARTS, THE PUTNAM DANA MCVILLAN FUND, EIAHA E HAMANI I TE HOHO'A

Te Hunaraa a Petero Peata, na Gerrit van Honthorst

*« Ite maira râ te hoê potii tavini ia [Petero] i te parahiraa i te pae auahi,
... e ua na ô a'era, ia [Iesu] atoa ra teie nei taata.*

Ua huna ihora râ oia ia'na, na ô atura, e tera ra vahine, aore au i ite ia'na.

E muri iti ihora, ua hi'o maira te hoê taata ia'na, na ô maira, no ratou atoa oe na.

Ua parau atura Petero, e tera ra taata, e ere au.

E ... ua mârô maira te tahi, na ô a'era, i reira mau â teie nei taata ...

Ua parau atura Petero, e tera taata, aore au i ite i tena na parau.

E tei te parauraa'tu oia i taua parau ra, aaoa iho ra te mo'a ...

Haere atura Petero i rapae, mauuii roa a'era i te oto rahi » (Luka 22:56–60, 62).



TE MAU PARAU PORO'I

- 4** Parau poro'i na te Peresideniraa Matamua : « Ua ti'a faahou Oia »— te iteraa papû o te hoê peropheta
Na te peresideni Thomas S. Monson
- 7** Parau poro'i na te mau tuahine hahaere : A Here, a Haapa'o, e a Haapuai

TE MAU TUHAA PARAU FAUFAA RAHI

- 12** Te taraehara e te tere o te tahuti nei
Na Elder David A. Bednar
Nahea te taraehara e haapuai ia tatou ia rave e ia riro ho'i ei taata maitai e ia tavini atoa i te faito hau atu i to tatou hinaaro e to tatou aravihi.

- 20** Te mau haamaitairaa o te haapiiraa evanelia
Na Brittany Beattie

- 26** Te hoê piiraa no te hoê taata faafariuhia
Na Helena Hannonen

- 30** Te mau apooraa paroita i roto i te ohipa
Na LaRene Gaunt
O vai to roto i te apooraa paroita, e eaha te titauhia nei ia ratou ia rave?

TE MAU TUHAA FAATERE

- 8** Buka no te Amuiraa Rahi no eperera : Iriti mai i te tahi atu mau mea no roto mai i te Amuiraa Rahi
Na Michael Barber e o David Marsh

- 10** Te paraparau nei tatou no te Mesia : Te aroha Maere
Na Kristen Nicole Cardon

- 34** To tatou nohooa, to tatou utuafare : Te raveraa i te taima no te paraparau e no te faaroo
Na Rosemary M. Wixom

- 38** Te reo o te feia mo'a i te mau mahana hopea nei

- 74** Te mau parau apî no te Ekalesia

- 79** Te mau mana'o tauturu no te pureraa pô utuafare

- 80** E tae atu i te taima e farerei faahou ai tatou : Tia'iraa i roto i te taraehara
Na Bishop Richard C. Edgley

I NI'A I TE TAPO'I

I mua : *Eiaha e tapea mai Ia'u*, na Minerva Teichert, ma te fariihia e te anavaharau o Brigham Young University. I muri : *Tuhaa no te A hi'o mai na i to'u rima* na Jeff Ward



42 Ua ite te mau taata atoa ia Bleck

Na Adam C. Olson

Te here o Bleck i te taoraraa popo i roto i te ete, ua riro ia ei tamataraa e ei haamaitairaa.



A hi'o na e ti'a anei ia outou ia ite i te Liahona i hunahia i roto i teie ve'a. Tauturu : api no te ma'iti i te maitai.

46 Te mau uiraa e te mau pahonora
No te aha e mea titau ia'u ia haere i te haapiiraa evanelia inaha ho'i e, e nehenehe ta'u iho e tai'o i te mau papa'iraa mo'a ?

48 No te aha te haapiiraa evanelia ?
E hitu peropheta tei paraparau no ni'a i te mau haamaitairaa o te haapiiraa evanelia.

50 Te haapiiraa evanelia i roto i te uru raau no Ecuador
Na Joshua J. Perkey
E mea nahea te haapiiraa evanelia i roto i te hoê amaa apî e te rahiraa taata faafariu apî i te faa'iraa i te feia apî i te iteraa papû, te ite e te faaroo.


52 Eaha to muri iho i te haapiiraa evanelia ?
Na David A. Edwards

53 Reni i ni'a i te reni :
2 Timoteo 3:16-17

54 Eiaha e faaru'e
Na Adam C. Olson
Na te tahi aupuru iti e te tahi faaineineraa iti ho'i e arai i te mau fifi rarahi a muri a'e.

57 Hoho'a pia : A tomo i roto i te mau papa'iraa mo'a

48



58 Taime paraparauraa
Na Hilary Watkins Lemon

61 Ua ofati oia i te mau tapea o te pohe
Na Elder Patrick Kearon
Ua pohe te Faaora e ua ti'a faahou mai, ia ti'a hoi ia tatou ia ora faahou i piha'i iho i to tatou Metua i te Ao ra e to tatou utuafare.

62 Te afa'iraa mai i te paraimere i te fare nei : Te haapii mai nei Iesu Mesia ia'u ia ma'iti i te maitai

64 Pehe : Te tamata nei au ia riro mai ia Iesu
Na Janice Kapp Perry

66 Tuahine i te i'oa e i te faaroo
Na Heather Wrigley
Ua faaite te mau tuahine i Roumanie e mea nahea ratou i te haapuai i to ratou faaroo.

68 Ite taa ê : Eaha te ti'a ia'u ia rave no te pee i te faanahoraa a te Metua i te Ao ra no'u ?
Na Elder Richard G. Scott

69 Ta'u mau faatureraa no te evanelia.

70 Na te mau tamarii apî

81 Te mau taata no te papa'iraa mo'a i roto te Buka a Moromona



Ve'a haamanahia na te ao taatoa nei a te Ekalesia a Iesu Mesia i te Feia Mo'a i te mau Mahana Hopea nei

Te Peresideniraa Matamua : Thomas S. Monson, Henry B. Eyring, Dieter F. Uchtdorf

Te Pūpū no te Tino Ahuru ma Piti Aposetolo : Boyd K. Packard, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Papa'i ve'a faatere : Paul B. Pieper
Feia tauturu e haamaramarama : Keith R. Edwards, Christoffel Golden Jr., Per G. Malm

Faatere no te mau ve'a : David L. Frischknecht
Faatere no te mau papa'i ve'a : Vincent A. Vaughn
Faatere no te mau nana'oraa : Allan R. Loyborg

Faatere no te mau papa'iraa : R. Val Johnson
Mau tauturu no te faatere no te mau papa'iraa : Jennifer L. Greenwood, Adam C. Olson
Tauturu papa'i ve'a faatere : Susan Barrett, Ryan Carr
Te mau papa'i ve'a : Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekir, Joshua J. Perkey, Chad E. Phares, Jan Pinborg, Paul VanDenBerghe, Marissa A. Widdison, Melissa Zenteno

Faatere no te mau hoho'a : J. Scott Knudsen
Faatere i te mau Ohipa Peniraa : Scott Van Kampen
Faatere no te hamaniraa : Jane Ann Peters
Faatere no te faanahoraa : C. Kimball Bolt, Thomas S. Child, Colleen Hinckley, Eric P. Johnsen, Scott M. Mooy,
Pūpū no te hamaniraa : Collette Nebeker Aune, Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Gayle Tate Rafferty
Auraa e te mau ve'a : Jeff L. Martin

Faatere no te nene'iraa : Craig K. Sedgwick
Faatere no te opereraa : Evan Larsen

No te mau tapa'oraa e te mau moni hoo i rapae au i te Fenua Marite e Canada, a farerei i te faatere no ta outou Pū hooraa buka aore rā te faatere no te paroita aore rā amaa.

A hapono i te mau api parau e te mau aniraa na ni'a i te itenati i te liahona.lds.org; na roto i te imere i te liahona@ldschurch.org; e aore rā, na roto i te rata i te Liahona, Rm. 2420, 50 E. North Temple St., Salt Lake City, UT 84150-0024, USA.

Ua nenehia te Liahona (te hoē parau no te Buka a Moromona, oia hoi, « aveia » aore rā « arata'i ») na roto i te mau reo Albania, Armenia, Bislama, Bulgaria, Cambodia, Cebuano, Tinito, Croatia, Czech, Danemata, Holane, Paratane, Estonia, Fiji, Finniliane, Farani, Purutia, Heleni, Hindi, Hungarian, Icelani, Indonesia, Italia, Tapone, Kiribati, Korea, Latvia, Lithuania, Malagasy, Marshallese, Mongolia, Norwetia, Polane, Potiti, Romania, Russia, Samoa, Slovenia, Paniora, Tuete, Tagalog, Tahiti, Thai, Tonga, Ukraina, Urdu, e Anami. (Te rahiraa taime e nenehia ai tei te huru ia o te reo)

© 2012 na Intellectual Reserve, Inc. Faturaa paruruhia. Nene'ihia i te Mau Hau Amui no Marite.

E nehenehe te mau papa'iraa e te mau hoho'a i roto i te Liahona ia tapitihia no te faaohiparaa i roto i te Ekalesia aore rā i te utuafare eiaha rā no te hoo. Eita te mau hoho'a e nehenehe e tapitihia mai te mea te vai nei te mau haaviraa i roto i te reni faaiteraa no te hoho'a. E tia i te mau aniraa no te parau faturaa ia faataehia i te Intellectual Property Office, 50 E. North Temple St., Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada
April 2012 Vol. 14 No. 1. LIAHONA (USPS 311-480) Tahitian (ISSN 1521 4761) is published four times a year (April, May, October and November) by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$4.00 per year; Canada, \$4.80 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Te tahi atu i ni'a i te itenati Liahona.lds.org



NA TE FEIA PAARI

E rave rahi papa'iraa i roto i teie ve'a o te haapii ra e o te faaita papū ra no ni'a i te Faaora. A apo hau atu no ni'a la'na i ni'a i te itenati **JesusChrist.lds.org**.

NA TE FEIA APĪ

E rave rahi papa'iraa i roto i teie ve'a o te paraparau nei no ni'a i te mau haamaitairaa o te haapiiraa evanelia (a hi'o i te mau api 20–25 e 46–53). No te apo mai i te mau mea hau atu, a haere i ni'a i te itenati **seminary.lds.org**.

NA TE MAU TAMARII

No te faaroo i te himene ra « Te tamata nei au ia riro mai ia Iesu » (a hi'o i te mau api 64–65), a haere i ni'a i te itenati **liahona.lds.org**.


TE MAU PARAU TUMU I ROTO I TEIE VE'A

Te faahoho'a ra te mau numera i te api matamua no teie aamu.

- Amuiraa rahi, 8**
- Aparauraa, 34, 58**
- Aroha, 10, 12**
- Buka a Moromona, 38**
- Faaineineraa, 54**
- Faururuaa, 39, 40**
- Haapa'oraa i te ture, 54**
- Haapiiraa evanelia, 20, 46, 48, 50**
- Haapiiraa evanelia na te feia api paari, 52**
- Iesu Mesia, 4, 10, 12, 61, 64, 70**
- Ohipa Misionare, 42**
- Pehe, 26, 64**
- Pure, 41**
- Taraehara, 4, 12, 61, 62, 80**
- Te mau apooraa, 30**
- Te mau piiraa o te Ekalesia, 26, 30**
- Ti'a-faahou-raa, 4, 61, 62, 70**
- Tia'iraa, 80**
- Tuatapaparaa i te papa'iraa mo'a, 53, 57, 68**
- Utuafare, 34, 42, 58, 66**

I ROTO I TO OUTOU REO

Te vai nei te Liahona e te tahi atu mau materia a te Ekalesia na roto i te mau reo e rave rahi i **www.languages.lds.org**.

Na te peresideni
Thomas S. Monson

«Ua ti'afaahou Oia»

TE ITERAA PAPÛ O TE HOÊ PEROPHETA

«**T**e piiraa pû o te Aukeretetiano», te parau ia a te Peresideni Thomas S. Monson, maori râ, ua ti'a mai o Iesu no Nazareta mai te pohe mai. Na te parau mau o te Ti'a-faahou-raa e horo'a i te mau taata atoa i te hau eita e taea e to tatou ite. (a hi'o Philipi 4:7).¹

I roto i te mau faahitiraa parau i muri nei, te faaite nei te Peresideni Monson i to'na iteraa papû e to'na maururu i te Ti'a-faahou-raa o te Faaora ma te parau e, no to te Tamaiti upoot'iaraa i ni'a i te pohe, e ora faahou ai te mau tamarii paatoa a te Metua tei haere mai i ni'a i te fenua nei.

Te oraraa i o atu i te tahuti nei

«Te ti'aturi nei au e, aore hoê o tatou e nehenehe e feruri i te faufaa rahi o te ohipa ta te Mesia i rave no tatou i Getesemane, tera râ, te maururu nei au i te mau mahana atoa o to'u oraraa no Ta'na tusia tarachara no tatou.

Tae roa'tu i te taima hopea, e nehenehe â Ta'na e otohe. Aita râ oia i na reira. Ua pou râ Oia i raro a'e i te mau mea atoa ra ia ti'a Ia'na ia faaora i te mau mea atoa ra. a horo'a mai Oia i te ora ia tatou nei i muri a'e i teie oraraa tahuti. Ua faaora oia ia tatou i te Hi'araa o Adamu.

Te maururu nei au Ia'na i roto roa i te pãpã o to'u aau. Ua haapii mai Oia ia tatou nahea ia ora. Ua haapii mai oia ia tatou nahea ia pohe. Ua paruru oia i to tatou faaoraraa». ²

Te tiahiraa i te poiri o te pohe

«I te tahi mau taima, i roto i te mauui rahi e te ma'i, e tae mai te pohe mai te hoê melahi o te aroha. Area râ, i te rahiraa o te taima, e parau tatou e, e enemi oia no te oaoa o te taata nei.

E nehenehe i te poiri o te pohe i te tiahihia e te ramarama o te parau mau i heheuhia mai. 'Tei Ia'u te

ti'afaahouraa e te ora', o ta te Fatu ia i parau. 'O te faaroo mai Ia'u ra, pohe noâ oia e ora ia: E te taata ora atoa nei e faaroo Ia'u ra, e ore roa'tu ia e pohe'.

«E parau papû teie—e, e haapapûraa mo'a atoa hoi—e horo'a-atoa-hia te hau i fafauhia e te Faaora no te oraraa i raro atu i te menema a haapapû ai Oia i Ta'na ra mau pîpî e : 'E hau Ta'u e vaiiho ia outou nei, o To'u nei hau Ta'u e ho-atu no outou nei; e ere mai ta to te ao nei horoa Ta'u i horoa ia outou. Eiaha e taiâ to outou aau, eiaha hoi e mätta'u'». ³

Aore Oia i ô nei

«Ua ora faahou mai to tatou Faaora. Ua tupu te ohipa hanahana roa a'e e te mahanahana e te maru i roto i te aamu o te taata nei—te rê i ni'a i te pohe. Ua tumâhia te oto e te mauui o Getesemane e o Kalavaria. Ua haapapûhia te faaoraraa o te taata nei. Ua tamâhia te hi'araa o Adamu.

Aita e taata i roto i te menema i taua poipoi pasa ra ei pahonora i te uiraa a Ioba ra, 'a pohe te taata nei, e ora faahou anei?' Ei ia outou atoa na e faaroo mai nei i to'u reo, te parau atu nei au e, ia pohe te taata nei, e ora faahou â oia. Ua ite tatou, no te mea, tei ia tatou nei te ramarama o te parau mau i heheuhia mai ...

E au mau taea'e e au mau tuahine here, i roto i to tatou mau hora ahoaho rahi, e roaa ia tatou te hau rahi mai roto mai i te mau parau a te melahi i taua poipoi pasa ra : 'Aore Oia i ônei, ua ti'a faahou a'enei ia'». ⁴

E ora faahou te mau taata atoa

«E ata tatou, e ta'i tatou, e rave tatou i te ohipa, e ha'uti tatou, e here tatou, e ora tatou. E i muri iho e pohe tatou ...

E vai pohe noa tatou ahiri e aita hoê Taata e Ta'na misioni, oia hoi o Iesu no Nazareta ...



Ma to'u aau atoa e to'u varua, te faateitei nei au i to'u reo no te faaite papû i roto i to'u ti'araa ei ite taa ê e te parau nei au e, te ora nei te Atua. O Iesu Ta'na Tamaiti, te Fanau Tahī a te Metua i te tino nei. Oia to tatou Taraehara. Oia to tatou arai i mua i te Metua. Oia o tei pohe i ni'a i te satauro ei taraehara no ta tatou mau hara. Ua riro Oia ei oho matamua no te Ti'a-faahou-raa. E no te mea ua pohe Oia, e ora faahou te mau taata atoa ».⁵

Hoê iteraa papû no te taata iho

« Te faaite nei au i to'u iteraa e, ua vî te pohe, ua noaa mai te re i ni'a i te menema. Ia riro Ta'na mau parau mo'a Ta'na i faatupu ra ei iteraa no te mau taata atoa. A haamana'o i te reira. A poihere i te reira. A faatura i te reira. *Ua ti'afaahou Oia.* »⁶ ■

TE MAU NOTA

1. « Ua ti'afaahou Oia », *Liahona*, Eperera 2003, 7.
2. « I te Taa-ê-raa », *Liahona*, Me 2011, 114.
3. « Teie Te Taime », *Liahona*, Tenuare 2002, 68; a hi'o atoa Ioane 11:25–26; 14:27.
4. « Ua ti'a-faahou Oia ! », *Liahona*, Me 2010, 89, 90; a hi'o atoa Ioba 14:14; Mataio 28:6.
5. « Ua ite au e te ora nei to'u Faaora! » *Liahona*, Me 2007, 24, 25.
6. *Liahona*, Eperera 2003, 7.

HAAPIIRAA NO ROTO MAI I TEIE PARAU PORO'I

Ia hope te faaiteraa i te mau faahitiraa parau no roto mai i te parau poro'i a te Peresideni Monson, a hi'o i te iteraa papû ta'na i faaite no ni'a i te auraa mau o te Pâta. E nehenehe ta outou e ui i te mau melo o te utuafare i teie mau uiraa i muri nei: « I to outou mana'oraa, no te aha te hoê peropheta ora i faaite papû mai ai i teie mau parau mau i teie anotau ? Nahea e ti'a ai ia outou ia faaohipa i te reira i roto i to outou oraaa ? » A feruri ia amui atoa'tu i to outou iteraa papû.

FEIA APĪ

E ite faahou vau ia'na

Na Morgan Webecke

Ua imi o papa i te rave'a ia oaoa matou te mau tamarii. Ua here oia ia matou e e faaore ohie noa oia i te hapa. Ua imi oia i te mau rave'a atoa ia oaoa ihoa matou, e ua faaite papū maitai mai oia e, te imi ra oia i te mea maitai roa a'e no matou. Ua here roa vau ia'na.

Tei roto vau i te piha ono, a pohe ai to'u metua tane i roto i te hoê ati purumu. Ua ati roa to'u utuafare e o vau nei ho'i. Ua vai te hoê apoo rahi i roto i to matou utuafare. O papa te taata ta'u e turu'i atu, oia te taata ta'u e haere e farerei mai te mea e, e fifi to'u. Aita vau i imi i te tauturu, ua vaiho râ vau i te riri e te inoino i te haere rahi noa. I te pae hopea ua faaoti au e, na te Atua te hape. Ua faaea vau i te tai'o i ta'u mau papa'iraa mo'a e i te pure atoa ho'i. Ua haere au i te pureraa na roto noa i te hinaaro o mama. Ua tamata vau i te faaea i te atea ê roa i to'u Metua i te Ao ra.

I muri iho ua haere au i te hoê puhaparaa na te feia apĪ

tamahine no te taime matamua roa. Ua oaoa vau i te fare-reiraa i te mau hoa apĪ, tera râ, aita hoa vau e tai'o i ta'u mau papa'iraa mo'a. I te pō hopea, ua faatupuhia te hoê pureraa iritiraa mana'o. Ua ite a'era vau i te hoê mea aita vau i ite faahou a'enei e mea maoro i teie nei : te Varua. Ua faahiahia vau i te mau tamahine tei ti'a mai i ni'a e tei faaite mai i to ratou iteraa papū, tera râ, ua parahi noa vau i raro i te mea e, ua feruri au e, aita to'u e iteraa papū. I te taie a'era i te hoê taime, ua tupu te hinaaro rahi i roto ia'u ia ti'a i ni'a. Ua hamama a'era vau i to'u vaha, ma te feruri e, eaha râ te mea e parau. No reira, ua parau atura vau e, ua maururu vau no te puhaparaa a te feia apĪ tamahine. E i muri iho, ua parau atura vau e, ua ite au e, ua pohe o Iesu Mesia no'u e ua here to'u Metua i te Ao ra ia'u e e Ekalesia mau teie.


Ua faa'ihia vau i te hoê hau faahiahia. Ua maururu vau no teie ohipa i tupu, e nehenehe ta'u e parau e, ua ite au e, e ite faahou vau i to'u papa maoti te Taraehara e te Ti'a-faahou-raa o te Faora.

TE MAU TAMARII

Te Ora nei Oia!

Te haapii nei te Peresideni Monson e, maoti Iesu Mesia i pohe e i ti'a faahou, e ora faahou tatou paatoa. A hi'o i te mau hoho'a i raro nei. A papa'i i te hoê numera i roto i te afata tata'itahi no te faaite i te ana'iraa i tupu ai teie mau ohipa.

E nehenehe i te utuafare ia vai amui noa e a muri noa'tu, no te mea, te ora nei Iesu Mesia. A papa'i i te hoê hoho'a o to outou utuafare i roto i te afata i raro.





A tai'o i teie haapiiraa na roto i te pure, e mai te mea e tano, a aparau i te reira i te mau tuahine o ta outou e hahaere ra. A faaohipa i te mau uiraa no te tauturu ia outou ia haapuui i te mau tuahine e ia faariro i te Sotaiete Tauturu ei tuhaa itoito no to outou iho oraraa.

A here, a Haapa'o, e a Haapuui

Mai te Faaora, e utuutu tata'i hoê te mau tuahine hahaere i te taata (a hi'o 3 Nephi 11:15). E ite tatou e, ua manu'ia tatou i roto i ta tatou utuuturaa ei mau tuahine hahaere, mai te mea e, e parau te mau tuahine e: (1) te tauturu nei te tuahine hahaere ia'u ia tupu i te rahi i te pae varua; (2) ua ite au e, te atuatu maitai nei to'u tuahine hahaere ia'u e i to'u utuafare; e (3) mai te mea e, e fifi to'u, ua ite au e, e rave to'u tuahine hahaere i te hoê ohipa ma te tia'i ore ia anihia'tu oia.¹

Ei mau tuahine hahaere, nahea e ti'a ai ia tatou ia here, ia haapa'o, e ia haapuui i te hoê tuahine? Teie i raro nei e iva mana'o tauturu tei itehia mai i roto i te pene 7 o te buka *E mau Tamahine i roto i To'u Basileia: Te Aamu e te Ohipa a te Sotaiete Tauturu* no te tauturu i te mau tuahine hahaere ia utuutu i ta ratou mau tuahine :

- A pure no'na e to'na utuafare
- A imi i te faaururaa no te haamatau ia'na e to'na utuafare.
- A hahaere tamau ia'na no te ite eaha to'na huru e no te tamahanahana e no te haapuui ia'na.
- A farerei tamau noa ia'na na roto i te mau tere, te mau niuniu, te mau rata, te rata itenati, te mau poro'i niuniu, e te mau ohipa iti maitai.
- A farii ia'na i te mau pureraa a te Ekalesia.
- A tauturu ia'na ia roohia oia i te ati rû, te ma'i aore râ te tahi atu hinaaro rû.
- A haapii ia'na i te evanelia i roto i te mau papa'iraa mo'a e te mau parau poro'i a te tuahine hahaere.
- A faauru ia'na na roto i te horo'araa i te hoê hi'oraa maitai.



- A faaite atu i te hoê faatere no te Sotaiete Tauturu no ni'a i ta ratou taviniraa e te oraraa maitai o te tuahine i te pae varua e te pae tino.

No roto mai i te mau papa'iraa mo'a

Luka 10:38–39; 3 Nephi 11:23–26; 27:21

TE MAU NOTA

1. A hi'o Julie B. Beck, « Ta'u e hinaaro nei ia ite ta'u mau mootua tamahine (e mau mootua tamaroa) no ni'a i te Sotaiete Tauturu », *Liahona*, Novema 2011, 113.
2. *E Mau Tamarii Tamahine i roto i To'u Basileia : te Aamu e te Ohipa a te Sotaiete Tauturu* (2011), 112.
3. *E Mau Tamarii Tamahine i roto i To'u Basileia* 119–20.
4. Brigham Young, « Remarks », *Deseret News*, 15 no Atopa 1856, 252.
5. A hi'o *E mau tamarii tamahine i roto i To'u Basileia*, 36–37.

Eaha ta'u e nehenehe e rave ?

1. Nahea vau e ite ai eaha te hinaaro o to'u mau tuahine ?
2. Nahea to'u mau tuahine e ite ai e, te mana'ona'o puai nei au ia ratou ?

Te Faaroo,
Te Utuafare,
Te Totauturu

No roto mai i to tatou aamu

« Ua riro mai te hahaereraa a te mau tuahine ei rave'a na te mau vahine Feia Mo'a i te mau Mahana Hopea nei na te ao taatoa no te here, te atuatu, e te taviniraa—mai te au i 'tau mau mana'o here ta te Atua i tanu i roto i to outou mau ouma', mai ta Iosepha Semita i haapii ».²

Teie te parau a te hoê tuahine aita i maoro a'enei te riroraa ei vahine ivi, no ni'a i to'na mau tuahine hahaere: « Ua faaroo raua. Ua tamahanahana raua ia'u. Ua ta'i raua e o vau nei. E ua tauahi raua ia'u. ... [e] ua tauturu ia'u ia haere mai i rapae i te hepohepo e te paruparu o taua mau ava'e matamua ra o te hoê oraraa otahi ».³

Te tautururaa i roto i te mau ohipa no te oraraa nei, o te hoê huru utuuturaa atoa ia. I roto i te amuiraa rahi no atopa 1856, ua faaraa te Peresideni Brigham Young e, te rohi mai nei te mau pionie e to ratou pereoo huti rima, i roto i te hiona e 270–370 maira (435–595 km) i te atea. Ua tiaoro oia i te Feia Mo'a i Roto Miti ia haere e faaora i taua mau taata ra, e ia « haapa'o maite i te mau mea o te pae tino ».⁴

Ua papa'i o Lucy Meserve Smith e, ua tatara te mau vahine i to ratou mau ahu roto mahahanahana e to ratou mau totini i roto noa i te fare menemene e ua apapa i roto i te mau pereoo no te faareva no te mau pionie tei toetoe roa. E i muri iho, ua haaputu ratou i te mau ro'i e te mau ahu no te mau taata e tae mai e aore rea ta ratou. I te taeraa mai o te pûpû pereoo huti rima, ua faa'ihia te hoê fare i roto i te oire « i te tauhaa no ratou ».⁵

Buka nota no te amuiraa no eperera

«Te mau mea ta'u, ta te Fatu, i parau atu ra, ua parauhia ia e au... na roto i to'u iho reo e aore râ na roto i te reo o ta'u mau tavini, hoê â ia» (PHE&PF 1:38).

Te apo-rahi-raa i te mau mea o te amuiraa rahi

Na Michael Barber e o David Marsh

Te piha toro'a no te faanahoraa haapiiraa

Noa'tu e, e parau tatou « amene » i te hopea o te tuhaa amuiraa hopea o te amuiraa rahi, eiaha te amuraa maa pae varua ia hope i reira. E roaa i te reira ia tamau â na roto i te tai'oraa tatou e te faaohiparaa ho'i i te mau haapiiraa no roto mai i te amuiraa. I roto i te mau matahiti e rave rahi, ua faaitoito mai te mau peropheta ia tatou ia rave a'e i te reira. Ei hi'oraa, i te matahiti 1946 ra, ua faaitoito te Peresideni Harold B. Lee (1899–1973) i te mau melo ia faairi i te mau a'oraa o te amuiraa « ei arata'i no to ratou haerea e ta ratou aparauraa i roto i na ava'e e ono i muri iho ». Te parau ra oia e, « Teie te mau mea faufaa ta te Fatu e hi'o nei e, ua tano ia heheu mai i to'na mau taata i teie anotau ».¹

I te matahiti 1988, ua faahiti faahou te Peresideni Ezra Taft Benson (1899–1994) i te reira a'oraa a haapii ai oia e, « I roto i na ava'e e ono i muri nei, e ti'a i ta outou

ve'a *Ensign* no te amuiraa ia vai noa i piha'i iho i ta outou mau buka papa'iraa mo'a e ia hi'o-pinepine-hia te reira ».²

A opani ai oia i te amuiraa rahi no atopa, ua haapapû faahou te Peresideni Thomas S. Monson i te faufaa o te tuatapaparaa i te mau a'oraa o te amuiraa. Ua parau oia e: « Ia haamana'o tamau noa tatou i te mau mea o ta tatou i faaroo i roto i teie amuiraa rahi. E nene'ihia te mau parau poro'i atoa o tei a'ohia mai i roto i te mau ve'a *Ensign* e te *Liahona* i te ava'e i mua. Te ani manihini nei au ia outou ia haapii i te reira e ia feruri i ta ratou mau haapiiraa ».³

A tuatapapa ai e a feruri hohonu ia outou i te mau parau poro'i o te amuiraa, eaha te ti'a ia outou ia rave no te faairi i te reira ei mea faufaa atu i roto i to outou oraraa ? Teie te



tahi mau mana'o no te tauturu ia outou ia faaineine, ia farii, e ia faa-ohipa i te mau parau faauruhia :

A faaineine no te farii i te faaururaa. Ia mataitai, ia faaroo, e aore râ, ia tai'o atu outou i te mau a'oraa o te amuiraa, e mea ti'a ia outou ia iriti i to outou aau e to outou varua i te faaururaa no te ra'i mai. Ua haapii o Elder David A. Bednar no te Pūpū no te Tino Ahuru Ma Piti Aposetolo e, noa'utu te huru o te maitai o te haapiiraa a te hoê taata, « hoê noa mea e ô ai te parau poro'i e te faaiteraa a te Varua Maitai i roto i te aau maori râ, ia farii te taata ia tomo mai te reira i roto ». Te faataa ra oia e, no te farii i te faaururaa « e titauhia te haaraa i te pae varua, i te pae feruriraa e i te pae tino, eiaha râ te tia'i-noa-raa ia tae mai ».⁴

E nehenehe i teie mau mana'o i muri nei e tauturu ia outou ia faaineine no te haapii mai na roto i te Varua :

1. A faataa i te taime e a faatupu i te hoê vahi aita te mana'o e nevaneva, i reira e ti'a ai ia outou ia farii i te mau muhumuhuraa a te varua.
2. A titau i te arata'iraa no te ra'i mai na roto i te pure.
3. A tapura i ta outou iho mau uiraa e aore râ, te mau mana'o o ta outou e titau ra i te pahonuraa.

A haroaroa i te mau parau poro'i. E haapii, e faataa, e faaitoito, e faaara e e faaite papû te mau peropheta ora e te mau aposetolo. Na te hi'o-maiteraa outou i ta ratou mau a'oraa e tauturu ia outou ia haroaroa hope roa'utu â i ta ratou parau poro'i. Teie te tahi mau rave'a maitai no te tuatapapa :

• **A ui i te mau uiraa.** Ei hi'oraa : Eaha ta te Fatu e hinaaro nei ia apo vau i roto i teie parau poro'i ? Nahea teie a'oraa e haamaitai i to'u iteraa i te hoê parau tumu o te evanelia e aore râ, i te hoê irava o te papa'iraa mo'a ? Eaha te mau aamu i faaohiphahia no te faahoho'a i te mau parau tumu o te evanelia, e eaha ta'u i apo mai i roto i te reira mau aamu ?

• **A papa'i i te hoê arata'iraa parau.** A fafa i te arata'iraa parau a te taata a'o. A tautuhaa i te a'oraa i roto i te mau tuhaa rau, e a papa'i i te hoê haapoteraa o te haapapû i te mana'o tumu i faaitehia i roto i te tuhaa tata'itahi.



A PAPA'I I TE REIRA E A FERURI HO'I I TE REIRA

« Oia atoa te mau ohipa ta tatou i ite. E riro atoa paha, no roto mai i te mau mea ta tatou i faaroo, e puta mai te hoê pereoda e aore râ, hoê paratarafa o te ô mai i roto i te pāpā o to tatou aau. Ia tupu ana'e te reira, te ti'aturi nei au e e papa'i tatou i te reira ma te feruriruri e ia maramarama tatou i te hohonuraa o to'na auraa e ia riro roa te reira ei tufaa o to tatou oraraa ».

Peresideni Gordon B. Hinckley (1910–2008), « Te Hoê Aau Haehaa e te Hoê Aau Oto », *Liahona*, Tenuare 2001, 103.

• **A imi i te mau mana'o rau i roto i te a'oraa.** A tapa'o i te mau mea mai te parau haapiiraa, te mau papa'iraa mo'a, te mau aamu, te mau faaararaa, te mau tapura, te mau iteraa papû, te mau animanihini-raa ia faaohipa, e te mau haamaitairaa i faafuhia no te haapa'oraa outou i te a'oraa.

• **A tuatapapa i te a'oraa hau atu i te hoê a'e taime.** E mea titauhia ia tuatapapa i te mau parau mau o te evanelia hau atu i te hoê taime, ei reira outou e apo mai ai i te auraa taatoa. I te mau taime atoa e tuatapapa outou, a tapa'opa'o i te mau mana'o apî i roaa mai ia outou.


A faaohipa i te mau mea ta outou i apo mai. Mai te mea

e, e tuatapapa outou i te mau a'oraa na roto i te pure, e ite outou e, e tano te poro'i i ni'a i to outou oraraa. E ite outou e nahea ia rave i te mau tauraa faufaa na roto i te uiraa i te mau uiraa mai te huru e, Eaha ta te Fatu e hinaaro ra ia'u ia rave no te mau mea ta'u i apo mai ? e Eaha ta'u i apo mai o te riro i te tauturu ia'u i roto i to'u utuafare, ta'u ohipa, e aore râ, to'u piiraa i roto i te Ekalesia ? A papa'i i te mau mana'o ia ore te reira ia mo'ehia ia outou. Mai te mea e, e na reira outou, e faauruhia outou ia ora i te mau haapiiraa e e farii ho'i outou i te mau haamaitairaa i faafuhia mai.

Te amuiraa rahi, o te taime ia e heheu mai ai te Fatu ia outou i To'na hinaaro na roto i Ta'na mau tavini. Ua haapii mai te Peresideni Spencer W. Kimball (1895–1985), « Eiaha roa te tahi atu mau papa'iraa e aore râ, te tahi atu mau buka ia vai i te hoê vairaa maitai roa i ni'a i ta outou mau pa'e-pa'e vairaa buka maori râ te mau papa'iraa mo'a a te Ekalesia—eiaha no te faahiahia te paraparauraa e aore râ, te nehenehe o te faahitiraa parau, no te mau parau tumu râ i roto i te reira o te faatoro ra i te haerea e tae atu ai i te ora mure ore ».⁵ ■

TE MAU NOTA

1. Harold B. Lee, i roto i te Conference Report, Eperera 1946, 68.
2. Ezra Taft Benson, « Come unto Christ, and Be Perfected in Him », *Ensign*, Me 1988, 84.
3. Thomas S. Monson, « E tae roa i to tatou farerei-faahou-raa », *Liahona*, Novema 2008, 106.
4. David A. Bednar, « Seek Learning by Faith », *Liahona*, Setepa 2007, 17, 20.
5. Spencer W. Kimball, *In the World but Not of It*, Brigham Young University Speeches of the Year (Me 14, 1968), 3.



No te tai'o, no te mata'ita'i, e aore râ, no te faaroo i te mau a'oraa o te amuiraa rahi, a haere i ni'a i te itenati conference.lds.org.





I ROTO I TE PUAI O TE FATU

« Na roto i te faaroo i te Fatu ia Iesu Mesia e te haapa'oraa i Ta'na evanelia, te hoê taahiraa i te taime hoê ma te haamaitai mai a haere ai tatou, ma te taparu i te puai, ma te haamaitai i to tatou huru e i to tatou hinaaro rahi, e manuia tatou i roto i te nāhā a te Tia'i mamoe Maitai. E titau te reira i te haapa'o e te haapiiraa e te ohipa e te puai. Tera râ, mai ta te Apōsetolo Paulo i parau ra, 'E ti'a ia'u te mau mea atoa nei i te Mesia, tei tauturu mai ia'u ra'. (Philipi 4:13) ».

Peresideni Howard W. Hunter (1907–95), « Developing Spirituality », *Ensign*, Me 1979, 26.

TE Aroha MAERE

Na Kristen Nicole Cardon

*Tei ni'a to'u ti'aturiraa i te aroha o Iesu Mesia
i te mau mahana atoa.*

« I roto i ta tatou mau pureraa, aita tatou e paraparau pinepine i te parau no te aroha », te parau ia a te orometua haapii evanelia no te Fare Haapiiraa Tua Toru no Brigham Young, « tera râ, tatou te mau melo o te Ekalesia a Iesu Mesia i te Feia Mo'a i te mau Mahana Hopea nei, te ti'aturi mau nei tatou i te parau no te aroha ».

Aita vau e haamana'o nei i te mau haapiiraa no te Haapiiraa Sabati a te Feia Apî Tamahine no ni'a i te aroha, tera râ, ua haamana'o vau i ta'u pūpū himene no te fare haapiiraa i te himeneraa « Amazing Grace [Te Aroha Maere] ».

*Te aroha Maere! (aue te nehenehe
o te ootooraa reo!)*

*Na te reira i faaora i te hoê taata
ati rahi mai ia'u te huru!*

*I mo'e na vau, ua itehia mai râ i
teie nei;*

*I matapo na vau, te ite nei râ vau
i teie nei.¹*

« Te aroha o te mana ia o te Atua no roto mai i te Taraehara o Iesu Mesia », te parau ia a to'u orometua haapii. « Te vahine nei au i te aroha i roto e maha mana: te ti'a-faahou-raa, te faaoraraa, te oraraa, e te haapua'iraa ». E ua haamata a'era oia

i te faataa maite i te mana tata'itahi, tera râ, ua ho'i faahou to'u feruriraa i roto i te mau mea ta'u i haamana'o.

I te hoê taime ua ratere taua pūpū himene ra no te fare haapiiraa i Californie, USA, no te tata'u i roto i te hoê ta'urua himeneraa. Ua pohehia vau i te ma'i hou te revaraa, e ua fifi to'u arapoa, te auraa ra, aita ia e ti'a ia'u ia himene i roto i te pūpū himene i roto i te ta'urua—e aore râ, mai te mea e himene au, e ere ia i te mea maitai ta'u himeneraa, e mea mauiuu atoa no'u. Ua ani au i to'u metua tane ia horo'a mai i te hoê haamaitairaa autahu'araa e ua tamau noa vau i te pure i roto i na mahana e piti no te ani i te ora.

I tera taime a himene ai au « Te Aroha maere » e to'u arapoa ora i roto i te ta'urua, penei a'e aita vau i maramarama roa i taua taime ra e, te himene ra vau no ni'a i te mana mau tei faaora ia'u hoê noa mahana na mua'itu. Ua haamaitai te Taraehara o te Faaora ia'u i taua mahana ra; no roto mai to'u ora i To'na aroha.

« E e haere atu [Iesu], ma te faaoroma'i i te mauiuu, e te ati, te mau huru faahe-maraa atoa ra; e e na reira oia ia faati'ahia te parau tei na ô mai ra e, e rave oia i te mauiuu e te mau ma'i o ta'na mau taata ia'na iho » (Alama 7:11).



I muri a'e i te haapiiraa tuarua, mai te mau piahi no te matahiti matamua e rave rahi, ua teimaha roa ta'u mau haapiiraa e tae noa'tu te fifi o te oraraa i te atea i te utuafare e te faae meta i roto i te hoê piha taоторaa e pae taata.

I reira to'u taaraa i te mana faaitoito e te puai no te aroha o te Mesia. E hope te mau mahana i te ohiparaa e te haapiiraa, tera râ, ua pure au i te mau mahana atoa ma te taparu i te Metua i te Ao ra ia horo'a mai i te aravihi ia faaoti i te ohipa i titauhia. A tere noa ai te matahiti haapiiraa, i to'u oaoa rahi, ua ite a'era vau e, na roto i te mana faaitoito e te puai o te Taraehara a te Mesia, ua nehenehe ta'u e rave maitai i te ohipa e ma te fifi ore ho'i.

« *E ti'a ia'u te mau mea atoa nei i te Mesia, tei tauturu mai ia'u ra* » (Philipi 4:13).

Noa'tu e, e mea ti'a â ia'u ia farii i te iteraa no na tuhaa e piti o To'na aroha—te ti'a-faahou-raa e te îraa o te faaoraraa—tei raro noa vau i te mana no te Taraehara o Iesu Mesia i te mau mahana atoa. Na te Aroha, te mana o te Atua no roto mai i te Taraehara o Iesu Mesia, i faaora mai ia'u e i haapuai mai ia'u. Mai te mea e, e rohi au ia haapa'o i te mau faaueraa a te Atua e ia haapa'o i To'na hinaaro, e farii ia vau i te tauturu no te ra'i mai i te hau roa'tu i to'u iho puai.

« *No roto i te aroha e ora ai tatou, hope noa'tu to tatou itoito atoa* » (2 Nephi 25:23). ■

NOTA

1. John Newton, « Amazing Grace », *Olney Hymns* (1779), no. 41.

E MEA NAHEA TE AROHA O TE FATU E FAAURU NEI I TO TATOOU ORARAA ?

E tauturu te Taea'e David A. Bednar no te Pūpū no te Tino Ahuru Ma Piti Aposetolo i te pahono i teie uiraa i roto i « Te taraehara e te tere o te tahuti nei » i roto i teie ve'a i ni'a i te api 12 :

- « Te hinaaro nei te Fatu, na roto i Ta'na Taraehara e na roto i te mana o te Varua Maitai, ia ora i roto ia tatou, eiaha no te arata'i noa ia tatou, no te haapuai atoa râ ia tatou ».
- « E mea faufaa te mana'o puai o te taata iho, te hinaaro mau e te itoito, te faanahoraa maitai e te haamauraa i te opuaraa, tera râ aita te reira e nava'i no te faaoti maitai i teie tere tahuti. Oia mau, e mea ti'a ia tatou ia ti'aturi i te 'mana, e te aroha, e te maitai hoi no te Mesia Mo'a' (2 Nephi 2:8) ».
- « Na te mana o te taraehara e haapuai ia tatou ia rave e ia riro ei taata maitai e ia tavini na ni'a atu i to tatou iho hinaaro e to tatou aravihi ».

A feruri ia papa'i i roto i ta outou buka aamu e ia faaite i to outou utuafare no ni'a i te mau taima a ite ai outou i te aroha o te Fatu i te faaoraraa, te tautururaa e aore râ, i te faaitoitoraa ia outou.



**Na Elder
David A. Bednar**

No te Pūpū no te
Tino Ahuru ma Piti
Aposetolo

Ta opuaraa rahi o te evanelia a te Faaora
ua puohuhia ïa e te Peresideni David O.
McKay (1873–1970): « Te opuaraa o te
evanelia o te ... faairoraa ïa i te taata ino ei ta-
ata maitai, e te taata maitai ei taata maitai atu, e
te tauraa ho'i i te natura o te taata ».¹ No reira,
te tere o te tahuti nei o te haereraa ïa mai te ino
i te maitai e i te maitai a'e, e te fariiraa atoa i te

Te taraehara

E TE TERE O TE TAHUTI NEI

*Na te mana o te
taraehara e haapuui
ia tatou ia rave e ia
riro ei taata maitai
e ia tavini na ni'a atu
i to tatou iho hinaaro
e to tatou aravihi.*

tauiraa rahi o te aau no te tau i to tatou huru
hi'a (a hi'o Mosia 5:2).

Ua riro te Buka a Moromona ei buka arata'i
na tatou a ratere ai tatou na ni'a i te e'a mai te
ino e haere ti'a'tu i te maitai e i te maitai a'e, e
a rohi ai tatou ia tau i to tatou aau. Ua haapii
te Arii Beniamina no ni'a i te tere o te tahuti
nei e no ni'a i te ohipa a te taraehara i roto i te
manuiaraa o taua tere ra: « No te mea te taata
tino nei, o te enemi ïa o te Atua, e e enemi
oia mai te hi'araa o Adamu mai â, e e enemi
hoi a muri e amuri noa'tu, area ia auraro oia
i te parau a te Varua Maitai, e ia faaru'e i te
mau peu a te taata tino nei, e ia riro mai ei
taata mo'a na roto i te taraehara a te Mesia
ra te Fatu » (Mosia 3:19; teiaharaa papa'i tei
ano'ihia).

Te huti nei au i to outou feruriraa i ni'a e
piti na parau taa ê. A tahi—« faaru'e i te mau
peu a te taata tino nei ». Te tere mai te ino
haere ti'a'tu i te maitai, o te faaru'eraa ïa i te
mau peu a te taata tino nei e aore râ, te vahine
tino nei i roto ia tatou. I roto i te tahuti nei, e
faahemahia tatou na te tino. Te mau materia i
hamanihia ai to tatou tino e materia hi'a ïa, e
tei raro a'e te reira i te hutiraa a te hara, a te
ino e a te pohe. Tera râ, e nehenehe ta tatou
e upootia i ni'a i te mau hinaaro o te tino e i
ni'a i te mau faahemaraa « na roto i te tarae-
hara a te Mesia ». Ia rave ana'e tatou i te mea
hape, ia ofati ana'e tatou i te ture e ia rave ho'i



i te hara, e nehenehe ta tatou ia tatarahapa e ia riro mai ei taata mâ na roto i te mana faaora o te taraehara a Iesu Mesia.

A piti—« ia riro ei taata mo'a ». Te faaite nei teie parau i te ohipa i muri iho e te piti o te tuhaa no te tere o te oraraa nei no te faaairo « i te taata maitai ei taata maitai a'e » e aore râ, e nehenehe e parau e, ia riro mai ei taata mo'a. Teie tuhaa piti o te tere, oia ho'i, teie faanahoraa no te maitai haere atu i te matai a'e, o te hoê ia tumu parau aita tatou e tuatapapa e aore râ, e haapii pinepine nei, e aita atoa e maramarama maitai nei.

Te mana'o nei au e, e rave rahi melo no te Ekalesia e mea matau a'e ratou i te parau no te huru o te mana faaora e te tamâ o te taraehara, i to'na mana haapuai. Te vai ra to tatou iteraa e, ua haere mai Iesu Mesia i ni'a i te fenua nei no te *pohe* no tatou, oia ia—o te reira te tumu e te niu mau o te parau haapiiraa a te Mesia. Tera râ, e mea titau-atoa-hia tatou ia farii e, te hinaaro nei te Fatu, na roto i To'na Taraehara e na roto i te mana o te Varua Maitai, ia *ora* i roto ia tatou—eiaha no te arata'i noa ia tatou, no te haapuai atoa râ ia tatou.

Ua ite te rahiraa o tatou e, ia rave ana'e tatou i te ohipa ti'a ore, e hinaaro tatou i te tauturu no te upootia i ni'a i te mau fifi o te hara i roto i to tatou oraraa. Ua aufau te Faaora i te hoo e ua faati'a ho'i ia tatou ia riro mai ei mea mâ na roto i To'na mana faaora. Ua maramarama papû te rahiraa o tatou e, no te feia hara te taraehara. Tera râ, aita vau i papû e, ua ite anei e ua maramarama anei tatou e, no te feia mo'a atoa te taraehara—te mau tane e te mau vahine maitai tei haapa'o, tei ti'amâ, e o te tautoo nei ia riro mai ei taata maitai a'e, e o te tavini nei ma te faaroo. Te ti'aturi hape nei paha tatou e, e mea ti'a ia tatou ia tere i to tatou tere mai te maitai e tae atu i te matai a'e e ia riro mai ei taata mo'a, na roto i to tatou iho puai, na roto i te itoito, te hinaaro mau e te haapa'o, e na roto i to tatou iho mau aravihi ha'ihai.

Te evanelia a te Faaora e ere ia no te haapae noa i te ino i roto i to tatou oraraa; no te rave râ i te maitai e no te riro atoa ei taata maitai. E e horo'a mai te taraehara ia tatou i te tauturu no te upootia e te haapae i te ino e no te rave e te riro ei taata maitai. E roaa te tauturu a te

Faaora ra no te tere taatoa o te tahuti nei—mai te ino haere atu i te maitai e mai te maitai haere atu i te maitai a'e, e no te tau i atoa i to tatou huru mau.

Aita vau e parau atu nei e, te mana faaora e te mana faatupu o te taraehara, e piti ia na mea taa ê e te ite-ore-hia. Te parau atu nei râ vau e, teie na huru e piti o te taraehara, ua tu'ati noa raua, e e paturu te tahi i te tahi; ua titauhia raua too-piti atoa ia ohipa i roto i te mau tuhaa atoa no te tere o te oraraa nei. E faufaa mure ore no tatou ia ite e, teie na mea *toopiti* o te tere o te tahuti nei—te faaru'eraa i te taata tino e te riroraa ei taata mo'a, te upootiaraa i ni'a i te ino e te riroraa ei taata maitai—e ravehia te reira na roto i te mana o te taraehara. E titauhia te mana'o puai, te hinaaro mau e te anaanatae, te faanahonahoraa maitai e te haamauraa i te opuaraa, tera râ, eita e ravai te reira no te faaoti i teie tere tahuti. Oia mau, e mea ti'a ia tatou ia turu'i i ni'a i « te mana, e te aroha, e te maitai hoi no te Mesia Mo'a » (2 Nephi 2:8).

Te aroha e te mana faatupu o te taraehara

I roto i te faatoro Bibilia te haapii nei tatou e, ua faaohipa-pinepine-hia te parau *aroha* i roto i te mau papa'iraa mo'a no te tatara i te mana faatupu :

« [*Aroha* o te hoê ia] parau o te ite-pinepine-hia i roto i te Faufaa Apî, i roto ihoa râ i te mau papa'iraa a Paulo. Te mana'o tumu o te reira parau maori râ *te mau rave'a hanahana no te tauturu e aore râ no te puai*, tei horo'ahia mai na roto i te maitai e te here rahi o Iesu Mesia.

« Na roto i te aroha o te Fatu ia Iesu, tei tupu na roto i to'na tusia taraehara, e ti'a faahou ai te taata nei i roto i te tahuti ore, ma te farii te taata atoa i to ratou tino mai roto mai i te menema no te hoê oraraa e a muri noa'tu. *E mea na roto atoa i te aroha o te Fatu*, na roto i te faaroo i te taraehara a Iesu Mesia e te tatarahapa i ta ratou mau hara, e *farii ai te taata i te puai e te tauturu no te rave i te ohipa maitai, o te ore roa e ti'a ia ratou ia rave mai te mea e, na roto noa i ta ratou mau rave'a. Teie aroha, o te mana faatupu ia o te faati'a i te tane e te vahine ia roaa te ora mure ore e te faateiteiraa, i muri a'e i ta ratou mau tautooraa atoa ».²*

O te aroha te tauturu no te ra'i mai o ta tatou tata'itahi e titau nei no te tomo i roto i te basileia tiretiera. No reira, na te mana faatupu o te taraehara e haapuai ia tatou ia rave i te maitai e ia riro ei taata maitai e ia tavini na ni'a atu i to tatou iho hinaaro e to tatou aravihi.

I roto i ta'u tai'oraa papa'iraa mo'a, e mea

a'e e te tauraa i to tatou mau huru. Ua i te Buka a Moromona i te mau hi'oraa o te mau pipi e te mau peropheta tei ite, tei maramarama, e tei tauihia ho'i na roto i te mana faatupu o te taraehara no te haere i taua tere nei. A rahi a'e ai to tatou iteraa i teie mana mo'a, e aano e e rahi atoa'tu to tatou ite i te evanelia. Na te reira e faataui ia tatou i te huru faahiahia.

O Nephi te tahi hi'oraa no te ho'e taata tei ite, tei maramarama, e tei ti'aturi i ni'a i te mana faatupu o te Faaora. Haamana'o na tatou e, ua ho'i faahou te mau tamaiti a Lehi i Ieruselema no te faa'o mai ia Isemaela e to'na utuafare i rotopu ia ratou. Ua faatupu pe'a-pe'a o Lamana e te tahi atu pae i roto i to ratou tere mai Ieruselema e ho'i atu i roto i te medebara, e ua faaitoito o Nephi i to'na mau taea'e ia faatupu i te faaroo i te Fatu. I taua taime ra o to ratou tere, ua taamuamu te mau taea'e o Nephi ia'na i te taura e ua opua e haapohe ia'na. A hi'o na i te pure a Nephi: « E te Fatu e, mai te au i to'u faaroo, o tei roto ia oe ra, e faaora oe ia'u i te rima o to'u na tuaana; oia ia, a horo'a mai hoi oe i



Aita o Nephi i pure no te ani ia tauihia to'na vairaa. Ua pure râ oia no te ani i te puai no te tau i to'na vairaa.

pinepine au i te papa'i i te parau ra « mana faatupu » i te mau taime atoa e ite au i te parau ra *aroha*. A hi'o i teie irava ta tatou paatoa i matara maitai: « Ua ite hoi tatou e, na roto i te aroha e ora'i tatou, hope noa'tu to tatou itoito atoa » (2 Nephi 25:23). Te ti'aturi nei au e, e rahi to tatou ite i teie huru o te taraehara mai te mea e, e papa'i tatou « mana faatupu e te haapuai » i te mau taime atoa e ite tatou i te ta'o ra *aroha* i roto i te mau papa'iraa mo'a.

Faahoho'araa e te tuuraa

Te tere o te tahuti nei, o te haereraa ia mai te ino haere atu i te maitai e i te maitai

te puai ia'u ia tatara i teie nei taura i ruuruuhia'i au nei ra » (1 Nephi 7:17; teiaharaa papa'i tei ano'ihia).

Ua ite anei outou e, eaha ta'u e pure ahiri e, o vau tei ruuruuhia e to'u mau taea'e? « A tatara na ia'u i rapae i teie fifi I TEIE NEI! » E mea taa e mau ia'u i te mea e, aita o Nephi i pure no te ani ia tauihia to'na vairaa. Ua pure râ oia no te ani i te puai no te tau i to'na vairaa. E te ti'aturi nei au e, i na reira oia i te pure no te mea ua ite oia, ua maramarama oia e ua farii a'ena oia i taua mana faatupu ra no te taraehara.

Aita vau e mana'o nei e, ua topa noa te mau taura i ruuruuhia ai o Nephi i to'na

rima e i to'na fatiraa rima, na roto i te hoê huru manamana. Te feruri nei râ vau e, ua horo'ahia mai te puai taa ê ia'na hau atu i te puai o te natura taata, i ti'a ai ia'na, i roto « i te puai o te Fatu » (Mosia 9:17) ia tatara, ia taviri e ia huti, e ia tumutu i te mau taura.

E mea papû maitai te auraa o teie aamu no tatou tata'itahi. A ma-ramarama maitai ai tatou e a faaohipa ho'i tatou i te mana faatupu o te taraehara i roto i to tatou oraraa, e pure tatou e e imi ho'i tatou i te puai no te tau i to tatou vairaa, e eita atura tatou e pure no te ani ia tauihia to tatou vairaa.

E riro mai tatou ei mau taata o te ohipa aita atura ei mau mea e faaohipahia ra (a hi'o 2 Nephi 2:14).

A rave na tatou i te hi'oraa i roto i te Buka a Moromona a hamani-ino-hia ai o Alama e to'na mau taata na Amulona. Ua tae maira te reo o te Fatu i teie mau taata maitai roa i roto i to ratou ra ati e na ô mai ra :

« E na'u hoi e haamâmâ i te mau hopoia teiaha i tuuhia i ni'a i to outou taponono, eita roa o to outou taponono e mauuii ...

E inaha, i haamâmâhia ihora te mau hopoia i tuuhia mai i ni'a iho ia Alama e to'na ra mau taea'e; oia i'a; *na te Atua ratou i faaitoito*, i ti'a'i ia ratou i te faaoromai i te mau ati ma te paruparu ore, e ua auraro ihora ratou ma te aau tae e te faaoromai i te hinaaro atoa o te Fatu ». (Mosia 24:14–15 ; teiaharaa papa'i tei ano'ihia).

Eaha te mea i tauihia i roto i teie aamu ? E ere te hopoia tei tauihia; aita te mau tauiraa e te mau fifi o te hamani-ino-raa i tataraoioi-hia i ni'a i te taata. Ua haapuaihia râ Alama e to'na mau taata, e no te faarahi-raahia to ratou puai i mâmâ ai ta ratou hopoia. Ua haapuaihia teie mau taata maitai na roto

i te taraehara no te *rave* ei mau ti'a e no te *haa* i ni'a i to ratou vairaa. E i roto « i te puai o te Fatu » ua arata'ihia Alama e to'na mau taata i te vahi hau i roto i te fenua no Zalahemela.

E uiui paha outou ma te ti'a e, « Eaha te mea i fariro i te aamu o Alama e to'na mau taata ei hi'oraa no te mana faatupu



o te taraehara ? » E itehia te pahonora a i roto i te hoê faaauraa i te Mosia 3:19 e te Mosia 24:15.

« E ia faaru'e i te mau peu a te taata tino nei, e ia riro ei taata mo'a na roto i te taraehara a te Mesia ra te Fatu, e *ia riro hoi mai te tamarii ra i te marû, e i te mamahu, e i te haehaa, e i te faaoromai, e i te i i te aroha, e ma te hinaaro ia auraro i te mau mea atoa ta te Fatu* e hinaaro ia tuu i ni'a ia'na, mai te tamarii e aurao hoi i to'na ra metua » (Mosia 3:19 ; teiaharaa papa'i tei ano'ihia).

A haere ai tatou i mua i roto i te tere o te tahuti nei mai te ino e haere atu i te maitai e i

Ua tae maira te reo o te Fatu ia Alama e i to'na mau taata i roto i to ratou ati e ua parau maira: « E na'u hoi e haamâmâ i te mau hopoia teiaha i tuuhia i ni'a i to outou taponono, eita roa o to outou taponono e mauuii ».

te matai a'e, e ia faaru'e tatou i te mau peu a te tata tino nei i roto ia tatou tata'itahi, e ia rohi tatou ia riro ei feia mo'a e ia tauihia ho'i to tatou huru mau, ei reira te mau huru i faataahia i roto i teie irava e faaite papû ai i te huru taata ta outou e ta'u e riro mai. E rahi atu to tatou rirora mai te tamarii te huru, to tatou faahaehaaraa, to tatou faaoromai e to tatou hinaaro mau ia auraro.

I teie nei, a faaau i teie mau huru i roto i te-Mosia 3:19 i te mau huru i faaohipahia no te faataa i te huru o Alama e to'na mau taata : « E ua auraro ihora ratou ma te aau tae e *te faaoromai i te hinaaro atoa o te Fatu* » (Mosia 24:15 ; teiahararaa papa'i tei ano'ihia).

Te mana'o nei au e, e mea faahiahia roa te faaauraa i faaitehia i roto i teie mau irava, e te faaite atoa nei te reira e, ua riro mai te mau taata maitai o Alama ei mau taata maitai a'ena roto i te mana faatupu o te taraehara a te Mesia te Fatu.

A hi'o na tatou i te aamu o Alama e o Amuleka i roto i te Alama 14. I roto i teie fifi, e rave rahi Feia Mo'a faaroo tei haapohehia na roto i te auahi, e ua tapeahia teie na tavini o te Fatu i roto i te fare auri e ua tairihia. A hi'o na i teie taparuraa i pûpûhia e Alama a pure ai oia i roto i te fare tapearaa : « E te Fatu, *ia horo'a mai oe i te mana na maua* mai te au i to maua faaroo, o tei roto i te Mesia, e ora'i » (Alama 14:26 ; teiahararaa papa'i tei ano'ihia).

I ô nei â te ite faahou nei tatou i te maramarama e te ti'aturi o Alama i te mana faatupu o te taraehara i roto i ta'na aniraa. E a hi'o na i te hopearaa o teie pure :

« E ua fati ihora ia raua te mau taura i ruuru-hia'i raua ra; e ite a'era te feia i te reira, ua haamata ihora ratou i te horo, i roohia hoi ratou i te mata'u i te pohe ...

E tae maira Alama raua o Amuleka i rapae au i te tapearaa, aita roa o raua e ino; i horo'a mai hoi *te Fatu i te mana ia raua* mai te au i to raua faaroo, o tei roto i te Mesia » (Alama 14:26, 28 ; teiahararaa papa'i tei ano'ihia).

Te ite faahou nei â tatou i te mana faatupu a aro ai te mau taata maitai i te ino e a tautoo ai ia riro mai rarou ei taata maitai a'e e ia tavini maitai a'e « i roto i te puai o te Fatu ».

Teie â te tahi atu hi'oraa faufaa no roto mai i te Buka a Moromona. I roto i te Alama 31, te

arata'i nei o Alama i te hoê pûpû no te haere e faaho'i mai i te mau Zorama taiva, tei patu i ta ratou Rameumepitoma, e ua pûpû i te hoê pure papa'ihia e te te'ote'o.

A hi'o na i te taparuraa no te puai i roto i te pure a Alama : « E te Fatu, ia faaitoito mai oe ia'u, *ia ti'a ia'u*, i te faaoromai ma te haamahu i teie mau ati e tae mai i ni'a ia'u, no te ohipa ino a teie nei feia » (Alama 31:31 ; teiahararaa papa'i tei ano'ihia).

Ua pure atoa o Alama ia faarii to'na mau hoa misionare i te reira haamaitairaa : « Ia faaitoito mai oe ia ratou *ia ti'a ia ratou* i te faaoromai i to ratou mau ati te tae mai i ni'a ia ratou no te ohipa iino a teie nei feia » (Alama 31:33 ; teiahararaa papa'i tei ano'ihia).

Aita o Alama i pure no te ani ia iritihia to'na mau ati. Ua ite oia e, e ti'a oia no te Fatu, e ua pure oia no te ani i te mana no te haa e no te arata'i i te ohipa e tupu ra i ni'a ia'na.

Te vahi faufaa roa o teie hi'oraa tei roto ia i te irava hopea o te Alma 31 : « Ua faaitoito mai [te Fatu] ia ratou ia ore ia roohia i te hoê ati, *maori râ o tei horomihihia i roto i te oaoa i te Mesia ra*. E teie nei, ua au teie i te pure a Alama ra ; e ua na reirahia ia, no te mea i pure oia ma te faaroo » (irava 38 ; teiahararaa papa'i tei ano'ihia).

Aita te mau ati i tatarahia. Ua faaitoitohia râ o Alama e to'na mau hoa e ua haamaitaihia na roto i te mana faatupu o te taraehara « ia ore ia roohia i te hoê ati, maori râ o tei horomihihia i roto i te oaoa i te Mesia ra ». Aue ia haamaitairaa nehenehe. E aue ia haapiiraa nehenehe e ti'a ia tatou tata'itahi ia apo.

E ere i roto ana'e i te mau papa'iraa mo'a e itehia ai te mana faatupu. Ua fanauhia o Daniel W. Jones i te matahiti 1830 i Missouri, e ua tomo mai oia i roto i te Ekalesia i Californie i te matahiti 1851. I te matahiti 1856 ua amui atu oia i roto i te ohipa faaoraraa i te mau pûpû pereoo huti rima tei mau i Wyoming i roto i te vero hiona. Ia ite atu te feia faaora i te feia mo'a tei roohia i te ati, ia oti te mau tauturu i te horo'a-hia, e ia faanahohia te parau no te feia ma'i e tei paruparu no te faauta atu i Rotomiti, ua farii o Daniel e te tahi atu feia apî tamaroa ia faaea noa i reira no te tia'i i te mau tauhaa a te pûpû. Aita i rahi roa te maa e te mau tauhaa i vaiihohia mai

ia Daniel ra e i to'na mau hoa, e ua pau oioi noa ïa. Na teie faahitiraa parau no roto mai i te buka aamu o Daniel Jones e faataa mai i te mau mea tei tupu.

« Ua varavara roa te animara oviri e aita roa hoê mea ta matou e nehenehe e taparahi. Ua amuhia e matou te taatoaraa o te i'o puua faito hopea roa; e poia te taata e amu i te reira. E i te pae hopea, ua pau te mau mea atoa, aita hoê mea toe faahou maori râ te mau iri animara. Ua tamata matou i te amu i te reira. E rave rahi tei tunuhia e tei amuhia ma te faanoanoa ore e ua ma'ihia te taatoaraa o te pūpū taata ...

Ua fifi roa matou, aita hoê mea toe faahou maori râ te mau iri ota o te mau puatoro pohe poia. Ua ani matou i te Fatu ia faaite ia matou i te ohipa e rave. Aita te mau taea'e i amuamu, ua mana'o râ ratou e, e ti'aturi i te Atua. ... I te pae hopea ua faauruhia vau e nahea ia tatara i taua fifi ra e ua horo'a vau i te arata'iraa i te pūpū, nahea ia tunu i te reira; tutu'i e para'u i te huruhuru; na te reira e tupohe e e tamâ i te au ore o te hau'a paapaa. Ia oti ana'e i te para'u, e tunuhia i roto i te pape pihaa, e faaru'ehia te pape tei tatara i te tapau, i muri iho e horohoroimaitai-hia te iri, e tamâhia i roto i te pape toetoe, i muri iho, e haapihaa faahou e e faatoetoe, e i reira e amu ai e te tahi maa tihota i ni'a iho. E ere i te mea ohie, tera râ, aita ta matou e ohipa ê atu e nehenehe e rave, e e mea maitai a'e te reira i te pohe poia.

Ua ani matou i te Fatu ia haamaitai i to matou opu e *ia faaau ia ratou i teie maa*. ... I te taime amuraa mai te mea ra e, ua oaoa te mau taata atoa. A toru mahana aita matou i amu i te maa hou a rave ai matou i teie rave'a. Ua fana'o matou i teie maa maitai roa e ono hepetoma te maoro ».³

I roto i taua huru taime ra, e mea papû e, e pure au no te ani i te tahi atu maa e amu : « E te Metua i te Ao ra, a tono mai na Oe i te tahi manu e aore râ, i te hoê puatoro ». E mea papû e, eita vau e feruri ia pure ia haapuaihia to'u opu ia faaauhia i te maa e vai ra. Eaha ho'i ta Daniel W. Jones i ite ? Ua ite oia i te parau o te mana faatupu o te taraehara a Iesu Mesia. Aita oia i pure ia tauihia te mau mea ta'na e farerei ra. Ua pure râ oia ia faaitoitohia oia no te faaruru i te

mau mea ta'na e farerei ra. Mai ia Alama e to'na mau taata, ia Amuleka, e o Nephi i faaitoitohia, ua roaa ia Daniel W. Jones te maramarama varua no te ite e, eaha te mea e ani atu i roto i taua pure ra.

Na te mana faatupu o te taraehara a te Mesia e faaitoitohia ia tatou ia rave i te mau mea e ore roa tatou e rave na roto ia tatou iho. I te tahi taime e uiui au e, i roto i to tatou ao fana'o no te mau mahana hopea nei—i roto i to tatou ao e umu uira e te niuniu afa'ifa'i e te mau pereoo uira e te matai faatoetoe e to tatou mau fare au maitai—te haapii ra anei tatou ia ara papû i to tatou vairaa i raro a'e i te mana faatupu o te taraehara i te mau mahana atoa.

E vahine faaroo rahi e te aravihi te tuahine Bednar, e ua apo mai au i te mau haapiiraa faufaa roa no ni'a i te mana faaitoitohia no roto mai i to'na hi'oraa marû. Ua ite au i to'na faaoromai rahi i roto i to'na mau ma'i tamau o te poipoi—ma'i papû i te mahana taatoa i na ava'e e va'u—i te taime no to'na na hapuraa tata'itoru. Ua pure amui maua ia haamaitaihia oia, tera râ, aita taua fifi ra i tatarahia. Noa'tu râ te reira, ua ti'a ia'na i te rave i te mea o te ore e ti'a ia'na ia rave na roto noa i to'na iho puai. I te roaraa o te mau matahiti, ua hi'o atoa vau i to'na tauturu-raa-hia no te arai i te tahitohitoraa e te faainoraa o te totaiete ia haapa'o ana'e te hoê vahine feia mo'a no te mau mahana hopea nei i te a'oraa a te peropheta, e ia faa'iro ana'e oia i te utuafare e te aupururaa i te tamarii ei hoê o ta'na mau ohipa tumu mau e te faufaa roa. Te haamauruuru nei au e te haapoupou nei au ia Susan no to'na tautururaa mai ia'u ia apo i taua mau haapiiraa faufaa rahi ra.

Te ite nei e te maramarama ho'i nei te Faora

I roto i te Alama pene 7 te haapii nei tatou e nahea e no te aha e ti'a ai i te Faaora ia horo'a i te mana faatupu :

« E e haere Oia, ma te faaoromai i te *mauiui* e *te ati* e *te mau huru* faahemaraa atoa ra; e e na reira oia ia faatiahia te parau tei na ô mai ra e, e rave oia i te *mauiui* e *te mau ma'i* o ta'na mau taata ia'na iho.

E e faaoroma'i oia i to'na poheraa, i tatarahi

oia i te mau tapea o te pohe i ruuruuhia'i to'na ra mau taata; e e rave oia i to ratou *paruparu* i ni'a ia'na iho ia faaihia to'na ra aau i te aroha i au i te tino, ia ite oia na roto i te tino i te rave'a e faaora'i i to'na mau taata i to ratou paruparuraa ra » (Alama 7:11–12 ; teiaharaa papa'i tei ano'ihia).

Ua mauui te Faaora eiaha no ta tatou noa



Aita e mauui i te tino, aita e oto i te varua, aita e mauui o te varua, aita e ati e aore râ e ino o ta outou e o ta'u iho e farerei i roto i to tatou oraraa tahuti nei o tei ore i orahia e te Faaora na mua roa.

mau hara, no te tuea-ore-raa atoa râ, no te ti'a ore, no te mauui, no te oto, e no te pe'a-pe'a i te pae feruriraa o te tupu pinepine nei i ni'a ia tatou. Aita e mauui i te tino, aita e oto i te varua, aita e mauui o te varua, aita e ati e aore râ e ino o ta outou e o ta'u iho e farerei i roto i to tatou oraraa tahuti nei o tei ore i orahia e te Faaora na mua roa. E riro outou e o vau nei i te parau ma te oto, i roto i te hoê taima mauui, « aore hoê taata e maramama nei. Aore hoê taata e ite nei ». Penei a'e aore hoê taata e ite nei. Tera râ, te ite e te maramama papû maitai nei te Tamaiti a te Atua, no te mea ua ite Oia e ua amo ho'i Oia i te mau hopoia hou tatou a

amo ai. E no te mea e, ua aufau oia i te hoê hoo hopea e ua amo i te reira hopoia, ua ite papû Oia i te reira mau mea, e e nehenehe Ta'na e toro mai i To'na rima aroha i roto i te mau tuhaa e rave rahi o to tatou oraraa. E nehenehe Ta'na e faatoro i te rima, e tapea, e tauturu—e horo mai ia tatou nei—e e faaitoito ia tatou ia hau atu tatou i to tatou iho huru, e ia tauturu ia tatou ia rave i te mea o te ore roa e ti'a ia tatou ia rave na roto noa i to tatou iho puai.

« E haere mai outou ia'u nei, e te feia atoa i haa rahi, e tei teiaha i te hopoia, e na'u outou e faaora.

A rave mai i tau zugo i nia ia outou, e ia haapihia outou e au, te mârû nei hoi au e te haehaa o te aau: e e noaa hoi te ora i to outou varua.

Te mârû nei hoi ta'u zugo e te mâmâ nei ta'u hopoia » (Mataio 11:28–30).

Te faaite nei au i to'u iteraa e to'u maururu no te tusia hopea ore e te mure ore o te Fatu o Iesu Mesia. Ua ite au e te ora nei te Faaora. Ua ite au i To'na mana taraehara e i To'na mana faatupu, e te faaite papû nei au e, e mana mau teie na mana e piti, e e roaa

te reira ia tatou tata'itahi. Oia ia, « i roto i te puai o te Fatu ra » e nehenehe ta tatou e rave e e upootia ho'i i ni'a i te mau mea atoa a haere ai tatou i mua i roto i to tatou tere i te tahuti nei. ■

No roto mai i te hoê a'oraa i roto i te hoê pureeraa i Brigham Young University i te 23 no atopa 2001. No te taatoaraa o te papa'iraa na roto i te reo peretane, a haere i ni'a i te itenati, speeches.byu.edu.

TE MAU NOTA

1. A hi'o Franklin D. Richards, i roto i te Conference Report, Atopa 1965, 136–37 ; a hi'o atoa David O. McKay, i roto i te Conference Report, Eperera 1954, 26.
2. Bible Dictionary, « Grace » ; teiaharaa papa'i tei ano'ihia.
3. Daniel W. Jones, *Forty Years among the Indians* (n.d.), 57–58.

Na te ao atoa nei, te arata'i roa nei te haapiiraa evanelia i te feia apî mai ia outou na i piha'i iho ia Iesu Mesia.



Te mau haamaitairaa o te **HAAPIIRAA EVANELIA**

Na Brittany Beattie

Te mau Ve'a a te Ekalesia

Eere o outou ana'e i roto i ta outou faaoti-
raa ia haere i te haapiiraa evanelia. Na te
ao atoa nei, e rave rahi hanere tauatini
feia apĪ o te faa'iro nei i te haapiiraa evanelia
ei tuhaa no to ratou oraraa, te haere nei ratou
i roto i ta ratou piha haapiiraa na ni'a i te pe-
reoo utaraa taata, na ni'a iho i te vaa initia, te
pereoo taataahi, e aore râ, i ni'a i te itenati. Te
ti'a nei te tahi mau feia apĪ i te poipoi roa no
te ratere atea no te tapae i te hora, te tahi pae,
te ratere nei ratou i te ahiahi, e te tahi te haapii
noa nei ratou i te fare e rave rahi mahana i
roto i te hepetoma.

No te haere i te haapiiraa evanelia e titau-
hia te faatusiaraa, tera râ, te ite nei te feia apĪ
na te ao atoa nei e, e mau'araa maitai te faa-
itoitoraa no te haere i te haapiiraa evanelia. E
o ratou o te haere nei i te haapiiraa evanelia,
te vai ra ia hoê mea i roto ia ratou paatoa: na
te haapiiraa evanelia e haafatata nei ia ratou i
te Faaora e i to tatou Metua i te Ao ra.

Te fariiraa i te mau haamaitairaa i fafauhia

No te aha e mea faufaa roa te haapiiraa
evanelia no outou? Te tahi o te mau tumu,
o teie ia mau fafauaraa no roto mai i te mau
peropheta e te mau aposetolo no teie anotau:

- Ua riro te reira ei « tao'a a te Atua no te
faaoraraa ia Iseraela i teie anotau na roto
i te hoê hora fifi mau ».¹

- Na te reira « e faaineine ia outou no te vau-
vau i te parau poroi o te evanelia i faaho'i-
hia mai, i te feia o ta outou e farerei atu ».²
- Na te reira e tauturu ia outou « ia roaa te
ite o te parau mau ».³
- Na te haapiiraa evanelia « e horo'a mai nei
i te mau rave'a faahiahia no te haapii i te
mau parau haapiiraa o te faatupu i te oaoa
i roto ia outou. E horo'a mai te reira i te
mau rave'a nehenehe no te faahoa i te feia
hoê â to outou huru ».⁴
- « E tupu to outou ite i te evanelia i te rahi.
E puai to outou faaroo. E faahotu outou i te
mau autaatiraa e te auhoaraa nehenehe ».⁵
- « E horo'a mai te reira ... i te ite pae varua,
i te puai morare no te patoi i te ino e vai
nei ati a'e ia tatou, e tae noa'tu i te ite rahi
i roto i te evanelia ».⁶
- O te « hoê o te mau faaineineraa maitai roa
a'e no te hoê misioni ».⁷

Imiraa i te rave'a no te haere

Te haereraa i te haapiiraa evanelia, o te faa-
ru'eraa atoa rii ia i te tahi mea ta outou e au
nei ia rave, ia roaa ho'i ia outou te taima no te
haere. Tera râ, e mau'araa maitai te raveraa i
te reira tusia. Ua ma'iti o Elijah Bugayong no
te fenua Firipino, ia rave i te reira faaotiraa i
roto i te matahiti hopea o ta'na haapiiraa tua-
rua. I roto i ta'na haapiiraa tuarua, ua riro ta-
mau noa oia ei numera piti i roto i ta'na piha.
Ua hinaaro puai oia ia riro ei numera hoê i



TE HOÊ HAAMAITAIRAA NO TE ORARAA TAATO

« E rave rahi matahiti i ma'iri a'enei ua farii au i te haamaitairaa ia haapii i te haapiiraa evanelia i te poipoi roa. Ua faaterehia te haapiiraa i roto i te area 6:30 e tae atu i te 7:30 i te poipoi i te mau mahana haapiiraa atoa. I roto i na matahiti e piti ua ite au i te mau piahi vare'a taoto i roto i te piha haapiiraa, e ua riro te reira ei haape'ape'araa na to ratou orometua no te faaara ia ratou. Ia oti te pure e te mana'o faaitoitoraa, ua ite au i te mau varua anaanatae ia ora mai no te farahi atu i to ratou ite i te mau papa'iraa mo'a. Te tuhaa fifi roa a'e o te haapiiraa, o te faaotiraa ia i te aparauraa i te hora ti'a no te vaiiho ia ratou i roto i ta ratou taime haapiiraa i faataahia. A tere noa te matahiti haapiiraa, ua ite au i te mau piahi i te tupuraa i te rahi i roto i te ti'aturi ia ratou iho, te riroraa ei mau hoa maitai a'e, e te tupuraa i te rahi i te iteraa papû no ni'a i te evanelia.

« Tau matahiti i ma'iri a'enei, tei roto vau i te hoê fare toa i roto i te hoê oire e ere i te mea atea roa, ua faaroo vau i te hoê taata i te piiraa i to'u i'oa. Ua fariu atura vau no te aroha e piti o ta'u na piahi tahito no te « séminaire ». E tane e e vahine faaipoipo raua i teie nei. Ua faaite maira raua ia'u i ta raua na tamarii nehenehe e maha. A paraparau noa ai matou, ua maere au i te iteraa i te rahiraa tamarii no te « séminaire » ta raua e farerei noa nei â noa'tu te rahiraa matahiti i teie nei. Ua ite papû vau i te hoê taamuraa taa ê tei tupu i roto i taua pihaa haapiiraa « séminaire » ra i te poipoi roa ».

Elder L. Tom Perry no te Püpü no te Tino Ahuru Ma Piti Aposetolo, « Receive Truth », *Ensign*, Novema 1997, 62.

ta'na matahiti hopea, e ua feruri atoa oia e, e vaiiho i te haapiiraa evanelia ta'na i rave noa na i te mau matahiti na mua'tu, ia ti'a hoi ia'na ia faatupu i ta'na opuaraa.

E i te hoê mahana, ua tau i to'na mau feruriraa. « Ua [hi'o atu vau] i ta'u iri haapiiraa », ta'na ia parau. « Ua ite atu vau i te hoê aparauraa buka i piha'i iho, ta'u buka papa'iraa mo'a e maha, ta'u buka papa'i e ta'u buka haapiiraa evanelia. Ua ui hohonu a'era vau ia'u iho e, 'Eaha te mea faufaa a'e ? »

Ua ite o Elijah i ta'na pahonora i roto i te Mataio 6:33 : « E mata na râ outou i te imi i te basileia o te Atua, e te parau ti'a na'na ; e amui-atoa-hia mai taua mau mea ra ia outou ». Ua faaoti oia e haere itoito i te haapiiraa evanelia e e imi i te tahi atu mau rave'a no te faaau i to'na taime ia ti'a ia'na ia haa i ni'a i ta'na haapiiraa. I te hopea o te matahiti, ua ma'itihia oia ei piahi numera hoê e ua roaa atoa ia'na te hoê pute no te haapiiraa tuatoru.

Ua faaoti o Spencer Douglas no Alabama, USA, ia faaru'e i te tahi mau ohipa faaoaoaraa ia ti'a hoi ia'na ia apo rahi mai i te mau mea no te haapiiraa evanelia. No ta'na na matahiti matamua o te haapiiraa evanelia, ua ti'a oia i ni'a i te hora 4 i te poipoi no te haere, e no na matahiti hopea e piti ua ti'a oia i ni'a i te hora 5 i te poipoi. Te parau ra oia e, « Aita ta'u e nehenehe e amui atu i roto i te mau faaoaoaraa i te pô e to'u mau hoa no te mea e titauhia ia'u ia taoto oioi. Aita ana'e, eita ia e ti'a ia'u ia amui hope roa i roto i te haapiiraa e ia apo maitai i te poipoi a'e ». No Spencer, e ere ia te tae-noa-raa i te haapiiraa, o te ara-atoa-raa râ e te faaineineraa no te apo mai i te haapiiraa.

Ua haapii mai o Elder Dallin H. Oaks no te Püpü no te Tino Ahuru Ma Piti Aposetolo e : « Eiaha no te mea e mea maitai te hoê mea ra e tumu maitai ia no te rave i te reira. Rave rahi mau ohipa maitai e ti'a ia tatou ia rave tera râ, aita e rava'i te taime no te rave i te reira. Te vai ra te tahi mau ohipa hau roa'tu i te maitai, e o te reira ia te mau ohipa e ti'a ia ravehia na mua roa i roto i to tatou oraraa ».⁸ Tera te hoê a'o faufaa roa ia haamana'o i te taime a faaoti ai outou e, nahea ia faaau i te faufaa o te haapiiraa evanelia i roto i ta outou tarena.

Faaineine no te mau Misioni

Te pahono atoa nei te haapiiraa evanelia ei faaineineraa rahi no te ohipa misionare ta outou e rave—ei melo misionare i teie mahana e mai te mea atoa e, e rave outou i te hoê misioni rave tamau a muri a'e. Ua ite o Franco Huamán Curinuqui no Peru e, ua tauturu maitai ta'na tai'oraa papa'iraa mo'a ia'na no te faaineine no ta'na misioni.

E mau'araa maitai te ti'araa i ni'a i te hora 4 i te poipoi no te haere i te haapiiraa evanelia, na ni'a i te vaa ia tae i te mau ava'e vai pu'e, e na roto i te vari paruparu no te tae i te piha haapiiraa. Te parau ra oia e, « Ua hinaaro vau e faaoti i te haapiiraa evanelia a te feia apî e ia haamata i te haapiiraa evanelia na te feia apî paari no te faaineine ia'u no te hoê misioni. E tamau noa vau i te tupu i te rahi i roto i te Ekalesia ». E mea faufaa te haapiiraa evanelia no'na no te mea e haapii mai oia no ni'a i te mau papa'iraa mo'a e e tamau aau oia i te mau irava faufaa, na te reira e tauturu ia'na ia riro ei misionare maitai a'e.

la haamaitaihia i roto i te mau tuhaa atoa o te oraraa

A rohi ai te feia apĪ na te ao atoa nei no te haere i te haapiiraa evanelia, e farii ĩa ratou i te puai i roto i te mau mea e rave rahi, eiaha i ni'a noa i te tai'oraa i te papa'iraa mo'a. Ua ite o Cameron Lisney no Peretane e, ua haamaitaihia oia i roto i te mau tuhaa atoa o to'na oraraa. « Eita te haapiiraa evanelia e tauturu noa i te mau mea pae varua ana'e, e tauturu atoa rā te reira i te haapiiraa », te na reira ra o Cameron.

Te parau ra oia e, « na te haamataraa oioi i te mahana e faaraa i to outou roro. Te parau ra te tahi mau hoa to'u e, aita to ratou e taime no te haere—a tae hoi e, e ere hoi mai te huru e, te haere nei outou e hi'ohi'o faahou i te « maths » i te hora 6 i te poipoi, e ere anei ? » Ia tuatapapa outou, « e tauturu mai te Fatu ia outou i roto i ta outou mau hi'opo'araa, e mai te mea e, e haere outou i te haapiiraa evanelia, e rahi roa'tu ta'na tauturu ia outou », te na reira ra o Cameron.

Oia mau, ua tauturu atoa te haapiiraa evanelia ia Cameron ia haapaari i to'na iteraa papū. Te na ō ra oia e, « Ua tae mai te haamataraa o to'u iteraa papū na roto mai i te faanahoraa o te haapiiraa evanelia. I te 14raa o to'u matahiti, ua tautoo u'ana vau i roto i te evanelia. Aita vau i au i te Ekalesia, e ua tae roa vau i te raveraa i te mau mea aita e ti'a ia'u ia na reira. Te tahi noa tau ava'e rii i reira vau i faaru'e ai i te mau mea atoa ». Tera rā, ia ani mai te hoē hoa

ia Cameron ia haere i te haapiiraa evanelia, ua farii oia ia haere na muri iho ia'na. E ua haamata te mau haamaitairaa i te tae mai.

« Ua haamata vau i te farii faahou i te Varua », te parau ĩa a Cameron. « Ua haamata vau i te haapa'o maitai i roto i te pureraa, e ua haere au i te Haapiiraa Sabati e i te mau haapiiraa o te autahu'araa. Ua riro maira te reira ei ohipa ohie a'e, e ua haamata vau i te oaoa a'e. I te pae hopea, ua roaa to'u iho iteraa papū no ni'a i te evanelia ». E piti ava'e i muri a'e i te haapiiraa evanelia, ua farerei o Cameron i to'na episekopo e ua faatoro'ahia oia ei haapii i roto i te Autahu'araa a Aarona.

Ua ite o Cameron e, te tauturu nei te haapiiraa evanelia ia'na ia ti'a ma te paari i mua i te mau faahemaraa o te ao nei. Ua parau oia e, « a tere noa ai te haapiiraa evanelia, ua ite a'era vau e, e mea ohie a'e ia faaruru i te mau fifi o teie nei ao. E mea fifi mau ia riro ei feia apĪ i roto i te ao ta tatou e ora nei—te haatihia nei tatou i

te hara i te mau vahi atoa. Te faaite papū nei au ia outou e, mai te mea e, e haere outou i te haapiiraa evanelia, e itehia e outou te puai no te paruru ia outou i te reira. E hamani te haapiiraa evanelia i te hoē paruru varua no te paruru ia outou. Ua rau te mau tamataraa e te mau faahemaraa tei topa mai i ni'a i to'u e'a, e ua riro te haapiiraa evanelia ei tauturu papū mau no te tapea ia'u i ni'a i te e'a afaro e te pirihao ».

Haapuai i te tahi e te tahi

Na te haapiiraa evanelia atoa e tahoē ia outou e te tahi atu mau feia apĪ hoē ā to outou mau ti'aturiraa. Te parau nei o Vika Chelyshkova no Rusia e, « Ua faauruhia vau e te mau taata hoē ā feruriraa e to'u, o te mau nei ho'i te hoē ā mau ture morare e o te ti'aturi atoa nei i te Atua mai ia'u te huru ». Te parau faahou ra oia e,

« Mai te mea e, e uiraa ta'u, e nehenehe ta'u e aparau i te reira i to'u orometua haapiiraa evanelia





UA FAAURU TE HAAPIIRAA EVANELIA I TE ORARAA O TE PERESIDENI HENRY B. EYRING

○ Mildred Bennion te hoê o te mau piahi matamua no te haapiiraa evanelia i Granite Seminary i te matahiti 1912. Ua riro mai oia ei metua vahine no te peresideni Henry B. Eyring, Tauturu Matamua i roto i te Peresideniraa Matamua.

Ua maramarama oia i te faufaa o te haapiiraa evanelia i roto i to'na oraraa, e ua hinaaro oia ia farii atoa ta'na mau tamarii i te reira mau haamaitairaa ta'na i ite i roto i te haapiiraa evanelia, no reira, ua rave to'na utuafare i te hoê faaotiraa rahi : « Ua haere matou e faaea i Utaha noa'itu te moni rahi e titauhia, ia ti'a i ta maua mau tamaroa ia haere i te haapiiraa evanelia na te feia apî e na te feia apî paari e ia itehia to ratou mau hoa i rotopu i to tatou mau taata. Tera ia ta'u pahonoraa i te uiraa no ni'a i taua mau mea ra » (faahitihia i roto i te C. Coleman, *History of Granite Seminary*, 142).

Ua vai tamau â te faufaa o te haapiiraa a te Ekalesia i roto i te utuafare Eyring i te taime a riro ai te peresideni Henry B. Eyring i te matahiti 1971 ei peresideni no te Ricks College (tei parauhia i teie nei, o BYU-Idaho), e fare haapiiraa tuarua na te Ekalesia, e ua riro ei raatira no te Faanahoraa Haapiiraa a te Ekalesia mai te 1980 e tae atu i te 1985 e mai te 1992 e tae atu i te 2005.

e i te tahi atu mau piahi. E nehe-nehe ta'u e faaite i to'u mau mana'o e i to'u iteraa papû ia vetahi ê no te haapuai i to'u iho faaroo e i to vetahi ê. Na roto i te tai'o-amui-raa i te mau papa'iraa mo'a e te feruri-maite-raa i te mau mea no te pae varua, te fatata atu nei matou i te Atua e i te tahi e te tahi.

Ua ite atoa o Ksenia Goncharova, no « Ukraine », i te reira mau mea. Te parau nei oia e, « Ia faaite ana'e tatou i to tatou mau iteraa i te tahi e te tahi, e rahi a'e to tatou puai, e e maramarama maitai a'e tatou i te mau papa'iraa mo'a. Ia paraparau ana'e matou i te mau hi'oraa no roto mai i to matou oraraa i te taime no te mau haapiiraa, te ite nei au i te huru ohiparaa a te evanelia i roto i to'u oraraa e i roto i te oraraa o vetahi ê ».

Te iteraa i te Metua i te Ao ra e ia Iesu Mesia

Aita i maoro a'enei ua anihia i te hoê pûpû feia apî e mea nahea to te haapiiraa evanelia haamaitairaa ia ratou. Ua faaite mai ta ratou mau pahonoraa i te hoê tumu parau rahi—ua tauturu te haapiiraa evanelia ia ratou ia haafatata ia ratou i te Metua i te Ao ra e i te Faaora. Ua haapii mai o Elder David A. Bednar no te Pûpû no te Tino Ahuru Ma Piti Aposetolo e : « E mea faufaa te mau tumu parau atoa ta outou e tuatapapa nei i roto i te haapiiraa evanelia. I te mau matahiti atoa ia tuatapapa outou i te hoê o te mau buka papa'iraa mo'a, o te Fatu ra o Iesu Mesia te tuatapaparaa matamua ».⁹

Teie te mau parau e rave rahi ta te feia apî i faahiti no ni'a i te huru to te haapiiraa evanelia haafatataraa ia ratou ia Iesu Mesia.

- « Ua haapii au i te mau mea ta te Faaora e rave ra no'u, na roto i te tai'oraa i teie mau aamu no roto mai i te mau peropheta e rave rahi, e na roto i te iteraa e, e mea faufaa rahi au i mua Ia'na. Ua ite au e, no To'na here rahi ia'u, i pohe ai e i mauui ai Oia no to'u mauui ».
- « O te haapiiraa evanelia te hoê rave'a maitai roa no te haamata i to'u mahana. Noa'itu te huru o to'u rohirohi, e ite au i te Varua e e ite au i te puai, e ia tae mai te mau mea teimaha i roto i to'u mahana, ua ite au ma te feaa ore e, ua here to'u Faaora ia'u, e i reira to'u ti'aturi e rahi ai no te ti'a no te parau ti'a ».
- « E taata fafariuhia mai au i roto i te Ekalesia. Ua haamata vau i te haapiiraa evanelia hou a bapetizohia ai au. Ahani aita e haapiiraa evanelia, eita paha ia vau e bapetizo-roa-hia. Ahiri e, aita e haapiiraa evanelia, eita ia vau e farii i te Faaora i roto i to'u oraraa i teie nei e aore râ, eita ia vau e ite e, e nehenehe ta'u mau hara e faaorehia. Aita re'a to'u iteraa i te Metua i te Ao ra e ia Iesu Mesia i roto i to'u oraraa. Na te haapiiraa evanelia i tauturu mai ia'u ia ite ia Raua e ia faaairo a muri noa'itu ho'i ia Raua ei tuhaa no to'u iho oraraa e no te oraraa o ta'u mau tamarii a muri a'e ».
- « Na te haereraa i te haapiiraa evanelia i te mau mahana atoa i tauturu mai ia'u ia haafatata roa i piha'i iho i to'u Fatu e to'u Faaora, o Iesu Mesia, na roto i te aporaa i Ta'na mau haapiiraa, To'na here rahi ia'u, e te rave'a e ti'a ai ia'u ia ho'i e ora i piha'i iho Ia'na ra ».

TE AAMU NO TE HAAPIIRAA EVANELIA

Teie te hoê hi'oraa no ni'a i te huru tupuraa o te haapiiraa evanelia i roto i te roaraa o te mau matahiti.

- « Ia tae au i te haapiiraa evanelia, e ite au i te hoê auraa hohonu i roto i te mau papa'iraa mo'a. Na te reira e tauturu ia'u ia haamana'o i te mau poipoi atoa ia riro mai te Mesia ra te huru i roto i te mau ohipa atoa ta'u e rave ra i te mau mahana atoa ».
- « Ua haapii mai te haapiiraa evanelia ia'u nahea ia tai'o i ta'u mau papa'iraa mo'a, e eiaha ia oaoa noa i te reira, ia ite atoa râ i te faaohiparaa i roto i te papa'iraa. Ua apo mai au i te mau haapiiraa e te mau parau tumu o tei tauturu i te haapuai i to'u iteraa papû no ni'a i te hoê Metua i te Ao ra here e ia Iesu Mesia, o ta'u ia e tapea i roto ia'u no te taatoaraa o to'u oraraa ».

Na roto i teie mau haamaitairaa e rave rahi o te roaa mai na roto i te haereraa i te haapiiraa evanelia, e mea ohie roa ia ite e, no te aha te feia apî na te ao atoa nei e faariro nei i te reira ei ohipa tumu i roto i ta ratou tarena. ■

TE MAU NOTA

1. Boyd K. Packer, *Teach the Scriptures* (a'oraa i mua i te mau orometua no te Faanahoraa Haapiiraa a te Ekalesia, atopa 14, 1977), 3.
2. L. Tom Perry, « Faateitei i te faito », *Liahona*, Novema 2007, 48.
3. Richard G. Scott, « A faatupu i to outou huru maitai teitei atu », *Liahona*, Novema 2003, 42.
4. Gordon B. Hinckley, « Stand True and Faithful », *Ensign*, Me 1996, 93.
5. Gordon B. Hinckley, « The Miracle Made Possible by Faith », *Ensign*, Me 1984, 47.
6. Gordon B. Hinckley, « The State of the Church », *Ensign*, Me 1991, 52.
7. Ezra Taft Benson, « Our Responsibility to Share the Gospel », *Ensign*, Me 1985, 7.
8. Dallin H. Oaks, « Maitai, maitai a'e, maitai roa a'e », *Liahona*, Novema 2007, 104.
9. David A. Bednar, « Conclusion and Testimony », *Welcome to Seminary 2010–2011*, seminary.lds.org/welcome.

- 1888 : Ua faatere te Peresideni Wilford Woodruff i te faatiaraa o te Tomite Haapiiraa a te Ekalesia no te arata'i i te mau tautoora haapiiraa a te Ekalesia, e tae noa'tu i te mau haapiiraa faaroo i muri a'e i te haapiiraa a te hau.
- 1912 : Ua faatiahia te haapiiraa evanelia matamua i te mau mahana atoa, e 70 rahiraa piahi o te faaru'e mai i te fare haapiiraa no te roaraa o te hoê haapiiraa tamau, no te haere atu i te haapiiraa evanelia. Ua haapiihia te mau haapiiraa i te tahi a'e pae i te purumu i Granite High School i Salt Lake City, Utah, USA.
- 1925 : Ua tae'a te 10 000 rahiraa piahi.
- 1948 : Ua faatupuhia i Canada, te fenua matamua i rapae i te Fenua Marite o tei faatupu i te haapiiraa evanelia.
- 1950 : Faatiaraa i te haapiiraa evanelia i te mau mahana atoa (tei parauhia na mua'tu e, « te haapiiraa evanelia i te poipoi roa ») i Califonia, e putuputu te mau piahi i roto i te mau fare pureraa hou a haamata ai te haapiiraa.
- 1958 : Ua tae'a te 50 000 rahiraa piahi.
- 1958 : Ua faatupuhia i Amerika Ropu, haamata-matamua-hia i Mexico.
- 1962 : Ua faatupuhia i Europa, haamatahia na mua i Finland e i Purutia.
- 1963 : Ua faatupuhia i Asia, hamatahia na mua i Tapone.
- 1965 : Ua tae'a te 100 000 rahiraa piahi.
- 1967 : Hamataraa te haapiiraa evanelia i te fare iho i roto i te mau oire faapu, oia ho'i, e haapii noa te mau piahi i te fare e maha mahana i te hepetoma, e e amui ratou hoê mahana i te hepetoma.
- 1968 : Ua faatupuhia i Auteraria.
- 1969 : Ua faatupuhia i Amerika Apatoa, na mua i Beresilia.
- 1972 : Ua faatupuhia i Afirita, na mua i Afirita Apatoa.
- 1983 : Ua tae'a te 200 000 rahiraa piahi.
- 1991 : Ua tae'a te 300 000 rahiraa piahi.
- 2012 : Ua faatupuhia i roto e 134 fenua na te ao nei, fatata e 370 000 rahiraa piahi.



TE HOÊ PIIRAA NO TE HOÊ TAATA

Na Helena Hannonen



I muri noa iho i to'u bapetizo-raa-hia i te 10raa o to'u matahiti i Lappeenranta, Finland, ua farii au i to'u piiraa matamua i roto i te Ekalesia. Ua tupu te reira i te matahiti 1960, e ua hinaaro roa to matou amaa iti na'ina'i i te hoê taata no te faata'i i te mau himene i ni'a i te piana i roto i te mau pureraa oro'a. Ua anihia mai ia'u ia rave i te reira ohipa.

Noa'tu e, ua tura'i to'u metua vahine i to'u taea'e e ia'u nei ia haapii i te ohipa rima ihi, aita râ vau i ite i te ha'uti i te piana, e aita ta matou e piana. Tera râ, ua hinaaro vau ia haapa'o i to'u piiraa, no reira ua rave matou i te hoê faanahoraa.

I te pureraa pô utuafare, ua paraparau matou i te mea ta teie piiraa e horo'a mai no matou paatoa. Tera râ, e vahine ivi to'u metua vahine e e piti na tamarii na'ina'i, ua ite matou e, e ere i te ohipa ohie no matou ia hoo mai i te hoê piana e ia aufau i te mau



FAAFARIUHIA

E taata faafariu-apî-hia vau e aita hoê ite to'u no te faata'i i te piana. Tera râ, e mauruuru rahi to'u no to'u piiraa ei faata'i piana no te amaa, tei tau i roa i to'u oraraa.

haapiiraa no te fata'i i te piana. Ua faaoti a'era matou ia rave i te tusia e titauhia.

Te tusia matamua i ravehia e to'u utuafare, e tusia moni ia. Ua faaoti a'era matou e, mai te pu'e tau faatupuraa raau e tae atu i te tau haapoheraa raau, e na ni'a iho noa matou i to matou pereoo taataahi eiaha râ e na ni'a faahou i te pereoo uta taata. E mea itoito roa to'u taea'e o Martti, e ua roaa ia'na te hoê aravihi taa ê no te taahi i te pereoo taataahi—noa'tu e mea na roto i te hiona e i ni'a i te pape paari. Ua faaea vau i te hoo i te rahiraa o to'u mau ahu e ua haapii au i te nira. Ua haapii atoa matou ia ora ma te tarani. Ua haamata matou i te hoê faaapu i piha'i iho i te fare o to'u na metua ruau e ua haaputu i te maa no te tau toetoe. Ta matou « mau tau faafaaearaa » o te mau tere ia o to matou mama i te hiero no Suisse e aore râ, te mau amuamuraa ohie na rapae (pique-nique) e te mau puhaparaa aita i atea roa i to matou nohoraa.

Te piti o te tusia i ravehia e to'u utuafare, te tusia ia no te taima. Ua opere matou i te mau ohipa no te fare e ua faanaho faahou i te tahi atu mau ohipa ta matou e ta te fare haapiiraa, ia taimesia to'u no te haapii i te faata'i i te piana. Na roto i te reira mau faatusiaraa ta matou e te rave-itoito-raa matou i te ohipa, ua pineline to matou metua vahine i te ite e, aita to matou e taima vata no te topa i roto i te mau fifi mai te tahi atu mau tamarii o to matou faito matahiti. To'na vairaa mau, ua riro to'u piiraa ei piiraa no te utuafare na mua roa a'e a ite ai au i te ha'uti i te hoê nota.

Ua haamata vau i te rave i te mau haapiipii-
raa i piha'i iho i te hoê orometua haapii nota i te fare haapiiraa no to matou oire. Ua haapii au ma te faaohipa i te hoê patapataraa api parau e i ni'a i te hoê piana a te ekalesia. I te revaraa to'u orometua, ua hoo mai matou i ta'na piana, e ua fariihia vau ia haapii i piha'i iho i te hoê orometua tu'iroo i roto i to matou oire.

Ua haapii au o vau ana'e i te faata'i i te mau himene pureraa, e ua hau'ti au i piha'i iho i te

raatira himene o te amaa. Ua faaitoito mai te mau taata atoa ia'u—noa'tu e, e « hape » rii te nota i te tahi taima. Ua huru ê roa to'u orometua i to'na iteraa e, ua ha'uti au i mua i te taata hou a ite maitai ai i te ha'uti e i te tamau aau i te mau himene. Tera râ, e mea maitai a'e e ha'uti e te hoê noa rima i te ore roa'tu.

E na ni'a vau i to'u pereoo taataahi ia haere i ta'u mau haapiipii-
raa, e i te tau toetoe, e tamata vau i te haere na raro e aore râ, na ni'a i te iri faahee mai te mea e, e nehene. I te Sabati, o vau ana'e iho ia haere i te pureraa, e tae ia vau i te fare pureraa hoê hora na mua a'e, e e taima ia to'u no te haapiipii rii. E na ni'a vau i te pereoo uta taata i te haere ia tae roa te anuvera i te 15 teteri raro a'e i te 0. Aita roa'tu vau e haape'ape'a mai te mea e, e uahia e e hionahia; ua tere vitiviti roa te hora a haere ai au no te mea, e rave rahi himene nehenehe ta'u no te apee ia'u. Ia haere au, e haere au na roto i te afaa e te mau pionie (a hi'o « Haere mai, e te Feia Mo'a », *Te mau himene*, no. 18), e haere atoa vau na ni'a i te mou'a i Ziona (a hi'o « E te mau nunaa e », *Te mau himene*, no. 4), e e ti'a vau i piha'i iho i te feia apî o te ore roa e hape (a hi'o « A haapa'o tatou i te Evanelia », *Te mau himene*, no. 156). Eita roa'tu vau e paruparu na roto i taua huru patururaa ra, noa'tu e, to'u utuafare e o vau ana'e te feia mo'a i te mau mahana hopea nei i roto i to matou oire i te hitia o te râ no Finlande, i piha'i iho noa i te otia o te fenua Rusia.

I roto i te roaraa o te mau matahiti, ua maitai roa ta'u ha'utiraa, e e nehenehe ta'u e ha'uti i te tahi atu mau nota taa ê atu i te mau nota i papa'ihia. Ua haapii au ia ma'iti i te mau himene na roto i te pure ia nehenehe i te Varua ia parahi mai i roto i te pureraa. E te vahi faufaa roa'tu, ua roaa to'u iteraa papû no ni'a i te evanelia na roto i te himene. E haamana'o ohie au i te mau mana'o, te mau parau e te mau parau poro'i o te mau himene ia tae noa mai te tahi feaaraa. Ua ite au e, e



parau mau te mau parau tumu e te mau oro'a o te evanelia, i te mea e, ua haapii mai au i te reira hoê reni i muri i te tahi e hoê nota i muri i te tahi.

Te haamana'o nei au i te hoê mahana taa ê a tamatahia ai ta'u fafauraa i ni'a i taua mau parau tumu ra. 14 to'u matahiti; e mea au na'u te ohipa au, e ua moemoea noa vau ia au i roto i te mau Ha'utiraa tuaro rarahi. Aita vau e ha'uti i te Sabati, noa'tu râ te reira, ua haere noa vau i te puairaa. I te pae hopea, a fatata noa mai ai te Ha'utiraa Rahi no Mexico, ua ani maira te hoê taata faaineine ia'u ia amui atoa i roto i te faaineineraa taa ê.

Tera râ, e tupu te faaineineraa i te mau Sabati poipoi atoa i te hora no te Haapiiraa Sabati. Ua feruri au e, e nehenehe ta'u e haere i te faaineineraa e ia ma'iri i te Haapiiraa Sabati no te mea, e tae mai au i te fare pureraa i te taime no te pureraa oro'a i te ahiahi. Ua haaputu vau i te moni no te tarahu pereoo e ua faanahonaho vau i te mau mea atoa. I te mahana maa hou te faaineineraa matamua, ua faaite au i to'u metua vahine i ta'u faanahoraa.

Ua ite au i te pe'ape'a e te inoino i roto i to'na mata, tera râ, hoê noa pahonoraa ta'na i horo'a mai, oia hoi, na'u e rave i te ma'itiraa, e ua haapiihia vau i te mea ti'a. I taua pô ra, aita ta'u e nehenehe e iriti i te mau parau ra « Ma'iti i te Maitai » (*Te mau himene*, no. 144) i rapae i to'u feruriraa. Ua haruru noa te mau parau i roto i to'u upoo mai te hoê pehe puta.

E hopoi te hoê pereoo ia'u i to'u piiraa no te Ekalesia, e te tahi râ, i to'u ia moemoea tamarii e te tuiroo i te pae no te ohipa au. Na te mau irava o te mau himene ta'u i ha'uti e rave rahi taime i horo'a mai i te pahonoraa.

I te hoê poipoi Sabati, ta'u pute no te au i ni'a i te tahi rima e ta'u pute himene i ni'a i te tahi atu rima, ua feruri au e, e mana'o to'u metua vahine e, te haere ra vau i te pureraa. Ua haere au i te vahi tapearaa pereoo. I te vahi tapearaa pereoo, tei to'u pae te peroo no te haere i te vahi auraa, e tei ô mai te tapearaa o te pereoo no te haere i te fare pureraa. A tia'i noa ai au, ua riri au. I roto i to'u taria te ta'i noa ra te himene ra « Have I Done Any Good [Ua rave anei au i te maitai] ? » (*Hymns*, no. 223)—te himene i faaineinehia no te Haapiiraa Sabati i taua mahana ra. Ua ite au e, e himene fifi rii, e te mau parau fifi, e te mau nota teitei, e nehenehe i teie himene e ino atu mai te mea e, e ere te mea maitai te faata'iraa upaupa.

A feruri noa ai au, ua tere maira na pereoo toopiti. Ua tapea maira te pereoo no te haere i te auraa no te rave ia'u, e ua tapea maira te pereoo no te haere i te fare pureraa, e ua hi'o maira te taata faahoro i ni'a ia'u, ma te maere no te mea, tera te pereoo ta'u i mataro i te rave. Ua hi'o noa maua i te tahi e te tahi no te tahi tau tetoni te maoro. Eaha ta'u e tia'i ra ? Ua ma'iti au i te Fatu (a hi'o « Who's on the Lord's Side [O vai to te pae o te Fatu] ? » *Hymns*, no. 260). Ua fafau vau ia haere i te vahi Ta'na e hinaaro ia haere au (a hi'o « E Pee Au ia Oe », *Te mau himene*, no. 165). Era ê te tau no to'u raveraa i ta'u faaotiraa ia haapa'o i te mau faaueraa (a hi'o « Auraro i te ture », *Te mau himene*, no. 187).

Hou a tu'ati ai to'u feruriraa i to'u aau, ua na mua a'ena to'u tino. Ua horo atu vau i te tahi pae i te purumu e ua tarape i te tahi taata faahoro pereoo. Ua aufau vau i te tarahu pereoo e ua haere au i muri roa i te pereoo o te tere ra i te pae no te fare pureraa, ma te hi'o i to'u mau moemoea no te ohipa au ia tere atu i te tahi pae.

Ua mana'o te mau taata e, ua ta'i au i taua mahana ra no te mea e, ua farii au i te Varua. Tera râ, te tumu mau vau i ta'i ai no te mea ia e, te moemoea ta'u i moemoea noa na mai to'u vai-tamarii-raa mai â, ua mo'e ê ia te reira, e no te mea ua haamâ vau i te feruriraa i te haere e au i te Sabati. Tera râ, i taua Sabati ra, mai te mau Sabati na mua'tu e na muri mai, ua rave au i to'u piiraa.

I te tau a ineine ai au no te haere i te fare haapiiraa tuarua, ua haapii au i te mau melo e rave rahi o te amaa ia arata'i i te himene e ia faata'i i te piana. I roto i te fare haapiiraa tuarua ua tamau noa vau i te fata'i i te piana e ua haapii atoa vau i te fata'i i te hamonia. Ua mana'o vau e, eita vau e tae faahou i Amerika Latino no to'u faaru'eraa i te ohipa au no te tata'uraa, tera râ, ia hope ta'u parau tuite « master » i te fare haapiiraa teitei no Brigham Young University, ua tavini au i te hoê misioni i « Colombie ». I roto i ta'u misioni, ua haapii au i te taata ia faata'i i te piana. Ua hinaaro vau ia vaiiho mai i taua mau feia mo'a ra i te horo'a no te himene. E haere mai te mau tamarii e te feia apî no « Colombie » e rave rahi maire te atea i ni'a i te mahana ve'ave'a no te haapii i te faata'i i te piana. Ua haamata atoa ratou i te ha'uti hoê ana'e rima e tae roa'tu i te taima ua nehenehe ia ratou ia ha'uti e piti rima. E ua rahi atu ta ratou faatusia-raa i ta'u no te haapii i te faata'i i te piana.

Ua hau i te 50 matahiti i teie nei to'u baptizo-raahia. Ua ratere au na te mau vahi e rave rahi i rapae i to'u fenua o Finlande, tera râ, noa'tu te vahi ta'u i haere, te vai ra ihoa te hinaaro i te hoê taata ia ha'uti i te mau himene. Ua patu te reo o te

I roto i ta'u misioni i « Colombie », ua haapii au i te taata ia faata'i i te piana. E haere mai te mau tamarii e te feia apî e rave rahi maire te atea i ni'a i te mahana ve'ave'a, ma te rave i te mau tusia teimaha ia noaa ia ratou te horo'a o te upaupa.

himene i te mau araturu no te ite e no te here i te mau vahi e rave rahi.

I teie mahana, e mea taere rii to'u mau rima e ua roohia i te rumati. E rave rahi mau faata'i upa maitai tei mono ia'u. E mea pinepine to'u metua vahine i te ootoorii ia hi'o ana'e oia i muri i to'u mau matahiti apîraa i roto i te Ekalesia e i te mau tusia tei ravehia e au, te rahiraa maire ta'u i haere, e te mau mea i erehia e au. Ua riarua oia i te mea e, no te toetoe i roohia ai au i te rumati. Tera râ, ua amo vau i ta'u « aroraa » ma te oaoa. Ua ninii au i to'u mau oaoa e to'u mau oto i roto i te himene. Ua haapii au ia ata e ia ta'i na roto i to'u mau manimani rima.

Te himene nei to'u aau ma te mauruuru ia feruri ana'e au e, ua ani mai te Metua i te Ao ra e to'u ho'i mau ti'a faatere i te hoê tamahine apî roa ia rave i te hoê ohipa teimaha roa. Ua tauturu taua piiraa ra ia'u ia roaa te hoê iteraa paari no ni'a i te evanelia e ua ti'a ia'u ia tauturu ia vetahi ê ia ite i te Varua na roto i te himene. Ua riro vau ei faaiteraa papû e, e hinaaro te feia faafariu-apî-hia i te hoê piiraa—noa'tu e tamahine iti na'ina'i o te ite ore i te parau no te piana. Na roto i to'u piiraa matamua, ua ite a'era vau e, aore hoê mea e ore e ti'a i te Atua, e e faanahonahoraa e e opuaraa Ta'na no Ta'na mau tamarii tata'itahi. E na roto i te himene, ua roaa ia'u te hoê iteraa papû aueue ore no ni'a i te evanelia a Iesu Mesia tei faaho'ihia mai. ■



Te mau apooraa paroita

I ROTO I TE OHIPA

Na LaRene Gaunt

Te mau Ve'a a te Ekalesia

Te faaohipa nei te feia mo'a i te mau mahana hopea nei i te mau apooraa paroita e amaa no te haamaitai i te oraraa o te feia nava'i ore.



I te pô o te 22 no me 2011, i roto i te ta'i o te mau pû, ua tae mai te hoê matai puahiohio i ni'a ia Joplin, Missouri, USA, e ua haamou i te mau fare e te ora e rave rahi. Ua pepe ino roa te Paroita Matamua no Joplin i taua matai rorofa'i ra, tera râ, i taua iho taimera, ua haamata te episekopo Chris Hoffman e te apooraa paroita i te tai'o i te mau melo o te paroita.

« Ua ineine noa ta matou faanahoraa no te mea, ua paraparau matou i te reira mau faaineineraa i roto i te apooraa paroita hou a tupu mai ai te fifi », ta'na ia parau. « Ua ti'aturi atoa matou i te Varua no te ite i te ohipa e rave. Ua mutu te mau niuniu uira. Aita e tere faahou te niuniu afa'ifa'i. Ua pure e ua toro matou i te taria i te pahonora, e ua tae mai te reira—i te mau taimera atoa ua tae mai ihoa te reira. E mea mauruuru roa no'u te episekopo, ia faaroo i te mau melo ia parau e, 'Teie ta'u ohipa i rave', eiaha râ, 'eaha ta oe e hinaaro ia rave au ? »

Na te pahonora i Joplin e faaite nei i te mana o te hoê apooraa paroita tahoê. « Te putuputuraa a te apooraa paroita o te hoê ia o te mau apooraa faufaa roa a'e i roto i te Ekalesia », te na reira ra te papa'iraa a Elder M. Russell Ballard no te Püpü no te Tino Ahuru Ma Piti Aposetolo, « e nehenehe i te mau ti'a faatere o te autahu'araa e ite mau püpü tauturu e tauaparau e e faanahonaho e te episekoporaa. ... I roto i te mau apooraa e te mau tomite atoa i roto i te Ekalesia, te ti'aturi nei au e, e



nehenehe i te apooraa paroita e tauturu maitai i te mau tamarii a te Metua ».¹

Tahoêhia e te here e te faaroo

I Puerto Francisco de Orellana, hoê oire iti na'ina'i mo'emo'e i roto i te uru raau no Ecuador, e taamura paari no te here e no te faaroo to te mau melo. Ua riro te apooraa ava'e a te amaa ei faaiteraa i to ratou aupuru. Ua na mua ratou i te haapa'o i te taata e i te mau utuafare, e i muri iho, nahea te mau faanahonahoraa i te tauturu. E tae mai te faaururaa.

E rave rahi te mau melo e titau ra i te tauturu no te imi i te ohipa. Ua itehia i te apooraa amaa e, e mea pinepine te mau fifi o te mau melo i te matara noa ia ratou iho. A paraparau ai te apooraa i te mau hinaaro o te hoê metua vahine otahi e ta'na tamahine apî e te tino ma'ima'i, ua ite te peresideni o te Sotaiete Tauturu i te hoê ohipa e nehenehe i te metua vahine ia rave ma te parahi noa i piha'i iho i ta'na tamahine.

Ua ti'aturi atoa te apooraa amaa i ni'a i te mau rave'a a te Ekalesia, mai te mau materia no te Faanahoraa Ohipa Toroa a te Ekalesia.² Ua haamau ratou i te hoê piha haapiiraa tei faaterehia e te hoê melo o te amaa, e ua tauturu te reira i te tahi atu melo o te amaa ia roaa te hoê ohipa maitai a'e.

Teie ta Ramiro Reyes, tauturu matamua i roto i te



TE MAU MEA FAUFAA NO TE MAU APOORAA MAITAI

I roto i ta'na buka *Counseling with Our Councils*, ua horo'a mai Elder M. Russell Ballard no te Püpü no te Tino Ahuru Ma Piti Aposetolo i teie nau mana'o tauturu e toru :

« *A tahi, a faatumu i ni'a i te mau mea tumu* ».

A pee i te mau arata'iraa i roto i te *Manuel 2: Administration de l'Eglise*, i te pene 4, o te ite-atoa-hia ra i ni'a i te itenati i roto i te tuhaa « *Servir dans l'Eglise* » o te tahua itenati LDS.org.

« *A piti, a faatumu i ni'a i te taata, eiaha i ni'a i te faanahoraa* ». A tamau noa i te rave i « *te faaôraa mai i te mau melo apî, te faaitoitaraa i te feia aita e haere faahou mai nei i te Ekalesia, te mau mea no te feia apî, te oraraa i te pae faaravairaa faufaa o te mau melo tata'itahi, e te mau hinaaro o te mau metua vahine otahi e te mau vahine ivi* ».

« *A toru, ua riro te mau apooraa ei tau'araa parau e ei faaiteraa i to te tahi e to te tahi mana'o, eiaha te faaita-noa-raa i te parau e te haapiiraa*. A faatupu i te hoê huru mataratara noa i roto i te apooraa, ia riro te mau taata atoa e te püpü ho'i ei mea faufaa, e te mau mana'o ei mau mana'o faufaa ia ». E mea taa ê to te tahi e to tahi mana'o e te huru oraraa, no reira, e nehenehe i te taata tata'itahi e tuu mai i te mau mana'o maitai roa no te ite i te mau hinaaro o te mau melo.

A hi'o Elder M. Russell Ballard no te Püpü no te Tino Ahuru Ma Piti Aposetolo, *Counseling with Our Councils* (1997), 106, 109, 112.



peresedeniraa amaa, i parau no ni'a i te apooraa amaa: « E mauhaa matou i roto i te rima o te Fatu. E faaoti Oia i Ta'na mau opuaraa na roto i ta matou mau ohipa ».

Te hoê e'a e tae ai i te hiero

I Liverpool, New York, USA, a haere ai o Melissa Fisk te peresideni Paraimere, i te putuputuraa a te apooraa paroita, ua ite oia i to'na mana. A rave mai ai oia i te hoê buka nota i roto i ta'na pute, ua ite oia i te hoê hoho'a o na tamarii Paraimere e 28 i ni'a i te mau taahiraa o te hiero no Palmyra New York. Ua î roa ratou paatoa i te puta manu patia. No te tahi maa taima iti, ua faafariu ê te hoho'a i to'na mana'o i te putuputuraa, e ua

haamana'o oioi oia i te mahana a haere ai te Paraimere paroita i Palmyra no te fana'o i te hau mo'a o te mau aua hiero. Te fifi ra, i te taima a hohora ai te mau tamarii i to ratou mau ahua taoto, ua tano te reira i ni'a i te hoê ofaaraa manu patia.

Ia oti te mau tamarii atoa i te rapaauhia, ua ani atura te mau ti'a faatere i te mau tamarii ia tapea i te hiero. Ua patoi te mau tamarii no te mea ua riarua ratou oi vai â te tahi atu mau manu patia. No reira, ua ti'a a'era te mau metua e te mau ti'a faatere i ni'a i te hoê reni e ua hamani i te hoê haereraa e tae atu ai i te hiero. Na te reira i horo'a i te mau tamarii i te itoito no te haere i mua.

A ho'i faahou mai ai te mana'o o Melissa i ni'a i te putuputuraa a te apooraa paroita, ua feruri oia e, « Ahani a'e pa'i e, e nehenehe i te mau taata atoa e haatihia na te mau hoa

O VAI TO ROTO I TE APOORAA PAROITA E AORE RÂ, TE APOORAA AMAA ?

E ti'a atu teie feia faatere no te autahu'araa e no te mau pûpû tauturu i te apooraa no na ti'araa e piti i muri nei : (1) ei mau melo no te apooraa paroita no te tauturu i te episekopo ia imi i te mau rave'a no te faatitiaifaro i te mau hinaaro e te mau mana'ona'oraa a te paroita, e, (2) ei mau ti'a no

Te episekopora

Na te episekopora e haapa'o i te taatoaraa o te mau melo o te paroita, te mau pûpû e te mau faaoaoaraa. Na te episekopo e peresideni i te apooraa paroita, tera râ, e maitai atu ta'na mau faaotiraa mai te mea e, e tauaparau oia e to'na na tauturu e tae noa'itu i te apooraa paroita, i te taima e titauhia.

(A hi'o Manuel 2 : Administration de l'Eglise, 4.1 ; 4.2.)

Te papa'i parau no te paroita

« Na te papa'i parau o te paroita e tapa'o i te mau titaaraa e te mau faaotiraa i ravehia i roto i te mau apooraa a te paroita. ... E horo'a atoa mai oia i te mau numera ta'na e iriti mai i roto i te rouira a te paroita ».

(Manuel 2, 4.6.4.)

Te papa'i parau faatere

« Na te papa'i parau faatere e faaineine i te mau tapura ohipa no te mau apooraa a te paroita. ... E nehenehe atoa i te episekopo e ani ia'na ia tauturu i roto i te peeraa i te mau ohipa i faauehia i te mau melo o te apooraa. ... E nehenehe atoa [ta'na] e faanaho ia tere maite te mau ohipa i rotopu i te apooraa paroita e te tomite faatere o te autahu'araa ».

(Manuel 2, 4.6.5.)

Feia faatere no te autahu'araa a Melehizedeka

E hopoia na te tia'i pûpû tahu'a rahi e na te peresideni o te pûpû peresibutero te haapa'oraa i te totauturu pae varua e te pae tino o te mau tane ta ratou e faatere ra. E nehenehe ta te episekopo e horo'a na te feia faatere o te autahu'araa e rave i te tahi mau ohipa ta'na e rave i rotopu i te mau utuafare.

(A hi'o Manuel 2, 7.)

Te taata faatere misioni paroita

Na te taata faatere misioni paroita e faaau i te mau tautooaraa a te paroita no te rave i te ohipa misionare. E haa oia i piha'i iho i te mau misionare rave tamau e te mau misionare paroita. E riro te episekopo i te ani ia'na ia arata'i i te mau aparauraa no ni'a i te ohipa misionare i roto i te mau apooraa paroita.

(A hi'o Manuel 2, 5.1.3)

e te mau ti'a faatere maitai a haere ai ratou i te hiero ».

Ua tapuhia ta'na mana'ona'oraa a faaroo ai oia i te peresideni o te Sotaiete Tauturu i te parau i te tahi mau mana'o no ni'a i te hoê tuahine nava'i ore: « Aita oia i tae mai i te pureraa i te Sabati i ma'iri a'enei. E imi au i te rave'a ia haere to'na na tuahine hahaere e faaite ia'na no te tere hiero i faanahonahohia ».

« Na roto mai ratou i te tahi mau ohipa fifi », ua tuu faahou mai te peresideni o te pūpū peresibutero. « E farerei au i to ratou na taea'e hahaere e e hi'o atu ai, te vai ra anei te hoê ohipa e nehenehe ta tatou e rave ».

« E nehenehe i te feia apî e tauturu na roto i te haapa'oraa i te tamarii », ua na reira te peresideni Feia Apî Tamahine.

A hi'o ai o Melissa i ni'a i te mata o te mau melo o te apooraa paroita, ua ite oia i te hoê here e te mana'ona'o

rahi. Ua ata oia « Ua faaineine te Fatu i te mau rave'a no Ta'na mau tamarii ia paruruhia e ia herehia », i to'na ia mana'o. « Te apooraa paroita ! »

Mai i Joplin, i Puerto Francisco de Orellana, e i Liverpool, te tamau noa nei â te feia faatere o te Ekalesia na te ao atoa nei i te farii i te mau haamaitairaa o te mau apooraa paroita e amaa. Mai te mea e, e na reira ratou, e ahu ia ratou i te mana maere o teie mau apooraa no te tauturu i te Fatu ia haamaitai i Ta'na mau tamarii e ia faaoti i Ta'na ohipa. ■

TE MAU NOTA

1. M. Russell Ballard, *Counseling with Our Councils: Learning to Minister Together in the Church and in the Family* (1997), 102.
2. *The Career Workshop Participant's Workbook* (Buka no. 35163) e roaa i ni'a i te itenati store.lds.org, i te Fare Hooraa Buka, e aore râ, i roto i te mau pū tuatapaparaa ohipa a te Ekalesia.

ta ratou pūpū. E haa amui ratou i roto i te here no te tavini e no te haapuui i te mau taata e te mau utuafare i roto i te paroita e aore râ, i te amaa. (Te mau faahitiraa no ni'a i te paroita e te episekoporaa, no te mau amaa e te mau peresideniraa amaa atoa ia te reira mau parau.)

Te peresideni no te Sotaiete Tauturu

E ti'a te peresideni no te Sotaiete Tauturu no te mau vahine i roto i te paroita tei hau te matahiti i te 18. E imi oia i te mau rave'a atoa ia tauturu i te mau vahine ia faarahi i to ratou faaroo e to ratou huru parau ti'a, ia faaitoito i te mau utuafare e te mau nohoraa, e ia tauturu i te feia nava'i ore.

(A hi'o Manuel 2, 9.)

Peresideni no te Feia Apî Tamaroa

E imi te peresideni no te feia apî tamaroa i te mau rave'a no te haapuui i te feia apî tamaroa o te paroita mai te matahiti 12 e tae atu i te 18. Ma te tauturuhia e to'na na tauturu, e tauturu oia i te peresideniraa o te Autahu'araa a Aarona (te episekoporaa) e e hi'opo'a ho'i oia i te faanahoraa Scout i te vahi te vai ra te reira.

(A hi'o Manuel 2, 8.3.4)

Peresideni no te Feia Apî Tamahine

E imi te peresideni no te feia apî tamahine i te mau rave'a no te haapuui i te feia apî tamahine mai te 12 matahiti e tae atu i te 18. E hopoia na'na « te tautururaa i te feia apî tamahine tata'itahi ia vai ti'amâ no te rave e no te haapa'o i te mau fafauraa mo'a e ia farii i te mau oro'a o te hiero ».

(Manuel 2, 10.1.1.)

Peresideni no te Paraimere


E ti'a te peresideni Paraimere no te mau tamarii mai te 18 ava'e e tae atu i te 11 matahiti. E riro ta'na hi'oraa ei tautururaa i te taime a feruri ai te apooraa paroita i te hoê parau no ni'a i te mau tamarii o te paroita.

(A hi'o Manuel 2, 11.)

Peresideni no te Haapiiraa Sabati

Tei te peresideni o te haapiiraa sabati te hopoia no te mau haapiiraa evanelia atoa i te taime no te haapiiraa sabati. « E haere atoa mai te peresideni o te haapiiraa sabati i te apooraa paroita ma te ineine no te horo'a i te tahi mau rave'a e ti'a ai i te mau melo ia haamaitai i te haapiiraa mai e te haapiiraa'tu i te fare pureraa e i roto i to ratou utuafare ».

(Manuel 2, 12.2.2.)



Na Rosemary M. Wixom
Peresideni Rahi no te Paraimere

Te raveraa i te taima no te paraparau e no te faaroo

Ta tatou tautooraa ia faatupu i te aparauraa maitai i teie mahana, e haamaitai te reira i to tatou utuafare e a muri noa'tu.

I roto i te hoê ao maitai roa, e ho'i te mau tamarii paatoa i te fare i muri a'e i te haapiiraa no te farii i te oaoa no te mau faraoa monomona i oti noa mai i te hamanihia, no te hoê hapaina û toetoe maitai, e te hoê metua vahine tei ineine no te horo'a i te taima no te paraparau e no te faaroo i ta'na tamarii ia faati'a mai i to'na mahana. Aita tatou e ora nei i roto i te hoê ao maitai roa, no reira, e nehenehe ta outou e faaore i te faraoa monomona e te û, mai te mea e, e hinaaro outou, eiaha râ e faaore i te « rave i te taima no te paraparau e no te faaroo ».

E piti ahuru ma iva matahiti i ma'iri a'enei, ua haape'ape'a te Peresideni James E. Faust (1920–2007), Tauturu Piti i roto i te Peresideniraa Matamua, i te mea e, e mea iti roa te taima e amuihoê ai te utuafare. A feruri na e—29 matahiti i ma'iri a'enei—ua parau oia i roto i te amuiraa rahi : « te hoê o te mau fifi rahi i roto i te mau utuafare i teie mahana, maori râ, te iti-noa-raa te taima tatou e parahi amui ai ... Te taima o te vai amuiraa, e taima faufaa rahi ia—e taima ia e titauhia no te paraparau, no te faaroo, no te faaitoito, e no te faaite nahea ia rave i te tahi mau mea ».¹

Mai te mea e, e rave tatou i te taima no te parahi amui e no te paraparau i ta tatou mau tamarii, e matau tatou ia ratou, e e matau ratou ia tatou. E riro mai ta tatou mau ohipa tumu mau, oia te mana'o mau o to tatou aau, ei tuhaa no ta tatou aparauraa i te tamarii tata'itahi.

Eaha te parau poro'i matamua i to outou aau o ta outou e ma'iti no te faaite i ta outou tamarii ?

Te haapii mai nei te peropheta Mose ia tatou i roto i te Deuteronomi :

« Hinaaro oe i to Atua ia Iehova ma to aau atoa, e ma to varua atoa, e ma to mana'o atoa.

« E teie nei mau parau ta'u e parau atu ia oe i teie nei mahana, ei roto i to aau e vai ai :

« E e haapii tamau maite oe i to mau tamarii i ta'na mau parau nei, o ta oe ia *e parau* ia parahi noa oe i roto i te fare, e ia haere noa oe na te e'a ti'a ra, e ia taoto noa oe ra, e ia ti'a noa oe i ni'a ra » (Deuteronomi 6:5–7; teiaharaa papa'i tei ano'ihia).

E te hinaaro nei au ia parau faahou atu : « E ia amui amui noa oe i te amuraa maa ra ».

Mai te mea e, e hinaaro tatou ia hoê to tatou utuafare e a muri noa'tu, e haamata ia tatou i te reira raveraa i teie mahana. Te horo'araa i te taima no te aparau e ta tatou mau tamarii, o te hoê ia tuuraa faufaa i roto i to tatou utuafare mure ore a haere amui ai tatou na ni'a i te e'a e tae atu ai i te ora mure ore ra.

Ua faaite mai te hoê metua vahine no Illinois, USA, e mea nahea to'na faataaraa i te taima no te paraparau i ta'na mau tamarii :

« I te na'ina'iraa o ta maua mau tamarii, ua matau roa vau i te mata'ita'i i te tahi mau faanahoraa afata teata auhia e au ... Te vahi fifi râ, te taima o te reira mau faanahoraa o te taima atoa ia no te mau tamarii ia haere e taoto

... I te hoê taima ua ite a'era vau e, ua tuu vau i ta'u mau faanahoraa i te reni matamua o ta'u tapura, e ta'u mau tamarii ra, tei raro roa ia. No te tahi taima iti, ua tamata vau ia tai'o i te mau aamu no te taima taotoraa ma



te vaiiho noa i te afata teata ia tere noa, tera râ, ua ite au e, e ere te reira i te mea maitai. A feruri ai au i te mau mahana e te mau hepetoma i mau'a i roto i te mata'ita'iraa i te afata teata, ua haamata a'era vau i te tatara-hapa e ua faaoti a'era vau e tau i te reira. E mea huru maoro to'u haaraa ia tupohe au i te afata teata.

E piti hepetoma to'u tupoheraa i te afata teata, ua ite a'era vau i te māmā o te hopoia. Ua ite a'era vau e, e mea maitai a'e au, e e mea māmā atoa a'e, e ua ite a'era vau e, ua rave au i te ma'itiraa ti'a ».²

E taimē maitai roa te taimē taоторaa no te paraparau.

Teie ta Helamana i parau no ni'a i te mau faehau apî roa, « Ua fatiatia maira ratou ia'u i te mau parau a to ratou mau metua vahine, ua na ô maira: Aita matou i feaa e, ua ite to matou mau metua vahine i te reira » (Alama 56:48).

Na « te mau parau a to ratou mau metua

vahine » i haapii ia ratou. A paraparau ai ratou i ta ratou mau tamarii, ua haapii atu teie mau metua vahine i te parau na te Atua.

Parururaa i te aparauraa i te taata iho

E maitai rahi to roto i te parau, e ua ite te enemi i te mana o te reo parau. E mea au na'na ia faaiti i te varua e tae mai i roto i to tatou fare na roto i ta tatou paraparauraa, te faarooraa, te faaitoitoraa te tahi i te tahi, e te rave-amui-raa i te mau mea e rave rahi.

Ua tamata o Satane i te tapea i te Faaho'i-faahou-raa mai o te evanelia a Iesu Mesia i roto i teie tau tuuraa a tamata ai oia i te tapea i te hoê aparauraa faufaa roa i rotopu ia Iosepha Semita e te Atua te Metua e Ta'na Tamaiti o Iesu Mesia.

Ia au i te mau parau a Iosepha, « Aita vau i maoro i te na reiraraa, ua haruhia vau e te hoê mana tei hau a'e i to'u, e no te puai o taua mana ra i nia iho ia'u, ua tapea-roa-hia to'u arero e aita ta'u e nehenehe ia parau



faahou » (Iosepha Semita—Aamu 1:15).

E hinaaro roa te enemi i te taamu i to tatou arero—te mea atoa e noaa no te tapea ia tatou ia faaite i te mau mana’o o to tatou mafatu i mua i te tahi e te tahi. E mea au na’na ia faaateaa e ia faaapiapi; e mea au na’na ia haamaniania; e mea au na’na ia paraparau noa hoê ana’e taata—te mea atoa e tapea ia tatou ia faaroo i te mahanahana o te hoê reo e te mau mana’o no roto mai i te aparauraa e mata e mata.

Te faarooa i te mea i te aau o ta tatou mau tamarii

Ua aifaito te faufaa no te faarooa e no te parauraa. Ua parau o Elder Jeffrey R. Holland, no te Pūpū no te Tino Ahuru Ma Piti Aposetolo e : « Mai te mea e faaroo tatou ma te here, aita tatou e feruri eaha te mea e parau. E horo’ahia mai te reira ia tatou na roto i te varua e na te mau hoa ».³

Ia faaroo tatou, e ite tatou i roto i te aau o te mau taata i pihā’i iho ia tatou. E faanahoraa ta te Metua i te Ao ra no Ta’na mau tamarii tata’itahi. A feruri na e, e ite tatou i te faanahoraa no ta tatou mau tamarii tata’itahi. Ahani e, ua ite tatou e nahea ia haamaitai i to ratou mau horo’a varua ? Ahani e, ua ite tatou e nahea ia faaitoito i te hoê tamarii ia tae’a to’na huru mau ? Ahani e, ua ite

tatou e nahea ia tauturu i te tamarii tata’itahi ia tau i te faaroo tamarii ei iteraa papū ?

Nahea tatou e ite ai ?

E haamata tatou i te ite na roto i te faarooa.

Ua parau te hoê metua tane no te feia mo’a i te mau mahana hopea nei : « E maitai rahi a’e ta’u e rave ia faaroo vau i ta’u mau tamarii i te paraparauraa ia ratou ... Ua haapii maite au e, aita ta’u mau tamarii e hinaaro i ta’u mau pahonora ineine noa, e tei tamatahia, e te paari. ... No ratou, mai te mea e, e nehenehe ta ratou e ui i ta ratou mau uiraa e e paraparau i to ratou mau fifi, e mea faufaa a’e ia te reira i te fariiraa i ta’u mau pahonora. I te rahiraa o te taime, ia oti ana’e ta ratou paraparauraa, mai te mea e, ua faaroo maitai au ia ratou, aita ia ratou e titau faahou i ta’u pahonora. Ua ite a’ena ratou i ta ratou pahonora ».⁴

E taime roa te titauhia no te faatumu i ni’a i te mau mea faufaa a’e. Te paraparauraa, te faarooa, e te faaitoitoraa, eita te reira e tupu oioi mai. Eita te reira e rûhia e aore râ, e tare-nahia—e maitai mai ratou i te roaraa o te tau. E tupu mai te reira ia *rave* amui ana’e tatou i te ohipa : ohipa amui, faatupu amui, e ha’uti amui. E tupu mai te reira ia tupohe ana’e tatou i te afata teata, ia vaiiho ana’e i te mau faa-*api*piraa, e ia haapa’o i te tahi e te tahi.

I teie nei, e ere i te ohipa ohie. Ia faaea ana’e tatou e ia tupohe ana’e i te mau mea atoa, e mea tī’a ia faaineine ia tatou no te mau mea e tupu mai i muri iho. I te haamataraa e riro te maniania ore ei mea teimaha ; e nehenehe e tupu mai te hoê huru au ore. A faaoromai, a tia’i maa tetoni iti, e i muri iho, a oaoa na ra. A horo’a i to outou mana’o atoa i ni’a i te feia e haati ra ia outou na roto i te uiraa i te hoê uiraa no ni’a ia ratou, e i muri iho a haamata i te faaroo. E te mau metua, a paraparau i te hoê mea auhia e ta outou tamarii. A ata no ni’a i te mau mea i tahito ra—e a moemoea i te mau mea a muri a’e. E nehenehe i te hoê aparaparauraa mau e iriti i te hoê aparauraa maitai.

Faataa i te ana’iraa no ta outou opuaraa mure ore

I te pu’e tau faatupuraa raau i ma’iri a’enei, ua ratere au i roto i te hoê pihā na te feia apī

tamahine, ua ani te orometua i te piha haapii-
raa ia papa'i i ta matou na ohipa tumu mau e
10. Ua haamata vitiviti au i te papa'i. Te fa'i nei
au e, to'u mana'o matamua o teie ia « Numera
1 : tamâ i te afata ume no te penitara i roto i te
piha tunuuraa maa ». Ia oti ta matou mau ta-
pura i te hamanihia, ua ani maira te ti'a faatere
no te feia apî tamahine ia matou ia faaite i te
mau mea ta matou i papa'i. O Abby te parahi
ra i piha'i iho ia'u, no ti'a noa a'enei to'na
matahiti i te 12. Teie te tapura a Abby :

1. Haere i te fare haapiiraa tuatoru.
2. Ia riro ei taata faaunauna i roto i te fare.
3. Haere i te misioni i Initia.
4. Faaipoipo i roto i te hiero i te hoê misio-
nare tei faaoti i te misioni.
5. Farii e pae tamarii e te hoê fare.
6. Tono i ta'u mau tamarii i te misioni e i te
haapiiraa tuatoru.
7. Ia riro ei mama ruau « horo'a faraoa
monamona ».
8. Aupuru rahi i te mau mootua.
9. Haapii â i te evanelia e oaoa i te oraraa.
10. E ho'i e ora i piha'i iho i te Metua i te Ao ra.

Na ô atura vau e, « Mauruuru e Abby. Ua
haapii mai oe ia'u ia hi'o i te faanahoraa a te
Metua i te Ao ra no tatou paatoa. Ia ite ana'e
outou e, te vai ra to outou haerea, noa'tu te
mau tipuura, AITA outou e FIFI. Mai te mea
e, ua haamauhia to outou haerea i ni'a i te
opuaraa rahi—oia ho'i, te faateiteiraa e te ho'i-
raa i piha'i iho i te Metua i te Ao ra, e tae mau
outou i reira ».

I hea te roaaraa ia Abby teie ite i te opuaraa
mure ore ? E haamata te reira i roto i to tatou
noharaa. E haamata i roto i to tatou utuafare
Ua ani au ia'na, « Eaha ta outou e rave i roto i
to outou utuafare no te haamau i te reira mau
ohipa tumu mau ? »

Teie ta'na pahonora : « Taa ê noa'tu te tai'o-
raa i te papa'iraa mo'a, te tuatapapa atoa nei
matou i te *Aporo i Ta'u Evanelia* ». E ua parau
mai oia e, « E mea paraparau roa matou—i te
pureraa pô utuafare, i te taima tamaaraa amui,
e i roto i te pereoo a tere noa ai te pereoo ».

Ua papa'i o Nephi e : « Te paraparau nei
tatou i te Mesia, e te oaoa nei tatou i te Mesia,

e te a'o nei tatou i te parau a te Mesia ». No
te aha ? « Ia ite ta tatou mau tamarii i te tumu
e hi'ohia'tu e ratou no te matararaa i ta ratou
mau hara » (2 Nephi 25:26).

Paraparau, faaroo, faaitoito te tahi i te tahi,
e haa amui ei utuafare, na te reira e haafatata
ia tatou i to tatou Faaora, te here nei ia tatou.
Ta tatou tautooraa no te aparau maitai a'e i
teie mahana—i teie iho mahana—na te reira
e haamaitai i to tatou utuafare mure ore. Te
faaite papû nei au e, mai te mea e, e para-
parau tatou i te Mesia, e oaoa atoa tatou i
roto i te Mesia e i roto i te horo'a o te tarae-
hara. E ite ta tatou mau tamarii « i te tumu e
hi'ohia'tu e ratou no te matararaa i ta ratou
mau hara ». ■

*No roto mai i te haapurororaa peeutari o te hoê a'oraa
no te hoê amuiraa titi no Roto Miti tei horo'ahia i te
24 no atopa 2010.*

TE MAU NOTA

1. James E. Faust, « Enriching Family Life », *Ensign*,
Me 1983, 41.
2. Susan Heaton, « Talk Time Instead of TV Time »,
Ensign, Atopa 1998, 73.
3. Jeffrey R. Holland, « E ei ite hoi outou no'u », *Liahona*,
Tiurai 2001, 16.
4. George D. Durrant, « Pointers for Parents : Take Time
to Talk », *Ensign*, Eperera 1973, 24.



TE MAU BLUEBERRIES E TE BUKA A MOROMONA

Tau matahiti i ma'iri a'enei ua faanuu matou mai te hoê vahi oire haere atu i ni'a i te hoê fenua faaapu i rapae i te hoê oire iti e te hau. I te tahi a'e pae te vai ra te hoê faaapu blueberry o te ore e atuatu-faahou-hia ra, e na roto i te tahi mau hoa o te fatu faaapu, ua fariihia matou ia pafa'i i te mau blueberries atoa ta matou e hinaaro.

E rave rahi poipoi i te mau hepetoma atoa i taua pu'e tau mahana-hana ra, ua haaputu matou i te mau patete e te mau pute i roto i te pereoo, e ua pau ia matou hoê hora

oaoa e te au maitai no te pafa'i i te mau blueberries. I te hoê poipoi aita ta maua tamaiti hopea o Hyrum i hinaaro roa ia haere mai na muri iho ia matou. Ua papû ia'na e, ua pau te mau blueberries atoa i te pafa'ihia e matou e e pau te taime ia haere faahou. Tera râ, ua hitimahuta oia i te iteraa e, ua rahi atu â te mau blueberries. E pûpû taatoa te vai ra i te mau vahi aita oia i hi'o maitai, e te vai ra te tahi mau huero maa pape maitai te tere noa ra i ni'a i te mau amaa ta'na i papû maitai e, ua pafa'ihia e oia na reira na mua a'e.

I taua atoa area taime ra, ua titau to matou feia faatere no te feia apî paroita i te feia apî ia tai'o hope roa i te Buka a Moromona hou a haamata faahou ai te haapiiraa i taua ava'e atete ra. Ua hopoi mai ta maua mau tamarii i taua titauroa ra i te fare, e ua amui atu to matou utuafare taatoa i roto i taua ohipa ra.

Aita i maoro te otiraa ia matou te tai'oraa i te Buka Moromona, te tae mai nei ta matou *Ensign* no atete 2005, e i roto i te reira te titau ra te Peresideni Gordon B. Hinckley (1910–2008) ia tai'o i te Buka a

Ua papû roa ia Hyrum e, ua pau roa te mau blueberries i te pafa'ihia e matou, e e mau'a ia to matou taime ia haere faahou i roto i te faaapu.



Moromona na mua i te hopea matahiti. Ua maere roa o Hyrum e to'na taea'e o Joseph—ia feruri e, ua haapa'o a'ena matou i te parau a te peropheta ! I reira, ua faahaamana'o maira to raua nau tuaana o Seth e o Bethany e, ua ani mai te Peresideni Hinckley ia tatou ia tai'o faahou, noa'tu te rahiraa taime ta tatou i tai'o a'ena.

« No te aha ? » te aniraa ia a na tamaroa. « Ua tai'o tatou i te mau parau atoa, eaha'tu â te mea ta tatou e haapii mai taa ê atu i ta tatou i tai'o a'ena ? »

I muri a'e i te tahi taime muhu ore, ua faahiti mai ra hoê taata i te parau no te mau blueberries. « Te haamana'o ra orua i te taime a feruri ai tatou e, ua pau pauroa te mau blueberries i te pafa'ihia e tatou ? Tera râ, i to tatou ho'i-faahou-raa e pafa'i, te vai noa ra â te mau blueberries—te vai noa ra ! Noa'tu ehia taime to tatou haereraa e pafa'i, noa'tu e, aita i maoro a'enei, te vai noa ra â e rave rahi blueberries.

Ua ite oiio a'era matou i te faaau-raa. Mai taua faaapu ra e te rahiraa o te mau blueberries monamona, ua riro te Buka a Moromona ei pihaa tamau no te maa pae varua e ta'na mau parau mau e ti'a ia itehia. No reira, ua haamata faahou matou i te tai'o i te Buka a Moromona.

Na roto i to'u fariiraa i te titauroa a te peropheta, ua tai'o vau i roto i te Buka a Moromona i te mau mea ta'u i tai'o e rave rahi taime na mua a'enei, tera râ, i teie taime, e mea taa ê rii ta'u hi'oraa e aore râ, to'u iteraa i te reira i te mea e, e mea apî to'u vairaa e aore râ, te mau titauroa. Ua ite au e, i te mau taime atoa e tai'o tatou i te Buka a Moromona ma te aau tae, e nehenehe ta tatou e farii i te hoê hi'oraa apî e e haafatata atu i te Faaora. ■

Suellen S. Weiler, Georgia, USA

UA PUTA TE MANA'O E, E TI'A IA'U IA HAERE MAI

Epiti matahiti e te afa i muri a'e i to'u bapetizoraa i « Buenos Aire », « Argentine », te vai noa ra â i roto i to'u taria te parau a te hoê o te mau misionare i haapii mai ia'u : « Ua ite au e, e misionare oe ». Ua haamana'o atoa vau i te pahonora puai ta'u i farii a pure ai au no te ite e, e parau mau anei te mana'o tei haaputapu i to'u aau. I te 20raa o to'u matahiti, ua ite au e mea ti'a ia'u ia faaineine no te hoê misioni.

Nahea râ vau ia riro ei misionare ? E ere roa'tu vau mai taua na taure'a-re'a nehenehe ra tei haapii mai ia'u i te evanelia. E nahea e ti'a ai ia'u ia faaru'e i ta'u ohipa ? I hea vau e noho ai i muri a'e, ia ho'i mai au ? Aita ho'i i ohie no te imi i teie vahi to'u, noa'tu e, e piha iti na'ina'i roa i muri i te fare o te hoê taata.

I te hoê ahiahi, a ho'i ai au i te fare, ua puta faahou mai teie mau mana'o e teie mau feaaraa i roto i to'u feruriraa. Ia tae au i te fare, ua tamata vau i te rave i te hoê faaotiraa. Ua faaoti a'era vau e tuturi i raro e e pûpû i te hoê pure no te ani i te tauturu. A na reira ai au, ua puta maira te hoê mana'o puai i roto ia'u ia haere e hi'o ia Leandro, hoê hoa teie tei riro e puai rahi no'u i roto i te mau taime pe'ape'a.

Tera râ, no te faaara ia'na i te maororaa pô, ua otiatia rii au i taua mana'o ra. Ua ite au e, e ti'a oiio oia i te poipoi no te haere i te ohipa, e no reira, aita vau i opua e patoto i ni'a i to'na opani i taua hora ra. Ua hutihuti noa to'u mana'o, tera râ, ua tamau noa vau i te feruri e haere e hi'o ia'na. Tera râ, ua faaoti au ia haamo'e i te reira.

E ua faaoti au e hahaere e faaati i te aroa no te hutihuti i te matai apî. Haamana'o a'era vau e, aita vau i tamau i



I to'u tomoraa i roto i te fare, te ite nei au ia Leandro te parahi noa ra i roto i to'u piha. Ua tae maira te Varua i ni'a ia'u, e e au e, ua mau roa to'u hutiraa aho.

to'u opani, no reira, ua haamata a'era vau e ho'i mai i te fare. I to'u tomoraa i roto i te fare, te ite nei au ia Leandro te parahi noa ra i roto i to'u piha. Ua tae maira te Varua i ni'a ia'u, e e au e, ua mau roa to'u hutiraa aho. I roto i te hoê reo pe'ape'a, ua ani atura vau ia'na e, « Eaha to oe tere i ô nei ? »

« Aita vau i ite », ta'na ia parau. « Ua puta noa mai te mana'o e, e mea ti'a ia'u ia haere mai e hi'o ia oe ».

Ua parau atura vau ia'na i te mau mana'o feaa i roto ia'u no ni'a i te hoê misioni. Ua faaite maira oia i to'na iteraa papû e ua faaitoito maira ia'u. E ua tauturu maira oia ia'u ia faa'i i ta'u mau parau no te misioni, ta'u ia i hopoi atu i te episekopo ra i te poipoi a'e. E piti ava'e i muri mai, ua faarii a'era vau i to'u piiraa i roto i te Misoni no Salta i « Argentine ».

Ua ite au e, ua riro to'u hoa ei mauhaa i roto i te rima o te Fatu i taua pô ra, e ma to'u aau atoa ua ite au e, te faaroo mai nei te Metua i te Ao ra e te pahono nei ho'i Oia i te mau pure te pûpûhia nei ma te aau tae e ma te hinaaro mau. ■

Aldo Fabio Moracca, Nevada, USA

E POHE AU !

Etuati au i roto i te hoê fare utuuturaa, e i te hoê mahana ua farii au i te hoê niuniu no ni'a i te hoê taata ma'i o Bill te i'oa, no tapu-noa-hia a'enei oia. Ua titauhia ia afa'i ia'na i roto i te hoê fare utuuturaa papû, tera râ, ua î roa taua fare utuuturaa ra, e no reira, ua afa'ihia mai oia ia'u ra.

Aita i maoro te tae mai nei taua ma'i ra e to'na utuafare. Ua topa to'u hau i to'u iteraa'tu e, e mea itoitoe oia, e mai te mea ra, e ere i te mea fifi roa.

Ia oti te hi'opo'araa ia'na e te faaiteraa i to'na piha ia'na e i to'na utuafare, ua haere au i roto i te piha ohiparaa no te papa'i i te tahi mau nota i ni'a i ta'na parau. I te taime a haamata ai au i te papa'i, ua faaroo a'era vau i te hoê reo i te na ô raa e, « A ho'i i roto i to'na piha ». Ua faaea

vau i te papa'i e ua hi'o vau i muri ia'u. Aita hoê taata i reira. Ua feruri a'era vau e, e mana'o noa teie no'u, i taua iho taime ra, ua faaroo faahou vau i te reo no te piti o te taime—e mea huru puai a'e.

Ua horo atura vau i roto i te piha o Bill, e ite atura vau e, ua oru roa to'na arapoa, e ua fifi roa oia no te huti i te aho. Ua feruri au e, ua puta to'na uaua arapoa, no reira, ua taumi au i to'u rima atau i ni'a i to'na arapoa, e ua niuniu i te taote uaua i to'u rima aui, e ua haere mai oia e rave i ta'na ohipa. Ua parau maira te taote e, e tono mai oia i te hoê pûpû i ni'a nei no te rave oioi ia Bill. « E eiaha e tatara i to oe rima ! » ta'na ia parau.

A taumi noa ai au, ua ite atura vau i te hoê buka na te Ekalesia i piha'i iho i te ro'i o Bill. « E melo oe no te Ekalesia ? » Ta'u ia uiraa.

Ua tamata oia e ta'iri'iri i te upoo,

e ua parau maira e, e rave ohipa hiero oia i roto i te Hiero no Atlanta Georgia. Ua tahe maira te tahi pape mata e na ô maira oia, « E pohe au ! »

Ua parau atura vau ia'na e, eita oia e pohe, ma te parau papû atu e, « E faaipoipohia vau i roto i te hiero no Atlanta i te ava'e i muri nei, e e tae atoa mai oe i reira ». Ua tae maira te pûpû taote tapu e ua afa'i atura ia Bill.

I roto i te faaineineraa o to'u faaipoiporaa i te ava'e i muri iho, ua fatata roa o Bill i te mo'ehia ia'u, to'na ho'i tera mahana ra, ua fifi oia i te tahi mau raau. A arata'i ai te peresideni vahine ia'u i roto i te piha taatiraa i to'u mahana faaipoiporaa, ua ite atura vau i te hoê hoho'a mata matauhia e au : te vahine a Bill, o Georgia. I to'u parauraa'tu ia'na e, te faaipoipohia ra vau, ua haere atura oia e tii ia Bill. Tau taime rii hou a haamata ai te oro'a, ua matara maira te opani e ua tomo maira oia i roto. I muri a'e e rave rahi hepetoma o te mau uiui upoo, te topiha'e e te rohirohi, ua afaro mai o Bill i taua mahana ra no te ratere i te hiero, ma te ite ore e, o te mahana ia no to'u faaipoiporaa.

E piti matahiti i muri mai, ua piihia maua o ta'u tane ei rave ohipa hiero i roto i te hiero no Nashville Tennessee. I to maua taeraa'tu i te hiero no te faataaraa, ua iriti mai te hoê taata i te opani no'u e ua na ô maira e, « Maeva i te hiero no Nashville ! » O te Taea'e Bill ia.

Ua tavini amui matou e toru matahiti te maoro. Ua parau o Bill i te mau taata atoa e, ua faaora vau ia'na, tera râ, ua ite au e, na te Fatu i faaora ia'na. Na roto i taua ohipa ra, ua haapii mai Oia ia'u i te faufaa ia haapa'o i te mau muhumuhu o te Varua. ■

Ramona Ross, Tennessee, USA



Ua parau maira te taote e, e tono mai oia i te hoê pûpû i ni'a nei no te rave oioi ia Bill. « E eiaha e tatara i to oe rima ! » ta'na ia parau.

E TI'A PAHA IA TATOU IA PURE

I roto i te pu'e tau faahoturaa raau I o te matahiti 1975, te ora ra to'u utuafare e o vau nei i ni'a i te mau fenua faaapu ruperupe no Rheinland-Pfalz i Heremani i te pae tooa o te ra. I te ho'e mahana Sabati, te ho'i ra matou i te fare na te pureraa mai, ua tapea matou i te ho'e vahi no te hi'o i te ho'e pereoo uira tei taahuri i te pae purumu i te hiti o te ho'e uru raau. Ua poiri roa i roto i te uru raau no te mea, e mea me'ume'u roa te uru raau e te haamata atoa ra i te pō.

Ia oti ta matou hi'oraa i te pereoo ati, ua ho'i maira matou i to matou pereoo e ua ite a'era matou e, ua mau i roto i te vari paruparu. Eita ta'u e nehenehe e otohe, e nehenehe râ ta'u e haere i mua—i roto i te uru raau. Ua tere a'enei matou na roto i te reira uru raau e ua ite matou e, e rave rahi purumu i roto i te uru raau tei tu'ati te tahi i te tahi, e e nehenehe e ho'i faahou mai i rapae, no reira ua faaoti a'era vau e tere i mua i roto i te poiri.

Aita i maoro, ua ite a'era vau e, ua hape taua faaotiraa ra. E mea rahi roa te apoopoo i ni'a i te purumu e ua i i te vari paruparu, e te haere noa'tura i te atearaa i roto i te uru raau poiri. Ua tamata vau i te tapea noa i te huru tere, oi ia tapea noa'tu matou, e mure roa te pereoo. Ua ite a'era vau i te ho'e puu repo teitei rii i mua ia'u e o ta'u i mana'o e, e mea paari no te vaiiho i te pereoo. To'u hinaaro, o te tatara ia i te pereoo i rapae i te vari paruparu ia nehenehe ia'u ia feruri rii. Ua oua atura te pereoo i rapae i te vari paruparu.

Ua tupohe au i te pereoo e ua haere mai i rapae. Ua tupohehia te mori pereoo, e aita e nehenehe e ite i te ho'e mea. Ua tu'ama faahou vau i te mau mori o te pereoo, ua rave maira i te mori pata, e ua hi'ohi'o a'era vau

Ua tu'ama faahou vau i te mau mori o te pereoo, ua rave maira i te mori pata, e ua hi'ohi'o a'era vau i te pereoo, e ua faaoti ihora e, te rave'a maitai a'e, o te ho'i faahou ia i roto i te uru raau.

i te pereoo, e ua faaoti ihora e, te rave'a maitai a'e, o te ho'i faahou ia i roto i te uru raau na ni'a i te e'a ta matou i tere mai nei.

Ua ho'i faahou vau i muri roa, ua haapu'ai i te matini o te pereoo, e ua oua faahou i ni'a i te purumu, e ua mure roa i roto i te vari paruparu. I teie taime, ua fifi mau matou. E mea poiri e te maniania ore i rapae i te pereoo. Ua parahi noa vau i roto i te pereoo e ta'u vahine e toru tamarii riarua.

Ua ani au i ta'u vahine e mana'o anei to'na. Tau taime i muri mai, na ô maira oia, « E ti'a paha ia tatou ia pure ». Ua mārû a'era te mau tamarii fatata i tera iho taime. Ua pûpû atura vau i te ho'e pure haehaa e te oto râ no te ani i te tauturu. I to'u pureraa, ua puta maira te ho'e mana'o ma te papû i roto i to'u feruriraa : « A tamau i te fifi i ni'a i te huiira ».

Na ta'u vahine e tapea i te mori pata ma te ti'a noa i roto i te vari paruparu e 25 tenetimetera i te honu, i roto i to'na ahu pureraa, e na'u e tamâ i te huiira no muri e e tamau ai i te mau fifi. Ma te faaroo e te ti'aturi, ua pure faahou matou e ua faaharuru i te pereoo. Ua tere marû noa matou na roto i te vari paruparu e i te pae hopea ua tae mai matou i ni'a i te e'a mau.

No to'u oaoa i te mea e, ua matara mai matou mai roto mai i te vari paruparu e i te poiri, fatata i te mo'e-hia ia'u e, na vai i tauturu ia matou ia matara mai i rapae i te uru raau. Na ta'u tamahine iti e pae matahiti i faahaamana'o mai ia'u i te na ô raa e, « Papa, e pahono mau te Metua i te Ao ra i te mau pure, e ere anei? » ■

Scott Edgar, Utah, USA

Ua matau te mau taata atoa ia Bleck

Na Adam C. Olson

Te mau Ve'a a te Ekalesia

No Honoura « Bleck » Bonnet, ua riro te basket ei pū taria no'na. I te 15raa o to'na matahiti, ua haamata o Bleck i te itehia i Porinetia Farani—te hoê ia o te mau feia ha'uti ite roa a'e i roto i te hoê o te mau pūpū maitai roa a'e i roto i te tuhaa taata paari o te fenua. Noa'tu e to'na i'oa pii no roto mai ia i te ta'o peretane ra *black*, tei papa'i-hapehia, are'a to'na tareni ra, aita ia i hape.

E ere râ te reira noa ta'na e hinaaro. Ua hinaaro oia e haere e ha'uti ei « professionnel » i Europa. E hau atu i te mau mea atoa, ua hinaaro oia ia haru mai i te fetia auro i te Ha'utiraa no Patifita Apatoa.

E mea maoro to Honoura « Bleck » raua o Myranda ha'utiraa i te « basket » i Tahiti.

Te hoê noa mea e tapea ra ia'na maori râ te Ekalesia.

E tane i roto i te misioni

Noa'tu e, te pūpū a Bleck o te pūpū ia i paturuhia e te Ekalesia, e ere o Bleck i te mea anaatae roa i te Ekalesia e aore râ, i te piiraa a te peropheta i te mau tamaroa haapa'o e te maitai ia tavini i te hoê misioni.

Ua parau a'ena oia i to'na episekopo e, eita oia e haere i ta'na misioni. Aita oia i taa e, nahea e ti'a ai ia'na ia ha'uti ei « professionnel » mai te mea e, e faaru'e oia e piti matahiti.

Taa ê atu i te reira, te mau Ha'utiraa no Patifita Apatoa—o te faatupuhia i te mau maha matahiti atoa, e tupu ia i te taime tei roto oia i te misioni, e ua hinaaro roa hoi te Amuitahiraa « Basket » no Tahiti ia ha'uti oia i roto i te pūpū ma'iti no te fenua. Ua ti'a ia'na ia haamamu roa i te mau parau ta to'na papa e parau i te mau taime atoa e haamata o Bleck i te faateitei ia'na : « Ua ite te mau taata atoa ia Bleck, aita râ ta'na e auro ».

E faahiti te metua tane o Bleck, o Jean-Baptiste, i teie mau parau ma te ataata. Tera râ, e vanahia o Bleck ia faaroo ana'e oia i te reira. Ua riro hoi te reira mau parau e faahaamana'orraa e, noa'tu e, ua ite te mau taata atoa tei au i te « basket » ia'na, aita râ to'na e fetia auro no te mau ha'utiraa. Haru mai to'na metua tane i te fetia auro i roto i te pūpū tane i roto i te mau Ha'utiraa matamua no Patifita Apatoa.

Tei ia Bleck te imiraa i te rave'a no te vaiiho i taua mau parau ra. Aita to'na e taime no te tahi atu misioni.





*Ua riro te here o
Bleck i te « basket »
ei tamataraa e ei
haamaitairaa.*



« E roaa te oaoa na roto i te oraraa mai ta te Fatu e hinaaro nei ia ora outou ».

Peresideni Thomas S. Monson, « E horo'a mai te ineine i te mau haamaitairaa », *Liahona*, Me 2010, 67.

Te tauraa te feruriraa, te tauraa te aau

Taa ê noa'tu to'na mau mana'o no ni'a i te hoê misioni, ua haere tamau noa o Bleck i te mau faaoaoaraa a te Ekalesia. I roto i te hoê po oriraa na te Ekalesia i te 16raa o to'na matahiti, ua faaitoito o Bleck no te ani ia Myranda Mariteragi ia ori raua. E tamahine ite atoa o Myranda i te ha'uti « basket »—tei moemoe atoa ia roaa te hoê fetia auro ia'na. Tei roto atoa to'na metua tane i taua pŭpŭ matamua ra i haru mai i te fetia.

I muri noa iho i to'na aniraa, ua hope atoa a'era te pehe. No reira, ua ori raua i te ori i muri iho, o te hopea atoa ia o te oriraa o taua pŭ ra. No reira, aita o Bleck i hinaaro faahou ia hope taua ori ra.

Aita o Bleck i opua e faaiipoipo i roto i te hiero e aore râ, e faaiipoipo i te hoê melo no taua tumu parau ra. Tera râ, ua haamata te reira i te tau i te taima a matau maitai ai oia ia Myranda i roto i na matahiti e piti i muri mai. I te hoê mahana, i te fare o Myranda, ua haru to'na mata i ni'a i te hoê mea tei papa'ihia e Myranda i roto i te Feia Apî Tamahine. Te na ô ra e, « E faaiipoipo vau i roto i te hiero ».

No te hinaaro o Bleck ia Myranda e no te fafauraa papŭ a Myranda ia faaiipoipo i roto i te hiero, na te reira i turai ia Bleck ia hi'o faahou i ta'na mau opuaraa. Ua faaoti a'era oia e haamata i te haapa'o maitai i te Ekalesia. Na roto i ta'na mau faaotiraa, ua rave oia i te mau ohipa i ti'a ai i te Varua Maitai ia haa i roto i to'na oraraa.

Te faaotiraa

Te hoê o taua mau faaotiraa ra, o te faaineineraa ia ia farii i te hoê haamaitairaa patereareha i te 18raa o te matahiti. A faahiti ai te patereareha i roto i te haamaitairaa e, e tavini o Bleck i te hoê misioni e e faaiipoipo i roto i te hiero, ua ite a'era oia i te Varua.

« Ua ite a'era vau e, tera ta te Atua e hinaaro ia rave au », te na reira ra oia.

Noa'tu e, e nehenehe i te pŭpŭ ma'iti o te fenua e haru mai i te fetia auro, ua faaoti o Bleck ma te paturuhia mai e to'na utuafare e, e tuu oia i ta te Atua e hinaaro nei i mua i ta'na e hinaaro nei. Aita i ohie te raveraa i taua faaotiraa ra. E mea teimaha te turairaa ia ha'uti. Ua ite oioi a'era oia e, te faaotiraa ta'na i rave ia haapa'o i te hinaaro o te Atua, e tamahia ia hau atu i te hoê taima.

I muri a'e hoê matahiti to'na taviniraa ei misionare i Tahiti, ua ani maira te taatiraa no te « basket » e, e nehenehe anei ta'na e ho'i mai i roto i te pŭpŭ no te hoê noa ava'e te maoro no te ha'uti i roto i te mau ha'utiraa.

Ua haape'ape'a te peresideni misioni o Bleck i te ohipa e tupu mai i muri a'e i te reira ha'utiraa, oia hoi, e ho'i faahou mai anei o Bleck no te tavini, no reira, ua faauruhia oia ia parau ia'na e, « e nehenehe ta oe e haere mai te mea e, e hinaaro oe, tera râ, eita ta oe e nehenehe e ho'i faahou mai ».

Ua hinaaro roa o Bleck i taua fetia ra, tera râ, e ere atura te hinaaro hoê roa. Ua maitai roa ta'na misioni. Aita oia i hinaaro e faaru'e i ta'na matahiti hopea, noa'tu no te « basket ».

E ua faaea o Bleck.

Ua haru mai te pŭpŭ i te fetia auro.

Ua rau te mau vairaa, hoê noa iho faaotiraa

Ia hope te misioni a Bleck ma te maitai, ua faaiipoipo oia ia Myranda i roto i te hiero no Papeete Tahiti, e ua haamau raua i te hoê utuafare. Ua haamata faahou atoa oia i te ha'uti i roto i te pŭpŭ ma'iti o te fenua.

Te ha'uti atoa ra o Myranda i roto i te pŭpŭ ma'iti na te mau vahine i te ti'araa i mua, e te faaineine ra ia'na no te Ha'utiraa no Patifita Apatoa.

Tera râ, a piri noa mai ai te mau ha'utiraa, ua haamata raua i te feruri e, e mea ti'a ia raua ia fanau i te piti o te tamarii.

Eita e matahiti e tupu mai te mau ha'utiraa, e mea ohie ia faataime i te tahi aiu i te hoê maoraraa e ti'a ai ia Myranda ia ha'uti. E nehenehe hoi i te pŭpŭ vahine e haru mai i te fetia.

Tera râ, ua haapii mai raua e, mai te mea





e, e tuu raua i to raua mau hinaaro i mua i te Atua, e roaa te mau haamaitairaa hau a'e i te rahi i te roaa ia raua na roto i te haapa'oraa i to raua iho mau hinaaro. Ia oti raua i te feruri maite e i te pure, ua faaoti raua ia tuu i to raua utuafare na mua.

I te matahiti 1999, e va'u ava'e hapu to Myranda, ua haru mai te pūpū vahine i te fetia auro.

Ua ite te mau taata atoa ia Bleck

Ua ti'a ia Bleck e o Myranda ia ha'uti i te ha'uti basket i te faito teitei roa i Porinetia Farani i roto i na matahiti hoê ahuru i ma'iri ra, e ua haru mai i te mau au'a e rave rahi, e ua ha'uti i roto i te pūpū ma'iti no te fenua i roto i te mau ha'utiraa no te matahiti 2003 e 2007.

I roto i te mau ha'utiraa no te matahiti 2011, tei roto raua toopiti atoa, tera râ, e taata faaineine te ti'araa o Bleck no te pūpū tane. Are'a o Myranda e te pūpū na te mau vahine, ua haru mai ia ratou i te fetia auro, ua haru mai te pūpū tane i te fetia veo, e ua ere â ia o Bleck i ta'na moemoea i te fetia auro.

I te tahi taime, e uiui noa o Bleck e, eaha te huru o to'na oraraa ahani oia i rave i te mea

ta'na i hinaaro, eiaha râ ta te Atua i hinaaro.

« E mea papû e, e roaa mai te fetia auro ia'u », ta'na ia parau. « Ua ha'uti paha ia vau ei « professionnel », e aore râ, aita ».

Aita râ raua i tatarahapa i te mau faaotiraa ta raua i rave. Aita raua i papû e, e hau a'e anei to raua oaoa.

Te parau ra o Bleck e, « ua faaipoipohia vau i roto i te hiero ». « E vahine maitai roa ta'u, e maha tamarii nehenehe roa, e tei roto noa â vau i te Ekalesia. Aita ta te basket ana'e e nehenehe e horo'a mai i te reira ia'u. E mau haamaitairaa teie tei roaa mai na roto i te tuuraa i te Fatu i mua ».

Na roto i te tuuraa i te Fatu i mua, aita te reira i haamamu i te faaooo a to'na metua tane, ua horo'a mai râ te reira i te tahi auraa apî i taua mau parau ra. Tau matahiti i ma'iri a'enei, a opua ai te taatiraa o te basket e tarena i te mau ha'utiraa i te Sabati, ua putuputu te mau peresideni pūpū no te paraparau i te reira mana'o. Ua ui maira te tahi taata e, « Ua ani outou ia Bleck ? »

Ua faaru'ehia taua mana'o ra.

No te mea ua tuu o Bleck i te Fatu i mua, aita te mau taata atoa i ite noa ia Bleck—ua ite atoa râ ratou i to'na mau ti'aturiraa. ■

No Bleck e o Myranda, ua riro mai te manui-araa i roto i ta raua ohipa tuaro ei tuhaa piti i muri mai i te manuiaraa i roto i to raua utuafare.

Te mau Uiraa & te mau Pahonoraa

« No te aha e mea titau ia'u ia haere i te haapiiraa evanelia, inaha ho'i, e nehenehe noa ta'u iho e tai'o i te mau papa'iraa mo'a ? »

Te vai ra te taatoaraa o to outou oraraa no te tai'o outou ana'e i te mau papa'iraa mo'a, no reira, mai te mea e, te vai ra te haapiiraa evanelia, a fana'o i te maitai o te haapiiraa evanelia no te tuatapapa i te mau papa'iraa mo'a i piha'i iho i te mau orometua e te mau hoa maitai roa i teie nei.

E riro te haapiiraa e te tuatapaparaa i raro a'e i te arata'iraa a te ho'e orometua maitai ei tautururaa ia outou ia farii i te ho'e iteraa ap'i no ni'a i te mau papa'iraa mo'a o ta outou paha e ore e haroaroa maitai roa. E nehenehe atoa i te orometua e faaite mai i te mau haapiiraa a te mau peropheta e a te tahi atu feia faatere, e na te reira e horo'a mai ia outou i te maramarama maitai atu no ni'a i te mau papa'iraa mo'a.

Oia atoa, e mea arearea roa ia haapii mai e ta outou piha haapiiraa. E nehenehe ta outou e paraparau i te mau mea tei itehia e outou na a tai'o ai outou. Te vai ra paha te iteraa o te mau tamarii o te piha haapiiraa tei faariro i te tahi mau irava ei mau irava auhia e ratou. Na roto i to outou faarooraa i to ratou mau iteraa, e nehenehe i te reira e faariro i te mau papa'iraa mo'a ei mea ora no outou. E no to outou tuatapaparaa i te evanelia e o vetahi ê, e nehenehe ta outou e fana'o i teie haamaitairaa i fafauhia mai : « Ia haaputuputuhia toopiti e aore râ, tootoru mai to'u nei i'oa, ... ei reira ia vau i rotopu ia ratou » (PH&PF 6:32).

E haamau atoa te haapiiraa evanelia i te ho'e faanahoraa no ta outou haapiiraa. E tupu te hinaaro i roto ia outou ia tai'o mai te au i te ho'e faito, na te reira ho'i e tauturu ia outou ia faaoti i te buka papa'iraa mo'a tata'itahi. E roaa atoa ia outou i te tauaparau e i te tamau aau i te mau irava tumu o te papa'iraa mo'a. E nehenehe ia outou ia ite papû e, e hau atu â te mau mea e roaa mai ia outou i roto i te mau papa'iraa mo'a na roto i te haereraa i te haapiiraa evanelia i te tahi atu huru rave'a i teie taima i roto i to outou oraraa.

E mau hoa ap'i, e mau mana'o ap'i



I roto i te haapiiraa evanelia e farerei outou i te mau hoa ap'i, e e haafatata outou i te tahi e te tahi, mai te ho'e utuafare. E haapii outou e rave rahi mau mea ap'i o te ore e itehia e outou ana'e. E mea arearea e e mea puai te varua. Na te reira e haapapû i te haamataraa mahana tano no outou. Mai te mea e, aita outou e haere nei i teie nei, a haamata e na te reira e tui i to outou oraraa.

Katarina B., 16 matahiti, California, USA

E oaoa



E haamata te haapiiraa evanelia i to'u mahana. E faariro oia ia'u ei taata oaoa a'e, e te hinaaro puai atu ia aparau i te evanelia i te tahi atu mau taata. E imi hohonu atu matou i te mau papa'iraa mo'a, no reira, e rahi atu to'u iteraa.

Madi S., 15 matahiti, Colorado, USA

E faaauraa tano maitai



E iteraa maitai roa te haapiiraa evanelia. I te tahi taima, aita e nava'i ia haapii noa outou ana'e. Ua riro te haapiiraa a te taata iho e te haapiiraa evanelia ei faaauraa tano maitai. E mea faahiahia

te mau orometua, e mai te mea e, e uiraa ta outou, e nehenehe i to outou mau orometua e te mau tamarii o te piha haapiiraa e tauturu ia outou ia pahono i te reira mau uiraa.

Dawson D., 15 matahiti, Idaho, USA

E maramarama hau atu



E mea anaanatae a'e na'u ia tuatapapa i te mau papa'iraa mo'a e vetahi ê, i te tuatapaparaa o vau ana'e. Hau atu i te reira, ia tai'o ana'e tatou i te mau papa'iraa mo'a e o vetahi

ê, e nehenehe ta tatou e apo mai i te mau mana'o maitai na roto mai ia vetahi ê. Na roto i te haapiiraa evanelia ua apo mai au e rave rahi aamu maitai roa, e ua rahi atu to'u ite i te mau tatararaa o te mau papa'iraa mo'a, e na te reira i faariro i te tai'oraa papa'iraa mo'a ei ohipa anaanatae roa ! Te oaoa nei au i te mea e, te haere nei au i te haapiiraa evanelia.

Rebecca M., 16 matahiti, Schleswig-Holstein, Heremani

Ua opuahia te mau pahonoraa no te tauturu e no te hi'oraa, e ere ei mau faaiteraa mana no te haapiira tumu a te Ekalesia.

E iteraa puai a'e



Na mua roa, ua parau mai te Fatu e, ia putu-putu e toopiti e aore râ, e tootoru i To'na ra i'oa, ei rotopu Oia ia ratou (a hi'o Mataio 18:20 ;

PH&PF 6:32). Ia farii ana'e tatou i To'na Varua, e nehenehe i te reira e tauturu ia tatou ia feruri hohonu i te mea Ta'na i rave no tatou. A piti, ia tai'o ana'e tatou i te mau papa'iraa mo'a e o vetahi ê, e maramarama a'e tatou i te mau mea i papa'ihia. A faaroo ai tatou i te tahi e te tahi, e nehenehe ta tatou e faaroo i te tahi mea aita tatou iho i ite, e e nehenehe atoa i te reira e tupu i ni'a ia vetahi ê ia faaite ana'e tatou i to tatou ite. A toru, ia haere ana'e au i te haapiiraa evanelia, e puai to'u iteraa papû. Ua riro te haapiiraa evanelia ei rave'a no te faaite i to tatou iteraa papû e no te faaroo i to te tahi atu mau taata iteraa papû. E tauturu te reira ia tatou ia vai noa i ni'a i te e'a ti'a.

Dmitri G., 16 matahiti, Dnipropetrovsk, Ukraine

Haapii na roto mai ia vetahi ê



Ua riro te haereraa i te haapiiraa evanelia ei ohipa faufaa roa no'u. E ere no te mea noa e, e haapii e e faataa mai to'u orometua maitai i te mau

parau mau no roto i te mau papa'iraa mo'a, e mea rahi atoa râ te mau mea ta'u e apo mai na roto i ta matou aparauraa i roto i te piha haapiiraa. Te faaite nei te tahi atu mau piahi i to ratou mau iteraa no ni'a i te mau mea ta ratou i apo mai, e ua tauturu ratou ia'u ia roaa te ite hau atu no ni'a i te evanelia e no ni'a i te Faaora e i To'na Taraehara. Eita e navai ia haapii au o vau ana'e, no te mea, ua itehia ia'u te tahi mau pahonora a i to'u mau fifi i roto i ta matou mau tau'araa parau i roto i te piha haapiiraa. E nehenehe ta'u e faaite papû e, e tuhaa faufaa roa te haapiiraa evanelia no te aupururaa i to'u iteraa papû no ni'a i te Ekalesia mau a Iesu Mesia.

Denzel J., 15 matahiti, Western Samoa

Te maramarama e te parau mau



Ia haere au i te haapiiraa evanelia, e imi au i te maramarama e te parau mau e e ahu ho'i au i te haana tama'i a te Atua (a hi'o PH&PF 27:15-18).

Na taua haana tama'i ra e tauturu ia'u ia ite i To'na reo i te mau taime atoa e i te mau vahi atoa. E haapuai te tai'oraa papa'iraa mo'a i to'u faaroo e i to'u iteraa papû i te mau mahana atoa, e e tauturu hoi ia'u ia vai puai i roto i to'u mau tamataraa. Te haereraa i te haapiiraa evanelia o te hoê ia o te mau rave'a maitai a'e no te ite i te maramarama e te parau mau e no te tai'o i te mau papa'iraa mo'a e no te feruri hohonu.

Nohemi M., 17 matahiti, Puebla, Mexico

E toru tumu

A tahi, no te mea te hinaaro nei au e tavini i te hoê misioni, e haere au i te haapiiraa evanelia. E titauhia i te mau misionare ia ti'a oioi i ni'a e ia haapii i te evanelia i te poipoi. Ia haere au i te haapiiraa evanelia, e tauturu te reira ia'u ia faahotu i te peu maitai no te ti'a-oioi-raa i te poipoi. A piti, i te poipoi, e mea maramarama to tatou feruriraa, no reira, e nehenehe ta tatou e haapapû i ni'a i ta tatou aporaa e te tuatapaparaa. E feruriraa paari te faaohiparaa i te mau hora maitai a'e o te mahana no te haapii no ni'a i te Atua.

A toru, mai te mea e, e haapii au o vau ana'e, e riro vau i te ore e farii i te ite hohonu mai ta to'u orometua e rave nei. Na roto i ta'na arata'iraa e ta'na haapiiraa, e nehenehe ta'u e haapii hau atu i te haapiiraa e o vau ana'e.

H. Chen Yuan, 16 matahiti, T'ai-chung, Taiwan



TE MAU HAAMAITAIRAA O TE HAAPIIRAA EVANELIA

« Ua ite au i te mana e roaa mai mai roto mai i te haereraa i te haapii-

raa evanelia na te feia apî e na te feia apî paari. Ua haafaufaa te reira i to'u oraraa, e ua ite au e, e tupu atoa te reira i ni'a ia outou. E tuu te reira i te hoê paruru i ni'a ia outou no te paruru ia outou i te mau faahemaraa e i te mau tamataraa o te ao nei. Te vai ra te hoê haamaitairaa rahi roa i te iteraa i te evanelia. E ua ite au e, aita e vahi maitai atu no te feia apî o te Ekalesia no te farii i te hoê ite taa ê no ni'a i te mau mea mo'a maori râ i roto i te haapiiraa evanelia na te feia apî e na te feia apî paari.

Elder L. Tom Perry no te Püpü no te Tino Ahuru Ma Piti Aposetolo, « Receive Truth », Ensign, Novema 1997, 61-62.

TE UIRAA I MURI IHO

« Nahea vau ia faataa i to'u hoa e, no te aha te ofatiraa i te ture no te viivii ore e riro ai ei mana'o hape ? »

A faataa mai i ta outou pahonora a na mua i te 15 no me 2012, i te liahona.lds.org, na roto i te imere i te liahona@ldschurch.org, e aore râ, na roto i te rata :

*Liahona, Questions & Answers 5/12
50 E. North Temple St., Rm. 2420
Salt Lake City, UT 84150-0024, USA*

E nehenehe i te mau pahonora a e tauhia no te roa aore râ no te maramarama.

Teie te haamaramaramaraa e te parau faati'a e titauhia i roto i ta outou imere e aore râ ta outou rata: (1) te taatoaraa o te i'oa, (2) te mahana fanauraa, (3) te paroita e aore râ te amaa, (4) te tîti e aore râ te mataeinaa, (5) ta outou parau faati'a papa'ihia, e mai te mea e, tei raro mai to outou matahiti i te 18, te parau faati'a papa'ihia a to outou metua (e faati'ahia te rata uira) no te nene'i i ta outou pahonora a e te hoho'a.

No te aha te haapiiraa evanelia ?

A HAERE I TE HAAPIIRAA EVANELIA

«E tauturu te haapiiraa evanelia ia outou ia maramarama e ia ti'aturi i te mau haapiiraa e i te Taraehara a Iesu Mesia. Mai te mea e, e haapii outou ia here i te mau papa'iraa mo'a, ei reira outou e ite ai i te Varua o te Fatu. E faaineine outou ia outou iho no te ohipa hiero e no te ohipa misionare.

« E te feia apî, te ani nei au ia outou ia haere i te haapiiraa evanelia. A tai'o i ta outou mau papa'iraa mo'a i te mau mahana atoa. A faaroo maite i ta outou mau orometua haapii. A faa-ohipa i te mau mea ta outou i apo mai na roto i te pure ».

Peresideni Thomas S. Monson,
« Participate in Seminary », seminary.lds.org.

I to outou mana'oraa, eaha te mea faufaa a'e e nehe-nehe i te hoê piahi ia farii no roto mai i te haapiiraa evanelia na te feia apî e na te feia apî paari ? Ia to te hoê pûpû tamarii haapiiraa evanelia aniraa i te Raatira o te Faanahoraa Haapiiraa a te Ekalesia, o Elder Paul V. Johnson no te Hitu Ahuru, i teie atoa uiraa, ua pahono mai oia e, te ohipa faufaa roa a'e o te ti'a ia outou ia farii maori râ, « te iteraa papû mau e, o Iesu te Mesia. Te iteraa outou e, te iteraa mau o te iteraa ia i te pae varua. O te mea ia e horo'ahia mai e te Varua Maitai i to tatou varua tata'itahi. Tera ia te parau mau puai a'e, te mea puai a'e ia o te nehenehe e matara mai na roto mai i te haapiiraa evanelia na te feia apî e na te feia apî paari. Eita te reira e tau noa i te mea ta outou i ite; e tau râ te reira i to outou huru, e e tau i te reira i ta outou hi'oraa i te ao nei. E na te reira huru ite teitei a'e e tauturu ia faahope roa i to outou ite » (« A Higher Education », *New Era*, Eperera 2009, 15).

O Elder Johnson te hoê o te mau Hui Mana Faatere Rahi tei paraparau no ni'a i te mau haamaitairaa nehenehe o te fariihia na roto i te haereraa i te haapiiraa evanelia na te feia apî e na te feia apî paari. No reira, mai te mea e, te uiui nei outou e, no te aha outou e titauhia ia haere i te haapiiraa evanelia, teie ia te tahi atu â mau tumu maitai no roto mai i te mau peropheta e te mau aposetolo.



A HAAMAU I TE HOÊ NIU NO TE OAOA E NO TE MANUIARAA

« E tauturu te mau tabula o te Haapiiraa Evanelia ia oe ei tamahine e aore râ, ei vahine no te paturaa i te hoê niu no te oaoa e te manu'ia i roto i te oraraa ».

Elder Richard G. Scott no te Pûpû no te Tino Ahuru Ma Piti Aposetolo, « Teie te taime tano ia haere e rave i te hoê misioni ! » *Liahona*, Me 2006, 88.





A APO I TE MAU PARAU MAU O TE EVANELIA

« To'u hinaaro, ia ti'a i te mau tamaroa e i te mau tamahine atoa ia haere i te haapiiraa evanelia, no te mea i reira ratou e haapii ai e rave rahi mau parau mau o te evanelia. Te haapiiraa evanelia o te vahi ia e rave rahi o ratou e farii ai i ta ratou mau opuaraa tumu i roto i to ratou upoo no ni'a te mau mea ta ratou e rave atu, e e haere ratou i te misioni ».

Peresideni Spencer W. Kimball (1895–1985), « *President Kimball Speaks Out on Being a Missionary* », *New Era*, Me 1981, 49.

A HORO'A IA'NA I TE TI'ARAA MATAMUA

« E te mau piahi, mai te mea e, e vairaa papū to ta outou mau faaufaa tumu, eita ia outou e tapitapi te mana'o no te pato'i i te hoē haapiiraa faahepo-ore-hia o te faaunauna paha i to outou oraraa, no te hoē haapiiraa o te nehenehe e tapea amui i te niu mau o to outou oraraa. E ia ô outou i reira, a haere, a tuatapapa e a haapii mai. A faaitoito i to outou mau hoa ia na reira atoa. Eita roa outou e tatarahapa; te fafau atu nei au ia outou ».

Peresideni Boyd K. Packer, Peresideni no te Pūpū no te Tino Ahuru Ma Piti Aposetolo, « *Agency and Control* », *Ensign*, Me 1983, 67.



A TITAU I TE MAU HAAMAITAIRAA I ROTO I TO OUTOU ORARAA

« Te oaoa nei au no te faanahoraa o te haapiiraa evanelia i roto i te Ekalesia, te haapiiraa evanelia na te feia apī e na te feia apī paari. Te hinaaro nei au e faaitoito i te mau piahi atoa o te fare haapiiraa tuarua ia fana'o i te maitai o te faanahoraa o te haapiiraa evanelia. E haamaitai-rahi-hia to outou oraraa mai te mea e, e na reira outou ».

Peresideni Gordon B. Hinckley (1910–2008), « *Te mau parau no roto mai i te a'oraa a te Peresideni Gordon B. Hinckley* », *Ensign*, Titema 1995, 67.

A ITE MAI E TORU MEA E NEHENEHE I TE HAAPIIRAA EVANELIA IA RAVE

« Te vai ra e toru mea puai e nehenehe i te haapiiraa evanelia e rave. A tahi, e amui te reira i te feia apī hoē â ta ratou mau tumu parau faufaa. E mea au na te feia apī ia parahi i piha'i iho i te tahi atu mau taata hoē â faaroo to ratou e o tei here i te mau papa'iraa mo'a. A piti, e tuu te reira i te feia apī i piha'i iho i te hoē orometua e iteraa papū to'na, e e nehenehe ta ratou e ite i te ahu o te reira ia faaite-ana'e-hia. A toru, na te haapiiraa evanelia e tuu i te feia apī i roto i te mau papa'iraa mo'a ».

Peresideni Henry B. Eyring, Tauturu Matamua i roto i te Peresideniraa Matamua, « *A Discussion on Scripture Study* », *Liahona*, Tiurai 2005, 11.

IA HAAFETIAHIA OUTOU I TE HAAPIIRAA EVANELIA

« A haere tamau i te haapiiraa evanelia e ia haafetiahia outou. Te haapiiraa evanelia, o te hoē ia o te mau iteraa pae varua faufaa roa o te nehenehe e roaa i te hoē tamaroa e i te hoē tamahine ».

Peresideni Ezra Taft Benson (1899–1994), « *To the 'Youth of the Noble Birthright,'* » *Ensign*, Me 1986, 44 ; « *To the Young Women of the Church* », *Ensign*, Novema 1986, 82.





HAAPIIRAA EVANELIA

i roto i te uru raau no Ecuador

I roto i te hoê uru raau atea roa, te faatupu nei te haapiiraa evanelia i te hoê taa-ê-raa rahi no teie feia apî.

Na Joshua J. Perkey

Te mau Ve'a a te Ekalesia

I te pae hitia o te râ no Quito, Ecuador, i muri mai i te mau mou'a auahi e te mau Mou'a no te Andes, e topa ta'ue te fenua i ni'a i te uru raau no Amazone. E ite outou i reira i te mau uru raau rarahi, te mau anavai pape, te mau uri taata, te mau manu, e tae noa'tu i te ou'a uteute mauouo.

E ite atoa outou i te hoê oire tei parauhia o Puerto Francisco de Orellana. E mea atea i te mau mea atoa i Ecuador. Ahuru ma pae matahiti i ma'iri a'enei, e mea iti roa te taata i roto i teie vahi. Na roto râ i te ite-raa-hia te mori arahu, ua hopoi mai te reira i te mau pû ohipa, te taata imi ohipa, e te mau melo o te Ekalesia.

Te haapiiraa evanelia i roto i te hoê amaa na'ina'i

Te tahi feia apî, mai ia Oscar R., e melo a'ena ratou a faatihia ai te amaa, tera râ, te rahiraa e mau taata faafariuhia ia. E te ama nei te auahi i roto i to ratou aau. « E mea puai matou », te parau ia a Oscar.

I te ava'e setepa 2010, hoê noa matahiti i muri a'e i te faatia-raa-hia te amaa, ua haamata te amaa i te faatere i te haapiiraa evanelia. « I to matou haamataraa

i te haaputupu tau matahiti i ma'iri a'enei », te na reira ra o Oscar, « E mea iti roa matou. O vau ana'e te feia apî. Tera râ, ua haere noa matou i te rahiraa. Aita i maoro ua tae'a e matou te 6, e te 10, e i teie nei, ua rahi roa'tu te feia apî ».

Te haere ra te tahi mau feia apî i te haapiiraa i te poipoi e te tahi pae i te avatea, no reira, ua faanaho ratou e piti piha haapiiraa evanelia—hoê i te poipoi mai te hora 8 e tae atu i te hora 9 e hoê i te avatea mai te hora 4:30 e tae atu i te hora 5:30.

Aita i rahi te feia apî i roto i te haapiiraa evanelia, tera râ, no te feia apî e haere mai nei, ua tau i te haapiiraa evanelia i to ratou oraraa.

No te aha e haere ai ?

« Ua riro te haapiiraa evanelia ei haamaitairaa rahi roa no'u », te na reira ra o Luis V., te hoê tamaroa i faafariu-apî-hia mai. « Te tauturu nei te reira ia faaineine ia'u ia riro ei misionare maitai. Ua farerei au e rave rahi mau fifi e te mau faahemaraa mai te taima a tomo mai ai au i roto i te Ekalesia, tera râ, ua ti'a ia'u ia vai paari noa no te mea ua ite au e, e ohipa maitai ta'u e rave ra ».

E ere o Luis ana'e te feruri nei mai te reira. « Aita i maoro a'ene to'u riroraa mai ei melo no te Ekalesia », te parau ia a Ariana J., « tera râ, te haere nei au i te haapiiraa evanelia mai te

Te haapuai nei te haapiiraa evanelia i te feia apî mai teie feia apî i Ecuador, te rahiraa o ratou e feia apî ia i faafariuhia mai.



taime a bapetizohia ai au. Te oaoa nei au ia haere no te mea e rave rahi mea ta'u e haapii mai nei no ni'a i te evanelia a Iesu Mesia o te faai nei i to'u aau i te ti'aturi e i to'u feruriraa i te maramarama ».

Ua tauturu papû te haereraa i te haapiiraa evanelia ia faatumu ia Ariana i roto i te evanelia. « No'u nei, ua riro te haereraa i roto i teie mau piha haapiiraa ei haamaitairaa », te parau ia a Ariana. « Ua haapuai te reira i to'u varua e ua tauturu ho'i ia'u



ia faaineine, e ia tae i te hoê mahana e nehenehe ia'u e riro mai ei vahine faaiipoipo maitai, ei metua vahine e ei ti'a faatere maitai i roto i te Ekalesia, e peneia'e ei misionare rave tamau ».

Te reira atoa te mana'o o Gerardo, te taea'e o Ariana. Te parau ra oia e, « Te oaoa nei au i te mea e, ua riro mai te haapiiraa evanelia ei tuhaa faufaa no to'u oraraa ». « Te faaineine nei te reira ia'u ia tavini i te hoê misioni i te hoê mahana. Ua haapii au i reira i te faanahoraa no te faoraraa ta te Atua i faaineine no'u. Te mau haapiiraa atoa ta'u i haere, ua horo'a mai te reira ia'u i te ti'aturiraa e, e nehenehe ia'u e farii i te basileia tiretiera, e ua horo'a mai ia'u i te haapapûraa e, ua farii au i te evanelia a Iesu Mesia ».

I te tahi mau taime, e rohi-rohi roa o Gerardo i te taime haapiiraa. E afa'i oia na mua i to'na teina i te haapiiraa, i muri

iho e ho'i oioi mai i te fare no te rave i to'na tuahine i reira raua e haere ai i te haapiiraa evanelia. Aita râ oia e haape'ape'a ra no te reira.

Te parau ra o Gerardo e, « E mau mea apî ana'e teie no'u, tera râ te oaoa roa nei au ». « Ua ite au e, tei ni'a vau i te e'a ti'a o te riro i te horo'a mai ia'u i te rave'a no te ite faahou i to'u Metua i te Ao ra. Na te Varua Maitai e horo'a mai nei ia'u i te reira haapapûraa. Ta'u noa titauraa o te faaitoitoo-raa ia e te rave-tamau-noa-raa e tae noa'itu i te hopea ».

Aita e faufaa ia mata'u

No Walter A., i te haamataraa, e mea faataiâ rii na'na te haapiiraa evanelia. Te parau ra oia e, « Ua mata'u rii au i te taime matamua a haere mai ai au ». « I to'u râ tomoraa i roto i te piha haapiiraa, ua feruri au e, e mea taa ê au, no te mea ua ite au i te here ta oe e ite ia tai'o ana'e oe i te mau papa'iraa mo'a. E i to'u ho'iraa, ua farii au i te puai no te oaoa i roto i to'u aau no te mau mea ta'u i apo mai. Te hoê o te mau haamaitairaa rahi a'e ta te Metua i te Ao ra i horo'a i te feia apî o te haapiiraa evanelia ia ».

Ua parau o Abel A., o te faaineine atoa ra e rave i te hoê misioni, « Ua tau i te Ekalesia a Iesu Mesia i te Feia Mo'a i te mau Mahana Hopea nei i to'u oraraa. « Te haapii nei au i te mau haapiiraa a te mau peropheta. Ua here au ia Iosepha Semita. Ua faaitoito oia i te faatupuraa i te Faaho'i-faahouraa mai o te Ekalesia mau, noa'itu te mau

fifi ta'na i farerei. Te hinaaro nei au ia faaitoito atoa mai ia'na te huru ».

Ua titauhia i te feia apî e rave rahi faatusiaraa no te haere i te haapiiraa evanelia. E ere i te mea ohie, tera râ, no te feia apî i Puerto Francisco de Orellana, Ecuador, e mau'araa maitai te tautooraa.

Te parau ra o Abel e, « Ia feruri ana'e i te parau no te haereraa i mua, mai tei parahia i roto i te mau papa'iraa mo'a, te feruri nei au e, te auraa o te reira, o te haamauraa ia i ta tatou mau ohipa tumu mau no te oraraa. O te haapiiraa evanelia te hoê o te reira mau ohipa tumu. Ua tau i te reira i to'u iho oraraa, e e tupu atoa te reira no te tahi atu feia apî ».

Noa'itu e, tei roto roa i te hohonuraa o te uru raau no Ecuador, te tupu maitai nei e te tau nei te Ekalesia a Iesu Mesia e ta'na faanahoraa haapiiraa evanelia i te oraraa o te feia tei farii i te reira. ■



EAHA TO MURI IHO I TE HAAPIIRAA EVANELIA ?

Aita ta outou haapiiraa faaroo i hope i te taima a farii ai outou i te parau tu'ite no te haapiiraa evanelia. Te vai ra â te tahi mea faahiahia roa no outou.

Na David A. Edwards

Te mau Ve'a a te Ekalesia

I roto i te haapiiraa evanelia e tuata-papa outou i te mau papa'iraa mo'a, e, e putuputu tamau paha outou e te tahi atu mau tamarii o to outou faito matahiti. E farii poupuhia outou, e e nehenehe ta outou e farii i te Varua. No reira, ia hope ana'e te haapiiraa evanelia, ua hope atoa anei teie mau mea ? Aore roa ia.

I muri mai i te reira te vai ra te faa-nahoraa haapiiraa evanelia na te feia apî paari (institut) a te Ekalesia, e au roa outou i te reira. Noa'itu e te haere nei outou i te haapiiraa tuarua e aore râ aita, e nehenehe ta outou e tamau noa i te haapii i te evanelia, e faaineine no te hoê misioni e no te faaiipoiporaa hiero, e e faaite i te mau iteraa i te tahi atu mau taata o to outou faito matahiti.

Teie te tahi mau pahonoraa i te mau uiraa tumu no ni'a i te haapiiraa evanelia a te feia apî paari. Te vai ra â te tahi atu i ni'a i te itenati institute.lds.org.

Eaha te haapiiraa evanelia na te feia apî paari ?

Te haapiiraa evanelia na te feia apî paari, e mau piha haapiiraa evanelia ia, e mau piha haapiiraa no ni'a i te mau papa'iraa mo'a, no ni'a i te mau haapiiraa a te mau peropheta, e te faaineine-
raa no te hoê misioni e aore râ, no te faaiipoiporaa hiero. I roto i te tahi mau haapiiraa evanelia na te feia apî paari, e nehenehe ta outou e ma'iti e rave rahi haapiiraa.

O vai te nehenehe e haere ?

Te faaitoitohia nei te feia apî paari atoa ia haere i te haapiiraa evanelia na

te feia apî paari. Te mau taata atoa—tei faaiipoipohia e aore râ, te vai otahi noa ra—i roto i te area matahiti 18 e tae atu i te 30, e nehenehe ta ratou e haere.



TE MAU MEA NO NI'A I TE HAAPIIRAA EVANELIA NA TE FEIA APÎ PAARI

Rahiraa piahi : hau atu i te 350 000

Rahiraa vahi : hau atu i te 2 500

Rahiraa haapiiraa e vai ra : 15 haapiiraa tumu, e e rave rahi atu mau haapiiraa taa ê.

Haapiiraa evanelia matamua na te feia apî paari : Moscow, Idaho, USA (1926)

Haapiiraa evanelia matamua na te feia apî paari i rapae i te fenua Marite e Canada : Mexico (1959)

Te tumu o te haapiiraa evanelia na te feia apî paari : No te tauturu i te feia apî paari ia maramarama e ia turu'i i ni'a i te mau haapiiraa e te taraehara a lesu Mesia, ia ti'a mâ no te farii i te mau haamaitairaa o te hiero, e ia faaineine ia ratou iho, to ratou utuafare e ia vetahi ê no te ora mure ore i piha'i iho i to ratou Metua i te Ao ra.

I hea e itehia ai ia'u te haapiiraa evanelia na te feia apî paari ?

I te tahi mau fenua, tei piha'i iho noa te fare no te haapiiraa evanelia na te feia apî paari i te mau fare haapiiraa tuatoru. I te tahi atu mau fenua, te faatupuhia nei te mau haapiiraa i roto i te mau fare pureraa a te Ekalesia e aore râ, i roto i te tahi atu mau fare. A farerei i to outou episekopo e aore râ, te peresideni amaa no te ite e, tei hea te haapiiraa evanelia na te feia apî paari i to outou vahi, e aore râ, a haere i ni'a i te itenati institute .lds.org no te ite i te haapiiraa evanelia na te feia apî paari fatata mai i ô outou.

No te aha i titauhia ai ia'u ia haere i te haapiiraa evanelia na te feia apî paari ?

Ua parau te Peresideni Thomas S. Monson e : « A faairi i te haereraa i te haapiiraa evanelia na te feia apî paari ei ohipa tumu matamua. ... A feruri i te reira. E roaa te mau hoa, e fariihia te Varua, e e haapuiahia te faaroo. Te fafau nei au ia outou e, mai te mea e, e haere outou i te haapiiraa evanelia na te feia apî paari e e tuatapapa outou i te mau papa'iraa mo'a ma te itoito, e tupu i te rahi to outou mana no te patoi i te faahemaraa e no te farii i te arata'iraa a te Varua Maitai i roto i te mau mea atoa ta outou e rave » (institute.lds.org, Eperera 21, 2009). ■



2 Timoteo 3:16-17

Ua haapii te Aposetolo Paulo e nahea te mau papa'iraa mo'a i te haamaitai i to tatou oraraa.



Te mau parau mo'a atoa

« Ia hinaaro tatou i te paraparau i te Atua, e pure tatou. E ia hinaaro tatou ia paraparau mai Oia ia

tatou, e imi tatou i te mau papa'iraa mo'a ; no te mea, na roto mai Ta'na mau parau i Ta'na mau peropheta. I reira Oia e haapii ai ia tatou a faaroo ai tatou i te mau muhumuhu o To'na ra Varua Maitai.

« Mai te mea e, aita outou i faaroo i To'na reo i te paraparauraa mai ia outou i teie mau mahana a'e nei, a hoi i roto i te mau papa'iraa mo'a ma te mata apî e te tari'a apî. Te reira to tatou reni oraraa ».

Elder Robert D. Hales no te Pūpū no te Tino Ahuru Ma Piti Aposetolo, « Te mau papa'iraa mo'a: Te mana o te Atua ia ora tatou », *Liahona*, Novema 2006, 26–27.

Te mau ohipa maitai

Eaha te mau ohipa maitai ta te mau parau mo'a e faaineine ia outou ia rave? Teie te tahi pae o te reira mau ohipa. E nehenehe anei ta outou e feruri i te tahi atu â? A papa'i i te reira i roto i ta outou buka aamu.

- Te taviniraa ei misionare rave tamau
- Te raveraa i te mau piiraa i roto i te Ekalesia (mai te peresideniraa autahu'araa e aore râ, no te pūpū)
- Haapiiraa i te evanelia
- Faaiteraa i te iteraa papû
- Faaiteraa i te evanelia
- Pahonoraa i te mau uiraa a te mau hoa no ni'a i te Ekalesia

Faaiteraa hapa

Te auraa no ta'o tumu i roto i te Hereni tei faaohipahia i roto i te Bibilia maori râ, « faaafaro faahou ». No reira, na te mau parau mo'a e tauturu ia outou ia vai noa i ni'a i te e'a afaro e te pirihaio (a hi'o 2 Nephi 9:41).



Haapiiraa

« Te haapiiraa tumu mau e maramaramahia ra, na te reira e tau i te huru e te raveraa o te taata E haamaitai te tuata-

paparaa i te mau haapiiraa tumu o te evanelia i te raveraa e e mea vitiviti a'e te reira i te tuatapaparaa no ni'a i te raveraa ».

Peresidene Boyd K. Packer, Peresidene no te Pūpū no te Tino Ahuru Ma Piti Aposetolo, « Eiaha e mātā'u », *Liahona*, Me 2004, 79.

Te parau a te taata papa'i ve'a faatere : Aita teie api i opuahia ei tatarararaa aano no te mau irava tei ma'itihia mai, e haamatararaa râ no ta outou iho tuatapaparaa.

16 *Te mau parau mo'a atoa i papaihia ra e mea faaurua mai ia e te Atua, e h e mea maitai ei haapiiraa, ei a'oraa, ei faaiteraa hapa, ei faaitere mai i te parau-tia ra ; 17 Iia au roa te taata no te Atua ki te mau ohipa maitai atoa ra.

A'oraa

A'oraa—faahapa, ta'iri, tama'i, e aore râ, faatitai-faro, na roto i te mārū.

Ia au roa

Ia au roa —ia horo'a, ia ineine



EIAHA E TOPA

*Arai i te mau fifi rarahi no araua'e na roto
i te tata'iraa i te mau fifi na'ina'i i teie nei.*

Na Adam C. Olson
Te mau Ve'a a te Ekalesia



TE MAU HI'OPŌ'ARAA PAE VARUA

« E mea ti'a ia tatou
ia rave tamau i te
mau hi'opo'araa pae
varua i ni'a ia tatou

iho no te faataa i te mau vahi e ti'a ia
tatou ia haamaitai.

« E itehia ia tatou teie mau fifi rii na
roto i te tauturu a te Varua Mo'a ... E
mea ti'a ia tatou ia faaroo maitai i te
mea ta te Varua, ta te feia faatere o te
Ekalesia, ta tei herehia e tatou, ta te mau
hoa ohipa, e ta te mau hoa, e faaite mai
ra ia tatou ».

**Elder Marcos A. Aidukaitis no te Pūpū Hitu
Ahuru, « Honesty in the Small Things »,
Ensign, Setepa 2003, 30**

E mea au na Andrei te manureva
mai to'na na'ina'iraa mai â. Tera
râ, e rave rahi te taata e moe-
moea ia tere na ni'a i te manureva,
area o Andrei, aita ia to'na feruriraa i
roto i te ata; tei ni'a râ to'na mana'o
i te mau farero ponao (écrous) e te
mau farero tamau (boulons). Te haapii
nei teie tamaiti 16 matahiti no « Rou-
manie » ia riro mai ei taata tatai matini
manureva.

I « Roumanie » e nehenehe i te
feia apî e ma'iti ia haere i te haapii-
raa tuarua no te faaineine ia haere i
te fare haapiiraa tuatoru e aore râ, i
te haapiiraa no te tapihoora. No te
au o Andrei i te manureva, ua ohie
ta'na faaotiraa ia haere i te haapiiraa
manureva.

Aita te mau taata tatai e tatai noa nei
i te matini arearea a te mau manureva.
Te hoê o te mau ohipa faufaa roa a'e ta
ratou e rave o te hi'opo'araa ia e te atu-
aturaa i te mau manureva eiaha ratou
ia ino. E hi'opo'a tamau noa ratou i te
mau mea atoa i ni'a i te hoê manureva,
mai te mau pererau ohu e tae roa'tu
i te mau huira faatau, e te mau tuhaa
atoa i ropu i te reira.

« E ere i te mea ohie ia ite i te mau
fifi na'ina'i roa o te nehenehe e faa-
topa i te hoê manureva », te parau ia
a Andrei. « Tera râ, e mea ohie a'e te
reira i te tamata i te hamani faahou i te
manureva taatoa ».

Te atuatu-tamau-raa e te patoiraa ia
haapae i te reira, e mea faufaa ia—no
te mau manureva e no te mau melo
atoa o te Ekalesia—no te iteraa i te

mau fifi hou a riro mai ai ratou ei fifi
rahi no te pae matini anei e no te pae
oraraa varua anei.

Atuaturaa pae varua

Te ora nei o Andrei i Bucharest,
hoê oire fatata e piti mirioni taata.
Tera râ, e mea apî roa te Ekalesia
i « Roumanie », e e piti noa amaa i
Bucharest. E mea atea te nohoraa o
Andrei i te tahi atu mau melo o ta
ratou amaa. Te ite nei o Andrei i te
hutihutiraa o te ao ati a'e ia'na i te
fare haapiiraa e i rotopu i to'na mau
hoa. Ua ite oia e mea ohie roa ia
topa—i te pae varua—mai te mea
e, aita oia e atuatu tamau noa i te
pae varua.

E nehenehe i te oraraa ia riro ei
oraraa aehuehu. Taa ê noa'tu te taima
ta Andrei e horo'a nei no ta'na haa-
piiraa, no te tu'e popo, e no te roro
uira, te faataa atoa nei oia i te taima
no te pure, no te haapae i te maa, no
te tai'o i te mau papa'iraa mo'a, e no
te faoti i ta'na mau hopoia ei tahu'a.
Ua haapapû atoa oia ia « haere » i te
haapiiraa evanelia, na ni'a i te itenati,
no te atea.

Ua riro te raveraa i teie mau mea
ei tuhaa no te atuaturaa varua tamau
o te tauturu ia ite e ia faatitiaifaro i te
mau paruparu hou te reira e arata'i
atu i roto i te hoê toparaa varua.

« Te vai ra te tahi mau mea tei ti-
tauhia outou ia rave tamau noa—e ia
riro mai ei peu matauhia », te na reira
ra oia. « Eita e ti'a ia vaiiho i te oraraa
ia faatere ».

Te mau toparaa varua

Ua haapii mai o Andrei e, mai te mea e, aita tatou e rave tamau noa i te atuaturaa varua, e nehenehe i te tahi mau puai, mai te riarua e aore râ, te huringa a te mau hoa, ia upootia i ni'a i to tatou puai ia patoi i te faahemaraa. E ia tupu ana'e mai te reira, eita e maoro, e mo'e to tatou avei'a, ta tatou faatereraa, e i te pae hopea, to tatou puai varua.

Mai te hoê manureva aita e puai faahou, e haamata oia i te patia i raro, oia atoa tatou, ia rave tatou i te hara, e mo'e to tatou puai varua e e patia tatou i raro, na te reira e faaatea ia tatou i te ra'i, e aita e maoro, e topa i te pae varua.

Noa'tu e, e nehenehe i te taraehara o te Faaora i faaho'i faahou ia tatou i te vairaa maitai i muri a'e i to tatou toparaa, e mea maitai roa'tu râ ia ti'a-turi i ni'a i To'na mana no te tauturu ia tatou ia tata'i i te fifi ia vai na'ina'i noa ra â te reira—hou a tupu ai te hoê ati rahi i te pae varua.

Te fifi no te haapaeraa i te ohipa

Te feruriraa e haapae i te atuaturaa i te matini i ni'a i te hoê manureva, aita roa te reira i hiti noa a'e hoê taime i roto i te upoo o Andrei. Aita to te haapaeraa e parau. Te na ô ra oia e, « Te vai ra te mau ture no te reira ». Tera râ, mai te mea e *haapae* oia i te atuaturaa—hoê noa a'e taime—ua farii oia e, « eita ihoa paha te hoê mea e tupu mai ».

Peneia'e te fifi rahi a'e i roto i te parau no te haapaeraa, e ere ia e, e



topa te manureva i te reira iho taime, te fifi rahi maori râ, eita e topa mai. « Mai te mea e, aita hoê mea e tupu mai ia haapae au i teie mahana, e mea ohie a'e ia te faahemaraa ia'u ia haapae ananahi », ta'na ia parau.

Mai te mea e, e haamo'e tamauhia te atuaturaa, na te mau puai e te mau mata'u e vai i ni'a i te manureva—e aore râ, i ni'a ia tatou—e faaino i te hoê mea i teie taime e aore râ, i te hoê taime ê atu. Te parau ra oia e, « I te pae hopea, e topa mau tatou ».

No reira te Atua i horo'a mai ai ia tatou i te mau ture no te atuaturaa tamau i te pae varua. « E haapa'o pinepine » mai outou i te mau amuiraa [i te fare pureraa] (3 Nephi 18:22 ; teiaharaa papa'i tei ano'ihia). Pure *i te mau*

taime atoa (a hi'o 3 Nephi 18:19). Tuatapapa i te mau papa'iraa mo'a *ma te tuutuu ore* (a hi'o 3 Nephi 23:1-5). « Ia faaunauna *noa* te taiata ore i to outou mau feruriraa » (PH&PF 121:45; teiaharaa papa'i tei ano'ihia). Haere *tamau noa* i te hiero.¹

Na roto i te haapa'oraa i te reira mau ture e te rave-tamau-raa i te atuaturaa pae varua, e ti'a ia ia tatou ia tere maitai noa.

Te na ô ra o Andrei e, « Ua hamanihia te manureva no te ma'ue i ni'a a'e i te repo, no te faaru'e i te ao ». « Tera ta to tatou Metua i te Ao ra e hinaaro nei no tatou. Na roto i te atuaturaa tamau, e tapae tatou ma te maitai i te vahī ta tatou e hinaaro—no te ho'i i te ra'i ra ». ■

NOTA

1. A hi'o Thomas S. Monson, « Te Hiero Mo'a—E Mori no to te Ao nei », *Liahona*, Me 2011, 92.

« E imi maite ia outou iho i to outou faaroo » (2 Korinetia 13:5).

TAPURA ATUATURAA I TE PAE VARUA

E tapura hi'opo'a ta te mau taata haapa'o matini manureva no te mau tuhaa e titauhia ia ratou ia hi'opo'a tamau noa. Ua parau mai te feia faatere ia rave tamau noa i to tatou hi'opo'araa pae varua.¹

Teie te tahi mau uiraa o te nehenehe e tauturu ia outou ia hi'opo'a i to outou ea i te pae varua i tera taime e tera taime. Mai te mea e, te haape'ape'a ra to outou mana'o no ni'a i te hoê o ta outou mau pahonora, a paraparau i to outou metua e aore râ, i to outou episekopo e aore râ, te peresideni amaa.

- Te pure tamau nei anei au ma te aau tae ?
- Te oaoa nei anei au i te parau a te Atua i roto i te mau papa'iraa mo'a e te mau haapiiraa a te mau peropheta ora ?
- Te haamo'a nei anei au i te Sabati e te haere tamau nei anei au i te mau pureraa ?
- Te haapae nei anei au i te maa e te aufau nei anei au i ta'u tuhaa ahuru e te mau ô ma te hinaaro mau ?
- E hinaaro anei to'u ia faaore i te hapa a vetahi ê ?
- Te imi nei anei au i te mau rave'a no te tavini ia vetahi ê ?
- Te haamana'o ra anei au i te Faaora i te mau taime atoa e te pee ra anei au i To'na hi'oraa ?
- E mea mâ anei to'u mau mana'o e ta'u mau parau ?
- E mea haavare ore anei au i roto i te mau mea atoa ?
- Te haapa'o ra anei au i te Parau Paari ?

NOTA

1. A hi'o Joseph B. Wirthlin, « True to the Truth », *Ensign*, Me 1997, 17.

HOHŌA PAPA I NA CARY HENRIE, LEHI AND HIS PEOPLE ARRIVE IN THE PROMISED LAND, NA ARNOLD FRIBERG
© 1951 IRI. YOUNG NEPHI SUBDUES HIS REBELLIOUS BROTHERS, NA ARNOLD FRIBERG, HOROARAA NA TE
CHURCH HISTORY MUSEUM; ABINADI APPEARING BEFORE KING NOAH, NA ARNOLD FRIBERG © 1951 IRI

A TOMO I ROTO I TE **PAPA'IRAA MO'A**

A vaiho i te haapiiraa evanelia ia tau i outou.

(A hi'o 1 Nephi 15:23.)



Taime paraparauraa

« E faatura vau i to'u na metua e e rave au i ta'u tuhaa no te haapuai i to'u utuafare » (Ta'u mau Ture no te Evanelia).



Na Hilary Watkins Lemon

No roto mai i te hoê aamu mau

Ehoma. E taime paraparauraa teie », te piiraa ia a mama. Ua tia'i noa o Josie i te mahana taatoa i te taime paraparauraa. I te mau ahiahi atoa, e putuputu o Josie e to'na na teina taea'e, o Ben e o Wes, i roto i te piha faafaearaa e o Mama e o Papa no te paraparau i te huru o te mau mea i roto i to ratou oraraa.

I teie pô ua parau o papa e, e tauturu oia ia Josie ia faaineine i ta'na parau tai'o no te mau faaararaa i te poipoi. Te tai'oraa i te mau faaararaa o te poipoi, ua riro ia ei ohipa taa ê roa i roto i te fare haapiiraa a Josie. Ananahi e faata'i o Josie i te tahi tuhaa iti o ta'na himene au roa i roto i te mau haapuai reo o te fare haapiiraa, e e faohipa oia i te micro no te faaite i te mau ohipa no taua mahana ra e te tapura maa no te tamaaraa avatea.

Ua horo o Josie i roto i te piha faafaeararaa, ma te oaoa ia faaineine i ta'na parau tai'o.

« Teie to tatou taata faaara tu'i-roo ! » Te parau ia a papa a parahi mai ai o Josie i ni'a i te parahiraa i piha'i iho ia'na. « Eaha to oe mana'o no ananahi ? »

« Te oaoa nei au, tera râ, te riarria

rii atoa nei au. Te riarria nei au ia hape au i mua i te taatoaraa o te fare haapiiraa », te parau ia a Josie.

Na ô atura o papa e, « No reira taua e haapiipii ai ». « A haamata i te tai'o i ta oe parau, e faaroo vau i te mau vahi e haamaitai ».

Na ô maira o Josie e, « Mauruuru e papa ».

Ua hi'opo'a a'era oia e o Papa i te parau papa'i e rave rahi taime. I muri iho, ua ti'a a'era o Josie i ni'a no te tai'o i ta'na parau hoê taime hopea no to'na utuafare. Ua popo a'era o mama e o papa. Ua ta'iri o Ben i te rima o Josie, e ua ataata noa o Wes e ua tairiiri i to'na rima.

Ua haere o Josie e taoto ma te oaoa e te ti'aturi.

Ia poipoi a'e, e mea tere maitai te mau mea atoa. Noa'utu e, te riarria rii ra oia, ua ataata o Josie a faaroo

ai oia i ta'na pehe i te faata'i-raahia i ni'a i te mau haapareraa reo o te fare haapiiraa. Ua oaoa oia i te mea e, ua haapiipii maitai oia i ta'na parau e o papa, e ua tai'o atura oia i te reira ma te mârû e te maramarama e te hape ore.

« E mea maitai roa ta oe ohipa », te parau ia a Blake vahine, te raatira mono.

I te faaotiraa o te haapiiraa, ua ti'a o Josie i roto i te aniraa tamarii no te tomo i roto i te pereoo. Ua fariu maira te hoê tamaiti paari a'e e ua ui maira, « o oe tera tamahine i tai'o mai i te mau faaararaa o teie mahana ? »

Ua ataata atura o Josie. Na ô atura o Josie e, « E ».

« No te aha oe i rave ai i te reira himene ? » te aniraa ia a taua tamaiti ra. « E himene mauu roa. Ua ino

roa te mau faaararaa o te poipoi ia oe ». E ua pii atura oia ia'na i te hoê i'oa au ore e ua ata a'era oia e to'na mau hoa.

Ua parahi o Josie o'na ana'e i te parahiraa i mua roa i te pereoo. Ua mau iui to'na opu.

Ia tae atu o Josie i te fare, ua ite atu oia ia mama te ha'uti ra e o Wes.

Ua parau atura o Josie e, « Mama, ua ite au e, e ere teie i te taima aparauraa, tera râ, te feruri nei au e nehenehe anei ta taua e paraparau i teie nei »,

Na ô maira o mama e, « Oia e Josie », « Eaha te fifi ? Ua tupu anei te hoê mea i roto i te mau faaararaa no te poipoi ? »

Na ô maira o Josie e, « Aita ». « E mea maitai roa te mau mea atoa. Ta'u ia i mana'o, tae roa i te taima a parau mai ai hoê tamaiti ia'u e, ua rave au i te hoê himene maau. Ua pii mai oia ia'u i te hoê i'oa hairiiri ».

Ua tapiri maira o mama i piha'i iho ia'na. Ua haere atura o Josie e ua parahi i raro. Ua apa maitai atura o mama ia'na. Ua paraparau o Josie e o mama i te mau mea atoa tei tupu i taua mahana ra, tae noa'tu i te haapoupouraa a Blake vahine.

Na ô maira o mama e, « Ua pe'a-pe'a vau i te mea ua iria taua tamaiti ra e to'na mau hoa i ni'a ia oe. « Tera râ, mai te mea ra e, te tahi atu mau taata ta oe e faatura nei, mai ia Blake vahine, ua mauruuru roa ratou i ta oe huru tai'oraa i te mau faaararaa. Ua oaoa roa maua o papa ia oe. Ua rave itoito oe i te ohipa, e ua hoona te reira ! »


Ua tauahi faahou o Josie ia mama. Na ô maira o Josie, « Mauruuru e mama », « Mea maitai roa vau i teie nei ». Ua oaoa o Josie i te mea e, e nehenehe i te mau taima atoa ia riro ei taima no te paraparauraa. ■



« **A**ore e mea faufaa atu no te autaati-raa i roto i te mau melo o te utuafare maori râ, te aparauraa matara noa e te haavare ore ».

Elder M. Russell Ballard no te Pūpū no te Tino Ahuru Ma Piti Aposetolo, « Like a Flame Unquenchable », *Liahona*, Tiurai 1999, 103.





PARAPARAU AMUI

Teie te tahi mau mana’o tauturu no te faatupu i te hoê « taime paraparauraa » na te utuafare :

- A ani i to outou na metua ia faataa i te tahi nau minuti i te mau mahana atoa no to outou

utuafare no te paraparau amui. E nehenehe e rave i te reira i te taime tamaaraa e aore râ, i te tahi taime o te mahana.

- A ara maitai ia paraparau e ia faaroo te taata tata’itahi. A faaô

i te mau taata atoa !

- A faatura i te mana’o o te mau melo o to outou utuafare. A haa-papû e, te ite ra te taata tata’itahi e, e mea faufaa te parau ta’na e parau ra.

TE MAU HA’UTI NO TE APARAURAA

Te hinaaro ra outou i te tahi mau mana’o no te taime paraparauraa ? A tamata i teie mau ha’uti :

Taoraraa puohu pîpî : Mai te mea e e mea rahi outou i roto i te utuafare, e aore râ, e mea fifi ia faaha’uti i te mau taata atoa, a faaohipa i te puohu pîpî no te faaite e, o vai te paraparau i teie nei. Ia oti te taata tei ia’na te puohu pîpî i te paraparau, a taora i te puohu pîpî i te tahi melo ê o te utuafare no te horo’a i te taime no te paraparau.

Taata uiui : A tapûpû e piti taata i te pûpû hoê, e na te tahi e uiui i te tahi. A feruri i te tahi mau uiraa no to outou hoa e a ui ia’na i te reira mau uiraa. E nehenehe ta outou e faaohipa i te hoê « micro » mau e aore râ, i te hoê matini haruharu reo no ta outou mau uiuiraa.

Eaha ta outou e rave ? A ui i to outou utuafare i te mau uiraa rau ma te haamata na n’ia i teie uiraa, « Eaha ta outou e rave ... ? » Teie te tahi mau hi’oraa « Eaha ta outou e rave ia mo’e ana’e outou ? » e « Eaha ta outou e rave mai te mea e, e nehenehe ta outou e haere i te mau huru vahi atoa i te ao nei ? »

TAUTURU NA TE MAU METUA : TAIME HOÊ-HOÊ

E mea arearea roa ia paraparau te utuafare taatoa, e mea faufaa atoa na te mau metua e te mau tamarii ia parahi amui hoê-hoê. A rave i te taime i te mahana ia haere e farerei i ta outou mau tamarii tata’itahi. A ani i te hoê tamarii i te hoê taime ia tauturu ia outou ia faaoti i te hoê ohipa, ia haere mai na muri iho ia outou i te fare toa, e aore râ, ia paraparau ia outou i roto i to outou piha no te tahi taime iti. E nehenehe i taua huru taime poto ra e arata’i ia outou i te tahi mau aparaparauraa maitai roa.



Ua ofati Oia i te mau **TAPEA O TE POHE**



Na Elder Patrick Kearon

No te Hitu Ahuru

« E na reira ratou i te noaa te ora mure ore na roto i te Mesia, i tei ofati i te mau tapea o te pohe » (Mosia 15:23).

I te hoê po, te vai apî noa ra ta maua mau tamarii, te tai'ora matou i te papa'iraa mo'a. Te tai'ora matou no ni'a i te Faaora e ua paraparau matou e, e mea nahea Oia i ore ai e rave i te hoê noa a'e hape.

I muri a'e i taua pô ra, ua afa'i ta'u vahine i ta maua tamahine e toru matahiti, o Susie i roto i te ro'i. Ua hi'o maira o Susie i to'na mama e ua na ô maira, « Mama, ua rave o Iesu i te hoê hape ».

«Eaha ia te auraa ? » te aniraa ia a to'na metua vahine.

Na ô maira o Susie e, « Ua ofati oia i te hoê mea ».

Ma te maere rii, ua ui atura to'na metua vahine e, « Eaha Ta'na i ofati ? »

Ua pahono maira o Susie « Ua ofati o Iesu i te mau tapea o te pohe »,

Ua haamana'o a'era ta'u vahine e, ua himene raua o Susie i te himene Paraimere ra « Par un beau printemps doré » e rave rahi taime, e ua apo mai o Susie i te mau parau ra « I te pu'e tau faahoturaa raau, ua ti'a mai Iesu Mesia e ua faaru'e i te menema i reira oia i te taravaraa; ua ofati Oia i te mau tapea o te pohe ».¹ Ua faataa atura te metua vahine o Susie e, te auraa no te mau parau ra ofati i te mau tapea o te pohe, ua

tiafaahou ia o Iesu ia ti'a hoi ia tatou paatoa ia ora faahou i muri a'e i to tatou poheraa.

Ua riro taua aparauraa ra ei rave'a na maua o ta'u vahine no te haapii i ta maua mau tamahine o Lizzie, o Susie e o Emma, i te auraa mau o te taraehara no tatou tata'itahi. Ua tano o Susie : Ua ofati o Iesu i te mau tapea o te pohe. E ere râ te reira i te hoê hape. O te horo'a rahi a'e râ te reira Ta'na i horo'a mai ia tatou nei ! (A hi'o Te Parau Haapiiraa e te mau Parau Fafau 14:7.)

Ua pohe te Faaora e ua ti'a faahou ia ti'a hoi ia tatou ia ora faahou i piha'i iho i to tatou Metua i te Ao ra e to tatou utuafare mai te au i to tatou haapa'o maitai. Mai te mea e, e mea ti'amâ tatou, e nehenehe ta tatou e fana'o i te mau haamaitairaa o te tahuti ore e te ora mure ore i te hoê mahana. Te oaoa nei au i te mea e, ua ofati o Iesu i te hoê mea—te mau tapea o te pohe ! ■

NOTA

1. « Par un beau printemps doré », *Chants pour les enfants*, 57.



E nehenehe ta outou e faahipa i teie haapiiraa ei faaoaoaraa no te haapii atu â no ni'a i te parau tumu a te Paraimere no teie ava'e.

Te haapii mai nei **IESU MESIA** ia'u ia ma'iti i te maitai

No Tanner, e mea taa ê ia te Pasa i teie matahiti. Ua pohe to'na papa ruau, e ua oto roa o Tanner i te mea e, eita oia e apiti faahou ia'na i roto i taua taima taa ê ra.

Tera râ, i roto i te Paraimere, ua faahaamana'ohia ia Tanner e, te tumu tatou e faahana-hana ai i te Pata no te mea ia e, te ora nei Iesu ! A tiafaahou ai Oia,

ua tahoêhia To'na varua i To'na tino e a muri noa'tu, e ore hoi e pohe faahou. Ua apo mai o Tanner e, no te

mea ua ti'a faahou o Iesu, e hope paatoa ia te mau taata atoa

i te ti'a faahou i te hoê mahana, tae noa'tu i to'na papa ruau !

E ua faaî a'era te hoê himene no te Pata ia Tanner i te oaoa a himene ai oia

e : « Ua ti'a faahou o Iesu, o Iesu to tatou hoa. Ua î to matou aau i te oaoa ; Te ora faahou nei Oia ».¹ Ua hinaaro o Tanner ia faaite i teie parau apî maitai i te mau taata atoa. Ua faaoti oia e, na mua a'e i te Pata, e tuu oia i te pae uputa o te mau taata i te tahi a'e pae i ô ratou i te mau puohu na'ina'i faaîhia i te mau tiare no te pu'e tau faatupuraraa raau, e te mau irava no ni'a i te Ti'a-faahou-raa o Iesu. Ua feruri oia i te ataata i ni'a i to ratou mata a ite ai ratou i ta ratou tao'a horo'a i te poipoi Pata. ■

NOTA

1. « Ua Ti'a faahou Iesu », *Buka Himene na te mau Tamarii*, 70.



Te mau himene e te papa'iraa mo'a

- loane 13:15
- Te himene ta outou e ma'iti no ni'a ia Iesu Mesia
- Te mau himene no roto mai i te *Buka Himene a te mau Tamarii* : « Jésus est ressuscité » (44), « Jésus est-il ressuscité ? » (64), « Ua pohe Oia ia ora tatou » *Liahona*, Eperera 2005, api H13, « Hosana o te Pâsa » *Liahona*, Eperera 2003, api H8

Ha'uti no te Ma'iti i te Maitai I tei hea vahi i roto i te ao nei ?


I muri a'e i te ti'a-faahou-raa o lesu Mesia, ua haere atu oia e farerei i te mau taata eiaha i Ierusalem noa, i te mau taata parau ti'a atoa râ i te fenua Amerika. I roto i te utuafare, a faatoro i te hoê reni na te hoê hoho'a haere atu i ni'a i te fenua (Ierusalem e aore râ, Amerika) i reira te tupuraa. A tai'o te tahi muri i te tahi i te mau papa'iraa mo'a no te tahi atu mau ite no ni'a i te ohipa i tupu i roto i te mau hoho'a.



I e r u s a l e m a



Te haamaitai ra lesu i te mau tamarii
3 Nephi 17:11-25



Te fâ ra lesu ia Maria Magadalena
Ioane 20:14-18



Te haapii ra lesu i Amerika
3 Nephi 11:8-11

Outou ana'e

E nehenehe ta outou e hamani i ta outou iho mau puohu Pata mai ta Tanner. A faa-ohipa i te hoê api parau uouo e aore râ, parau û e a pee i te mau taahiraa i raro nei. A faa'i te titia i te mau tiare na'ina'i e aore râ, a haamaere i te hoê hoa e aore râ, i te hoê melo o te utuafare !



Te ta'uma ra lesu i te ra'i Ohipa 1:9-11



Te fâ mai ra lesu i te mau taata parau ti'a
3 Nephi 11:1-8









Te faaite ra lesu i To'na mau puta i Ta'na mau Aposetolo
Luka 24:36-40



Te ani ra lesu i te mau papaa parau o te Ati Nephi
3 Nephi 23:7-13



Te fâ ra lesu i Ta'na mau Aposetolo
Mataio 28:16-20



A tapiri e te « Scotch » e aore râ te pia

(te tahi pae)

A tapiri e te « Scotch » e aore râ te pia

A m e r i k a





Te tamata nei au ia riro mai ia Iesu

Faaohiehia

Ma te aau tae ♩ = 104-116

Te parau e te nota na Janice Kapp Perry

1. E ri - ro vau mai ia Ie - su; E pe - e au
(2. He) - re i to taa - ta tu - pu; He - re i te

I mau - a - 'na. I ro - to i te o - o -
mau ho - a. E ma - ha - na o - a -

hi - pa e i ro - to i te parau. Ia
o - a to - 'na ho - 'i - ra - a mai. Ta -

© 1980 na Janice Kapp Perry. Faturaa paruruhia.

E nehenehe i teie himene e faaohipahia no te mau hinaaro tamoni ore o te ekalesia e aore râ o te utuafare.
E ti'a ia tuuhia teie faaararaa i ni'a i te mau hoho'a atoa o te nene'ihia.

hi - na - a - ro (i) te o - hi - pa ha - pe, Ta - ma - ta vau
 pe - a vau (i) ta - 'na mau haa - pii - ra - a. E parau mai te

i te pe - e i te re - o mă - rû, «He - re i te ta - hi
 Va - ru - a Mai - tai i ro - to ia - 'u:

e te ta - hi. I ro - to i te mau me - a - 'to -

a. Te o - hi - pa e te ma - na - 'o mă - rû, Te -

ie ta Ie - su i haa - pii». 1. He - pii». 2. He - pii».

Tuahine i te **i'oa** e i te **faaroo**

Na Heather Wrigley

Te mau Ve'a a te Ekalesia

Ere o Maria e o Diana D. i te tuahine noa; e na hoa rahi atoa raua. 10 matahiti to Diana, e 12 matahiti to Maria i te ava'e atete i ma'iri a'enei. Te ora nei raua i « Roumanie », fatata e 3 000 melo no te Ekalesia i reira. Ua tapea raua i to raua faaroo ia Iesu Mesia ma te puai na roto i te haereraa i te pureraa, te tai'oraa i te mau papa'iraa mo'a, e te pureraa.

Te parau ra o Maria e, « I roto i te Ekalesia ua haa-pii mai au ia faaroo i te Atua ». I te hoê mahana, e hi'opo'araa ta'na, e no reira, ua pure oia i te Metua i te Ao ra na roto i te i'oa o Iesu Mesia no te ani i te tauturu. I te fariiraa oia i te hoê numera maitai, ua mana'o oia e, ua tauturu mai te Metua i te Ao ra ia'na.

Te parau ra o Diana e, ua tauturu te Buka a Moromona ia'na ia roaa te faaroo. Te parau ra oia e, « I te mau mahana atoa e tai'o vau i te Buka a Moromona, e farii au i te hoê mahana maitai ». Ta'na aamu papa'iraa mo'a au roa o te aamu ia o Iosepha Semita. Ua parau oia e, « Ua pure oia, e ua tauturu mai te Atua e o Iesu Mesia ia'na ». ■



TOTORA

Te monamona au roa na teie na tuahine o te totora ia: E mea au na Maria te « brownies », e mea au na Diana te faraoa monamona totora.

TE HIMENE AUHIA

E faata'i o Maria e o Diana i te piana. Te himene au roa na Maria oia hoi « A here outou ». No ni'a ia i te faaueraa a lesu ia here i te tahi atu mau taata. Fatata e nehenehe ta Dianna e ha'uti maitai i te reira himene, tera râ, i te pae hopea, e mea paari rii ia, ta'na ia parauraa.

**E MEA AU NA'U IA HI'O I TE HIERO**

Te hinaaro nei o Maria e o Diana ia faaipoipo i roto i te hiero i te hoê mahana. Te ora nei raua i roto i te Mataeinaa Hiero no Kyiv Ukraine.

Ia paari rii a'e o Diana, e haere oia i te Hiero no Kyiv Ukraine no te rave i te mau bapetizoraa no te feia i pohe. Ua tano te paari o Maria no te haere. E 500 maira (805 km) te atea te hiero.

NA MUA TE UTUAFARE

E mea here roa na Maria e o Diana to raua na metua. Ua parau o Maria e, « E imi o mama i te rave'a ia maitai matou ia pohehia matou i te ma'i ». Ua parau o Diana e, « Na papa e afa'i ia matou i te fare haapiiraa ».

TE MAU HIMENE

Te himene au roa na Diana oia ho'i, « I te Atea, I Iudea ra », te faaite maira te reira ia tatou i te taime a fanauhia ai o lesu Mesia. Te faaohipa nei te mau melo i « Roumanie » i te buka himene matie a te Ekalesia. « Imnuri » to'na auaa « himene » i roto i te reo no « Roumanie ».





Ua faaite mai o Elder Richard G. Scott no te Pūpū no te Tino Ahuru ma Piti Aposetolo i te tahi mau mana'o no ni'a i teie tumu parau.

Eaha ta'u e nehenehe e rave no te haapa'o i te faanahoraa a te METUA I TE AO RA no'u ?



A haapii mai i te parau no te faanahoraa o te oaoa na roto i te tai'oraa i te mau papa'iraa mo'a.



A faaroo i te reo o te mau peropheta no teie anotau e no mutaa ihora.



A haapa'o i te mau mana'o hohonu no roto mai i te muhumuhu a te Varua Maitai.



Mai te mea e titauhia, a titau i te a'o e te arata'iraa mai roto mai i te mau metua e i to outou feia faatere no te autahu'araa.

No roto mai i « The Joy of Living the Great Plan of Happiness », Ensign, Novema 1996, 75.

TA'U MAU PARAU TUMU NO TE EVANELIA

E pee au i te faanahoraa ta to'u Metua i te Ao ra i faataa no'u.

E haamana'o noa vau i te fafauraa o to'u bapetizoraa e e faaroo vau i te Varua Maitai.

E maiti au i te maitai.

Ua ite au e nehenehe au ia tatarahapa ia rave ana'e au i te hoê hape.

E vai parau-ti'a noa vau i to'u Metua i te Ao ra, ia vetahi ê, e ia'u iho nei.

E faatura vau i te i'oa o te Metua i te Ao ra e i to Iesu Mesia.
Eita vau e parau i te parau ino e aore râ, e parau i te mau parau teimaha.

E rave au i te mau ohipa i te mahana sabati o te tauturu ia'u ia
haafatata'tu i te Metua i te Ao ra e ia Iesu Mesia.

E faatura vau i to'u na metua e e rave au i ta'u hopoi'a no te haapuairaa i to'u utuafare.

E tape'a mâ vau i to'u feruriraa e e haamo'a vau i to'u tino,
e eita vau e rave i te mau mea o te haaviivii ia'u.

E ahu vau i te ahu e tano no te faaite i to'u faatura i te Metua i te Ao ra e ia'u iho nei.

E tai'o noa vau e e mata'ita'i au i te mau mea e oaoa'i te Metua i te Ao ra.

E faaroo noa vau i te himene e oaoa'i te Metua i te Ao ra.

E imi au i te mau hoa maitai e e hamani maitai au ia vetahi ê.

E ora mâ vau mai teie atu no te tomo i roto i te hiero e ia rave
i ta'u tuhaa ia roaa te hoê utuafare mure ore.

E TAMARII AU NA TE ATUA RA.

Ua ite au e ua here to'u Metua i te Ao ra ia'u, e ua here atoa vau Ia'na.

E nehenehe au e pure i te Metua i te Ao ra i te mau taima atoa, i te mau vahi atoa.

Te tamata nei au i te haamana'o e i te pee ia Iesu Mesia.

Te iteraa i te oaoa o Pata


No roto mai i te hoê aamu mau





Te mau taahiraa avae no Pata

Ua rave o Iesu Mesia i te ohipa faufaa roa i te tahi mau vahi taa ê i te mau mahana hou a faasataurohia ai Oia e a ti'a faahou mai ai Oia. A pee i te mau taahiraa avae no te ite e, ua haere Oia i hea, e eaha Ta'na ohipa i rave.



2. Ua haere o Iesu i Ierusalem na ni'a i te hoê ateni. E rave rahi taata tei oaoa i te iteraa la'na.


6. Ua ti'a faahou Iesu.

5. Ua faasataurohia Iesu.

1. Ua haapii o Iesu i te taata i ni'a i te mou'a tei parauhia te Mou'a Oliveta.

3. Ua faaora o Iesu i te mau taata ma'i i te hiero.

4. I roto i te Ô i Getesemane, ua pure o Iesu i te Metua i te Ao ra e ua mau iui ho'i no ta tatou mau hara.



Te mau parau apî o te Ekalesia

A haere i ni'a i te news.lds.org no te tahi atu â mau parau apî e mau ohipa a te Ekalesia.

Te mau taime rahi o te haapiiiraana na te feia faatere o te ao nei, avei'a no te tupuraa mau

Na Heather Whittle Wrigley

Te mau parau apî e te mau ohipa a te Ekalesia

Ua faataa mai te feia faatere o te Ekalesia i te parau no te « tupuraa mau » e te nahea ia rave hope i te reira i te taime no te haapiiiraana na te feia faatere o te ao nei i te 11 no Fepuare 2012.

Ua tahoê mai te peresideni Dieter F. Uchtdorf, Tauturu Piti i roto i te Peresidenira Matamua, te mau melo no te Pūpū no te Tino Ahuru Ma Piti Aposetolo, te peresidenira no te Hitu Ahuru, e te mau peresidenira no te mau pūpū tauturu o te Ekalesia i roto i te haapiiraana i te feia faatere o te Ekalesia na te ao atoa nei.

« I roto i te parau a te Ekalesia, e nehenehe i te *tupuraa* e faaauhia mai te 'mau melo apî' ... Te *tupuraa mau* râ, 'o te tupuraa ia i te rahi te numera o te mau melo itoito' », o ta te peresideni Uchtdorf ia i haamaramarama mai.

Ua parau faahou mai o Elder M. Russell Ballard no te Pūpū no te Tino Ahuru Ma Piti Aposetolo e, « E tupu te Ekalesia i te rahi ia rahi ana'e te haapao maitai o te taata tataitahi e o te utuafare o te noaa na roto i te faafariuraa papu o te taata tataitahi ».

Taua haapa'oraa rahi ra oia ho'i o te mau ohipa ia e ere i te mea ohie roa ia faito, mai te pure i te mahana tata'itahi, te tuatapaparaa i te papa'iraa moa, te pureraa pô utuafare, te here i roto i te utuafare, e te iteraa rau o te taata iho o te tarae-hara, te parau ia a te peresideni Uchtdorf.

« E mea pinepine tatou i te haafifi i te nehenehe e te ohie o te evanelia a Iesu Mesia na roto i te mau tabula hopea ore o te mau mea titau-hu'ahu'a-hia », o ta'na ia i parau. « Area râ ia faatumu ana'e tatou i ni'a i te 'no te aha' o te evanelia, e ore ia te anoira ».

Ua faatumuhia te tuhaa rahi o te haapuroraa i ni'a i te mau haapiiraana tumu e te mau parau tumu, na te reira e horo'a mai i te mau pahonoraana i te mau uiraa « no te aha ».

« E aratai te mau uiraa tano 'no te aha' i te mau faaotiraana tano 'o vai', 'eaha', 'afea', 'i hea', e 'nahea', te parau ia a te peresideni Uchtdorf.

Te faaipoiporaa e te utuafare i roto i te faanahoraa

« O te mau utuafare te tino o te Ekalesia », ua na ô mai te peresideni Boyd K. Packer, peresideni no te Pūpū no te Tino Ahuru Ma Piti Aposetolo. « Te mau paroisa e [o] te mau tīti, e rave'a noa te reira. Ia paraparau tatou no te mau utuafare, i reira tatou e ite ai i te tupuraa mau i roto i te Ekalesia ».

Ua faahiti mai oia e, e ti'a i te mau tane faaipoipo e te mau metua tane atoa ia riro ei taata faatere no te autahu'araa i roto to'na fare, ma te peresideniraana i to'na utuafare na roto i te parau-ti'a. Oia'toa, ua parau oia e, e ti'a i te feia faatere o te autahu'araa ia arata'i ma te ti'amâ—noa'tu te rau o te mau toro'a, e faito au te mana o te taata ti'amâ e mau nei i te hoê autahu'araa i te tahi (a hi'o PH&PF 1:20).

Ua haapapū o Elder Russell M. Nelson no te Pūpū no te Tino Ahuru Ma Piti Aposetolo e, ia patu te tane e te vahine faaipoipo, te metua tane e te metua vahine i te hoê auraa no te here, no te tatarahapa, e no te pure ia manuia te haapuairaa e te parururaa i te utuafare, oia ho'i te « tumu no te opuaraa a Tei Hamani no te hopea mure ore o Ta'na mau tamarii » (« Te Utuafare : E Poro'i i to te Ao nei », *Liahona* e *Ensign*, Novema 2010, 129).

« E toru taime i roto i te papa'iraa mo'a, te hiti ra te faaararaa e, e riro te ao atoa nei ei mea faufaa ore i te ho'iraa o te Fatu aita ana'e te vairaa o te taata i te tahi faito ti'a », o ta'na ia i parau mai. « I te mau taime atoa, e tu'ati taua faaararaa ra i te utuafare o te taata nei aita te mau oro'a taati no te hiero i ravehia. Aita teie mau oro'a no te faateiteiraa, aita atoa ia te hana-hana o te Atua e tupu ».

E titau te faaotiraana i teie opuaraa hopea—te ora mure ore e te faateiteiraa o te mau tamarii a te Atua—i taua tupuraa mau ra i roto i to tatou mau utuafare, i roto i te mau paroisa e te mau amaa, e na roto i te Ekalesia taatoa.



Faaohiparaa i te evanelia

E tae mai te tupuraa mau e te faafariuraa na roto i te faaohiparaa i te evanelia i roto i te oraraa i te mau mahana atoa. I roto i te hoê taua-parau-raa uiraa pahonoraa, ua faataa mai o Elder L. Tom Perry e o Elder D. Todd Christofferson no te Pūpū no te Tino Ahuru Ma Piti Aposetolo e, te faaohiparaa mau o te evanelia o te raveraa ia e te tape'araa i te mau fafauraa no te hiero. Ua parau o Elder Christofferson e, e tau i te haapa'oraa i te mau fafauraa i te taata tino nei ei taata mo'a na roto i te tau.

Te tororaa i te rima tauturu ia vetahi ê o te tahi ia huru no te faaohiparaa i te evanelia. Tei te mau melo ra te hopoia, ei taata hoê e ei Ekalesia, ia toro i te rima tauturu no te faaora i te feia rava'i ore i te pae varua e i te pae tino, te parau ia a te feia faatere.

Eiaha roa tatou e otohe no te horo'a i te rima tauturu i te tahi atu mau faaroo e mau faanahoraa taviniraa rau, no te aupuru atu i te feia vëvë e te rava'i ore, te parau ia a Elder Christofferson. E ti'a i te feia faatere no te autahu'araa ia arata'i mai i roto i teie mau tutavaraa, e ti'a râ i te mau melo e i te mau misionare ia paturu maitai mai i roto i teie ohipa.

Na te hoê taua-parau-raa i faananea roa i te faatumuraa i ni'a i te aupururaa i te mau utuafare, te haapuairaa i te feia e mau nei i te autahu'araa a Melehizedeka, e te tautururaa i te paturaa i te faaroo e te iteraa papû o te feia apî. Ua amui mai o Elder Ballard e o Elder Neil L. Andersen no te Pūpū no te Tino Ahuru Ma Piti Aposetolo, oia'toa o Elder Ronald A. Rasband no te Peresideniraa no te Hitu Ahuru ; o Elaine S. Dalton, peresideni

Ua paraparau o Elder M. Russell Ballard no te Pūpū no te Tino Ahuru Ma Piti Aposetolo i roto i te hoê taua-parau-raa no te haapiipiiraa na te feia faatere o te ao nei no Fepuare 2012.

I roto i te haapiipiiraa na te feia faatere o te ao nei no fepuare, ua parau te peresideni Dieter F. Uchtdorf, Tauturu Piti i roto i te Peresideniraa Matamua e, « te mea matamua e ti'a ia tatou ia rave o te taaraa ia. Te piti, te faaohiparaa ia i to tatou ite ... e mea iti te maitai i te faarooraa i te parau a te Atua mai te mea eita tatou e faaohipa i roto i to tatou mau oraraa te mea ta tatou i faaroo ».

Ua ani manihini oia i te feia faatere o te Ekalesia ia rave e toru ohipa i muri mai i te haapuroraa a te feia faatere, e na roto i ta ratou taviniraa i roto i to ratou piiraa ia farii mai i te nehenehe e roaa mai i te haapiiraa a te feia faatere o te Ekalesia :

1. Ei taata hoê e ei apooraa, a feruri ma te pure i te haapiiraa ta outou i farii e a ite atu e « no te aha » ta outou taviniraa e aupururaa.
2. I muri iho i te feruri-maite-raa e te taua-parau-raa, a faataa i te tahi mau ohipa taa ê o ta outou e rave papû atu. E mea ti'a i te mau ohipa ia faatanohia i ni'a i te mau huru e te mau hinaaro o te faanahoraa tata'itahi, te paroisa, te tītī, te utuafare, e te taata hoê.
3. Ia oti outou i te rave i taua mau faotiraa ra, a pee atu i te tereraa o te reira i roto i te mau apooraa paroisa atoa ia au i ta outou hopoia e to outou piiraa.

rahi no te Feia apî Tamahine e o Rosemary M. Wixom, peresideni rahi no te Paraimere.

Ua parau o Elder Rasband e, ia faaô mai te feia faatere atoa no te tauturu i te faaho'i-papû-raa mai i te mau melo, e ua haapapû mai o Elder Andersen e, ia faaô rahi mai te feia apî no te tauturu i te ohipa faaho'iraa mai e te haapuairaa i te tahi atu feia apî.

Rave-hope-raa i te tupuraa mau

E tae mai te tupuraa mau a faaohipa ai tatou i te mau parau tumu o te evanelia i roto i to tatou oraraa i te mau mahana atoa, te faahitiraa ia a te peresideni Uchtdorf.

« A feruri ai outou i teie mau tumu parau, a ui ia outou iho 'no te aha' o ta outou taviniraa e te hopea o te 'no reira' i roto i ta outou mau hopena ei taata e ei apooraa », ta'na i parau.

Haapii hau atu

E nehenehe te mau taata e mata'ita'i, e faaroo, e nene'i, e e faa'itea i te mau materia no roto mai i te haapuroraraa i roto i na reo e 12 i ni'a i te tahua itenati lds.org/study/other-addresses e te pataraa i ni'a i te **Worldwide Leadership Training**. ■

Aniraa no te mau parau papa'i

Te anaanatae nei te *Liahona* i te tai'o atu no ni'a i ta outou huru raveraa no te noela i to outou vahi :

- Eaha te mea ta to outou utuafare e faatupu i taua tau ra ?
- Eaha te mau peu i matauhia i to outou fenua ?
- Eaha te mau peu apî ta outou i rave no te haafatata ia outou iho e to outou utuafare i te Faaora ?
- Te vai anei ra te tahi noela taa ê—tera ihoa râ o tei faahoho'a mai i te mau peu matauhia—o ta outou e nehenehe e faaite mai ?

A hapono mai na i to outou mau haamana'oraa e te mau mana'o i te *Liahona* na mua i te 1 no tiunu 2012 i te imere liahona@ldschurch.org. ■

Horo'a i to te ao nei, te tahua itenati BibleVideos.LDS.org

I roto i te pureraa noela a te Peresideniraa Matamua, ua faa'ite mai te feia faatere i te tahua itenati The Life of Jesus Christ Bible Videos, te hoê « horo'a » i to te ao nei.

Te BibleVideos.lds.org o te hoê ia haaputuraa no te tahi mau hoho'a teata potopoto e faaite ra i te oraraa o te Mesia, mai te fanauraa o te Mesia i te ti'a-faahou-raa o te Faaora.

Na te peresideni Henry B. Eyring, tauturu piti i roto i te Peresideniraa Matamua, i faaara mai i te tahua itenati i roto i te pureraa.

« Mai te mau papa'iraa mo'a tei haapa'o-maite-hia i roto i teie mau hoho'a teata potopoto, e riro outou i te feruri e, e mea hau te reira mau tuhaa ohipa », o ta'na ia mau parau. « Na to outou faaroo e na te Varua Maitai e faatupu i te mana'o o te aau e au i teie mau ohipa tei tau i roa ino i te ao ».

Tei te fare hamaniraa hoho'a teata LDS Motion Picture Studio South Campus i Goshen, Utah, o ta te Ekalesia i faati'a apî mai, te mau materia hoho'a video e tavririha ai e e iritihia mai ai. Ua haamata i reira te opuaraa hamani hoho'a no te Faufaa Apî i te ava'e no atete 2011.

I te hopea no taua opuaraa ra, e mataka mai hau i te 100 hoho'a teata poto e faaiteite nei i te oraraa o te Mesia, ia au i te mea e tai'ohia ra i roto i te iritiraa a te Arii Iakopo no te Bibilia, te King James Version.

Te vai atoa nei te materia afa'ifa'i no teie tahua itenati e teie te mau reo e vai ra, te reo peretane (BibleVideos.lds.org), te reo paniora (videosdelabiblia.org), e te reo potiti (videosdabiblia.org). Oia atoa te rave'a no te iPad, ei reira te tahi fana'o huru apî no te mata, te tari'a, e te manimani rima i te mau aamu o te Bibilia. ■



la oti pauroa ana'e, fatata i te 100 hoho'a teata e faaiteite ra i te mau ohipa no te Faufaa Apî no ni'a i te Mesia o te haapararehia i ni'a i te tahua itenati The Life of Jesus Christ Bible Videos.

Te haapii nei o Elder Christofferson e o Elder Jensen i te mau melo no te fenua Ra-parata (Argentine)

I te mahana maa 12 no novema 2011, ua paraparau o Elder D. Todd Christofferson no te Pūpū no te Tino Ahuru Ma Piti Aposetolo e o Elder Jay E. Jensen no te Peresideniraa o te Hitu Ahuru i te feia apī, te feia apī paari, te feia faatere o te autahu'araa, te mau misionare e te mau melo no Salta, Ra-parata.

Tei reira atoa o Elder Mervyn B. Arnold, peresideni area no te tuhaa apatoa no Marite Apatoa ; ta'na vahine, o Devonna; e o Elder Ruben Spitale, Hitu Ahuru Area. Ua amui atoa mai o Kathy, te vahine a Elder Christofferson e te vahine a Elder Jensen, o Lona.

Fatata i te 1 300 feia apī e te mau metua tei tae mai i te pureraa pae auahi i reira o Elder Christofferson raua Elder Jensen i te paraparauraa. Te tahi atoa 10 000 melo i roto 70 mau fare pū no te tītī i roto ia Ra-parata tei mata'ita'i i te haapuroraa.

Ua parau Elder Jensen, oia tei tavini a'e na ei peresideni no te area i te tuhaa apatoa no Marite Apatoa, « Ahani noa'tu eita outou e haamana'o i ta'u mau parau, te hinaaro nei râ vau ia haamana'o outou i te hoê parau a te hoê peropheta, te peresideni Thomas S. Monson, o ta'u e faa'ite papū nei e e peropheta mau na te Atua. Teie te parau : 'Na te mau faaotiraa e faataa i te ananahi' ».

Tei ia tatou ra te ti'amâraa—te iteraa e te ti'araa ia rave i te mau

faaotiraa—te parau ra o Elder Jensen, e na roto i teie mau faaotiraa ua ma'iti tatou i to tatou ananahi.

Ua faati'a mai oia i te aamu o te hoê hoa tei maiti i te hoê pô ia i nu i te ava e ia faahoro i te pereoo e ua faatupu i te hoê ati tei haapohe roa e piti taata. Ua faati'a atura oia i to'na iho aamu raua ta'na vahine tei ma'iti e faataime rii i te faaipoiporaa ia nehenehe ia'na ia tavini i te hoê misioni rave tamau ei taure'are'a apī.

« I [to'u ho'iraa] ua faaipoipo maua i roto i te hiero. Ua rave maua i te mau fafauraa, o ta maua atoa i faaapī tamau noa i te mau hepetoma atoa o to maua oraraa. Ua rave maua i te hoê faaotiraa tei faataa i to maua ananahi », ta'na ia i parau.

O te tuahine Christofferson tei ti'a mai i muri iho, ua horo'a mai oia i to'na iteraa papū no nī'a i te mau haamaitairaa no te haapa'oraa i te mau fafauraa, e na Elder Christofferson i opani i te pureraa.

« Te mea faufaa roa'e o ta tatou e titau atu o te here e te faaroo », te parau ia a Elder Christofferson. « Na te faaroo e tauturu ia tatou i roto i to tatou faaipoiporaa, te utuafare, te ohipa, [e] te raveraa i te ohipa ».

Ua haapapū oia e, na te mau faaueraa e horo'a i te avei'a no to tatou oraraa e e tauturu ia tatou ia farii i te mea faufaa a'e.

I muri iho ua a'o oia i te feia apī e i te mau metua atoa ia rave i te

HOHO'A NA JAMES DALRYMPLE



faaotiraa ia pee i te a'o te itehia i roto i te buka iti *No te Puai o te Feia Apī*.

« E haapuahi rahi te reira i ta outou mau tamarii, noa'tu aita outou i pihai iho ia ratou—no to ratou ite e, te haapa'o nei to ratou na metua i taua â mau parau tumu ra », ta'na ia i parau.

Ua opani o Elder Christofferson ma te faatae atu i to'na here i te mau melo no Ra parata, i reira oia i te taviniraa i te hoê misioni fatata e pae ahuru matahiti i teie nei.

A tere ai raua i Salta, ua farerei atoa o Elder Christofferson e o Elder Jensen i te mau misionare rave tamau e te feia apī paari, e ua faatae ia ratou i te here o te mau Taea'e.

No te tai'o hau atu i te ohipa misioni a te mau aposetolo no teie tau, a haere atu i te tuhaa Prophets and Apostles Speak Today i nī'a i te tahuha itenati LDS.org. ■

Ua paraparau atoa o Elder Christofferson e o Elder Jensen i te mau misionare no te misioni no Argentina Resistencia i te omuaraa o te ava'e no novema 2011.



Te hiero no Quetzaltenango Guatemala, haamo'ahia i te 11 no titema 2011, e te peresideni Dieter F. Uchtdorf, o te 136raa o te hiero a te Ekalesia.

Pureraa haamo'araa no te hiero no Quetzaltenango Guatemala

Ua haamo'ahia te hiero no Quetzaltenango Guatemala i te sabati 11 no titema 2011, i roto e toru tuhaa pureraa e te peresideni Dieter F. Uchtdorf, Tauturu Piti i roto i te Peresideniraa Matamua. Ua haapurorohia te mau tuhaa pureraa haamo'araa i te mau amuiraa o te Ekalesia tapiri noa i te hiero.

« Aue te nehenehe o teie hiero », te parau ia a te peresideni Uchtdorf i te faaoaoaraa i te mahana maa, i reira te feia apî no te mau amuiraa i te oriraa, i te himeneraa, e i te faaiteiteraa i te aamu e te peu no taua vahi ra. « E anaana to'na mai te hoê tao'a piru, e ua riro te reira ei hoê tao'a piru no teie pae fenua ».

Te hiero no Quetzaltenango Guatemala, o te 136raa ia o te hiero a te Ekalesia na te ao atoa nei e te paeraa i Marite Ropu. E faaohipahia teie hiero e na 60 000 feia mo'a i te mau mahana hopea nei.

Oro'a tapuraa repo no te hituraa o te hiero i Paratira (Brésil)

I te 15 no novema 2011, ua peresideni o Elder David A. Bednar no te Püpü no te Tino Ahuru Ma Piti Aposetolo i te oro'a tapuraa repo no te hiero no Fortaleza Brazil, te hituraa o te hiero i Paratira.

« E riro teie hiero mai te hoê puna no te ti'aturi, no te maramarama, e no te faaroo i te Atua no ratou atoa e haere mai e e taahi mai i ô nei e i roto i teie aua », te parau ia a Elder Bednar. « E maitai atu â teie oire e te taa ê ho'i no te mea te patuhia ra te hiero i ô nei ».

Te patuhia ra te hiero i Avenida Santos Dumont i Fortaleza, Ceará, Brazil (Paratira). Na te peresideni Thomas S. Monson i faaara i te paturaa o te hiero no Fortaleza Brazil i te amuiraa rahi ra no atopa 2009. ■

Aru'i himeneraa i Puerto Rico, tauasini ti'ahapa taata tei tae mai

I te 18 no titema 2011, ua amui mai te mau melo no na titi e pae no Puerto Rico i roto i te hoê aru'i himeneraa no te noera i Paseo de las Artes i te oire no Caguas. Piri atu i te 85 melo o te Ekalesia tei himene, e e 2 500 ti'ahapa taata o te oire tei tae mai.

Fare putuputuraa apî na te feia apî paari, te toruraa i Afirita.

I te 4 no novema 2011, ua rave te feia apî paari no te titi no Soweto South Africa (Afirita apatoa) i ta ratou faaoaoaraa matamua i roto i te hoê fare apî o te faaohipa-noa-hia ei fare putuputuraa na te feia apî paari.

Hau atu i te 140 fare putuputuraa e vai ra na Europa, e te tahi i tera e tera vahi i te mau Hau Amui no Marite. Te fare putuputuraa i Soweto o te toruraa ia i Afirita ; te tahi te vai ra i te fenua Repupirita Hau Manahune no Congo e i Zimbabwe.

Rave'a taa ê mau, maa uiraa te matara mai

Te hoê noa peperu api tei riro ei haamataraa no te « Questions for God [Uiraa i te Atua] » te faaoaoaraa misionare i Nizhniy Novgorod, i Rusia, i te 9 no atopa 2011.

No te roaraa e hitu hora, hau atu i te 150 taata tei tapiri mai i na airaa maa e piti i roto i te hoê aroa rahi, e ua rave i te peni tara, e ua papa'i i ta ratou mau uiraa. I te hopea, e 84 uiraa tei papa'i-hia i ni'a i te peperu api. E rave rahi taata tei parau i to ratou hiaai ia pahono mai te mau misionare i reira.

No te tai'o hau atu â no teie e te tahi atu mau aamu, a haere atu i ni'a news.lds.org. ■

Hoê avei'a faufaa mau

Te *Liahona* o to'u ia tapa'o ava i roto i teie oraraa. Ia te reira, eita roa vau e mo'e atu. Te ti'aturi nei au e te feia atoa e tai'o nei i te mau ve'a a te Ekalesia e ite ti'a ratou i te mea ta ratou e hinaaro. E peresideni paraimere au, e te ite nei au e mea au roa na te tamarii e faaroo i te mau aamu no ni'a i te tahi atu mau tamarii mai ia ratou ra i roto i te ve'a. Te *Liahona* o te hoê ia avei'a faufaa roa i roto i to tatou oraraa ; e tauturu te reira ia tatou ia ape i te mau marei a Satane.


Yanina Ivanivna Davydenko, no Ukraine

E faatae te mau iteraa i te tamahanahanaraa

Ua tauturu mau te *Liahona* ia'u nei na roto i ta'na mau poro'i e ta'na mau parau papa'i. I roto i teie oraraa arepurepu to tatou, e mea au na'u ia faaea i te tahi taime o te mahana no te tai'o i te hoê parau papa'i i roto i te ve'a o te faaite ra i te iteraa no te tahi mau melo. Tamau noa teie mau parau papa'i i te tauturu ia'u no te ite i te tahi tamahanahanaraa i te pae varua e te faaapîraa i to'u hinaaro ia ho'i i mua i te aro o te Atua e o lesu Mesia e to'u utuafare.

João Carlos, no Paratira

A hapono atu i to outou mau iteraa e aore râ mau mana'o tauturu i te liahona@ldschurch.org. E riro paha te papa'iraa i te tauuihia no te roa e aore râ te maramaramaraa. ■



I roto i teie papa'iraa te vai nei te mau parau papa'i e te mau ohiparaa o te nehenehe e faaohipahia no te pureraa pô utuafare. Teie e piti hi'oraa.



« Te mau haamaitairaa o te haapiiraa evanelia », api 20: A hi'o faahou i te parau papa'i hou e faaoti ai e nahea i te faaohipa maitai a'e i te parau poro'i i to outou utuafare. Mai te mea te vai ra ta outou feia api i roto i te haapiiraa evanelia, a ui na mua ia ratou no te aha e mea faufaa te haapiiraa evanelia no ratou. I muri iho, a tai'o i te tuhaa tei piihia « te fariiraa i te mau haamaitairaa i fafauhia ». A faaitoito i te mau tamarii api ia faaineine ia ratou no te haere i te haapiiraa evanelia ia paari mai ratou. Mai te mea e aita ta outou e tamarii ua ti'a te matahiti no te haere i te haapiiraa evanelia, e nehenehe ta outou e tai'o i te parau papa'i e i muri iho a tauaparau i te faufaa mau o te haapiiraa evanelia no te feia api i teie mahana.

« Ua ite te mau taata atoa ia Bleck », api 42: A feruri e himene i te himene « A Haapa'o » (*Te Mau Himene*, no. 143) ei himene matamua. A tai'o e aore râ a faati'a i te aamu no Bleck. A ani i te mau melo o te utuafare ia faaite mai i te hoê iteraa a rave ai ratou i te hoê faaotiraa fifi mau i roto i na e'a taa ê e ia faaite mai te mau hopearaa no roto mai i te faaotiraa ta ratou i rave. A faaoti na roto i te tai'oraa i te faahitiraa a te peresideni Thomas S. Monson. ■

Te ohie, te hau, e te aramoina ore

Ua riro ei hoê pureraa pô utuafare aramoina ore e ta maua na tamahine e piti, o Angélique, 6 matahiti, e o Béthanie, 4 matahiti. Ua topa perehu roa maua ta'u tane i roto i to maua parahiraa marû, e te rohirohi taatoa e te taa ore e nahea ra i te haamata. I reira, ti'a mai nei ta maua na tamahine e ua faatere i te tarena ohipa no te pureraa pô utuafare, ma te faataa i ta te tahi e ta te tahi ohipa. Te hopoia a ta'u tane o te arata'iraa ia, na Béthanie te himene, na'u te mau faaoaoaraa, e na Angélique te haapiiraa.

Ua ma'iti o Béthanie i te himene « Oh, j'aime voir le temple » (*Chants pour les enfants*, 99), e ua himene amui matou. Ua horo'a papa i te pure matamua. I muri iho ua rave Angélique i te *Liahona* o te ava'e e ua maiti oia i te hoê parau papa'i i roto i te tuhaa na te mau tamarii. Te haapii nei oia i te tai'o i te haapiiraa, no reira ua tai'o mai oia i te parau papa'i na matou. Auê te hau i roto i to matou fare. Ua haapapû mai te Varua e e parau mau ta'na e tai'o ra.

Ua ha'uti rii matou, e na'u i horo'a i te pure hopea. A pure ai au, aita ta'u e ore e haamauruuru i te Metua i te Ao ra no To'na Varua e To'na here e oia atoa no te haamaitairaa i to matou utuafare i na varua na'ina'i e piti. Ua ite maua ta'u tane e, e hopoia na maua i te aupururaa ia raua e te haapiiraa ia raua i te evanelia. Te faatupuraa i te pureraa pô utuafare o te hoê ia tuhaa no taua hopoia mo'a ra. ■

Sylvie Poussin, no Réunion

**Na Bishop
Richard C. Edgley**

Tauturu Matamua i roto i te
Episekopora Faatere Rahi



TE TI'ATURU I TE TARA EHARA

Ua farerei au i te mau taata tei mo'e roa te ti'aturiraa. Ua feruri ratou e, te tata-rahapa, eita ia e maraa ia ratou, e te faaoreraa i te hapa, eita e roaa ia ratou. Aita teie mau taata e maramarama nei i te mana tamâ o te taraehara. E aore râ, mai te mea e, te maramarama nei ratou, aita ia ratou i ite hohonu i te auraa o te mauui o Iesu Mesia i Getesemane e i ni'a i te satauro. No tatou paatoa mai te mea e, e faaru'e tatou i te ti'aturiraa ia tamâhia to tatou oraraa, te patoi ra ia tatou i te hohonu, te mana e te aano o To'na mauui no tatou.

Tau matahiti i ma'iri a'enei ua tonohia vau i te hoê amuiraa tîti, ia uiui i te hoê tane e 21 matahiti no te haapapû i to'na ti'amâ ia tavini i te hoê misioni. I teie nei, aita te Hui Mana Faatere Rahi e uiui i te mau misionare e faaineine ra. No reira, e mea taa ê rii teie mea. A tai'o ai au i te tahi mau faaiteraa no ni'a i te mau tumu o ta'u uiuiraa, ua mauui to'u mafatu. Ua rave teie tamaiti i te tahi mau hara rahi. Ua maere au no te aha vau i anihia ai ia farerei i te hoê taata mai teie te huru, oia hoi, e ere ia i te ohipa matarohia na'u ia horo'a i te parau faatia ei misionare.

I muri a'e i te tuhaa pureraa no te po Mahana Maa o te amuiraa, ua haere au i roto i te piha toroa o te peresideni tîti no taua uiuiraa ra. A tia'i noa ai au, ua haere maira te hoê taure'are'a nehenehe e te hi'oraa maitai. Ua uiui noa vau e, e nahea vau i te tatarahapa i te mea e, e mea papû maitai e, ua hinaaro oia e paraparau, e e farereiraa hoi ta'u e te hoê taure'are'a fifi roa. I muri iho ua faaite maira oia i to'na i'oa. O'na ia taua taure'are'a ra ta'u e tia'i ra.

I roto i te mo'emo'e o te piha toroa, ua ui noa'tu vau hoê ana'e uiraa: « No te aha vau e uiui ai ia oe? »

*E ti'a i te ti'a-
turiraa ia haa-
mauhia eiaha
i ni'a noa i te
ite e i te iteraa
papû, i ni'a
atoa râ i te
faaohiparaa i
te taraehara no
te taata iho.*

Ua faatia maira oia i to'na oraraa i mutaa ihora. Ia hope ta'na faatiaraa, ua hamata a'era oia i te faataa mai i te mau taahiraa e te mauui ta'na i farerei. Ua paraparau maira oia no ni'a i te taraehara—te mana hope ore o te taraehara. Ua faaite mai oia i to'na iteraa papû e ua faaite i to'na here i te Faaora. E ua na ô maira oia e, « Te ti'aturi nei au e, ua nava'i te mana o te mauui o te Faaora i Getesemane e To'na tusia i ni'a i te satauro, no te faaora i te hoê taata mai ia'u te huru ».

Ua putapu vau i to'na haehaa e i ta te Varua faaururaa, no reira, ua parau atura vau e, « Te tuu nei au i to oe i'oa ia tavini oe ei ti'a no Iesu Mesia ». E ua parau atura vau e, « E ani au ia oe hoê noa iho mea. Te hinaaro nei au ia riro oe ei misionare maitai a'e i roto i te Ekalesia taatoa. Ti'a râ atu ai ».

E toru e aore râ, e maha ava'e i muri mai, te paraparau ra maua te Tuahine Edgley i roto i te hoê pû haapiipiraa misionare. I te pae hopea o te pureraa, te farerei ra vau i te mau misionare a ite atu ai au i te hoê taure'are'a matauhia e au.

Ua ani maira oia e, « Te haamana'o ra oe ia'u? »



Ua huru haamâ rii au, e na ô atura vau e, « Eiaha oe e inoino mai. Ua ite au e, ua matau vau ia oe, tera râ, aita vau e haamana'o nei ».

Na ô mai nei oia e, « E faaite atu vau o vai au nei. O vau te misionare maitai roa a'e i roto i teie pû haapiipiraa misionare ». E ua ti'aturi au ia'na.


Ua niuhia te ti'aturiraa o teie taure'are'a eiaha i ni'a noa i te ite e i te iteraa papû o te taraehara, i ni'a atoa râ i te faaohiparaa i teie horo'a i ni'a ia'na iho. Ua ite oia e, no'na iho teie horo'a ! Ua ite oia i te mana o te taraehara e i te ti'aturiraa ta'na e horo'a i te taime ua mo'e te mau mea atoa, e aore e ti'aturiraa faahou. ■

No roto mai i te hoê a'oraa i hohorahia i te hoê pureraa i Brigham Young University i te 4 no novema 2008. No te a'oraa taatoa i roto i te reo peretane, a haere i ni'a i te itenati speeches.byu.edu.

I teie matahiti i roto e rave rahi *Liahona* e itehia te tahi mau hoho'a no te tahi mau taata no te Buka a Moromona. No te haapaari e no te faaohipa ohie i te reira, a tapu ia ratou e a tapiri i ni'a i te api parau paari, i te pute parau, e aore râ, i ni'a i te raau iti. A haaputu i te reira i roto i te hoê vehi rata e aore râ, i te hoê pute, e te orapa maha o te faaite ra i hea e itehia ai te aamu no taua mau taata ra.



Alama



Amuleka



Zeezeroma

Te Misioni a Alama raua o Amuleka i Amoniha

Alama 8-14



« I roto i te hoê taime oto rahi, e riro outou e o vau atoa nei i te tiaoro e, 'Aore e taata e haroaroa mai nei ia'u. Aore e taata e ite mai nei' », te na reira ra te papa'iraa a Elder David A. Bednar, no te Pūpū no te Tino Ahuru Ma Piti Aposetolo. « Penei a'é, aore roa e taata i ite. Tera râ, te ite maitai mai nei e te haroaroa maitai mai nei te Tamaiti a te Atua, no te mea, ua ite a'éna oia i to tatou teimaha e ua amo a'éna Oia i te reira hou e amo ai tatou iho i te reira. No To'na aufauraa i te hoo hopea e te amuraa i taua hopoia ra, e aroha hope To'na, e e nehenehe Ta'na e toro mai i To'na rima aroha i roto i te mau tuhaa e rave rahi o to tatou oraraa. E nehenehe Ta'na e faatoro i te rima, e tapea, e tauturu—e horo mai ia tatou nei—e e faaitoito ia tatou ». A hi'ô « Te taraehara e te tere o te tahuti nei », api 12.